

萬 有 文 庫

第 二 集 七 百 種

王 雲 五 主 編

徐 騎 省 集

(上)

徐 鉉 撰

商 務 印 書 館 發 行

徐 騎 省 集

(上)

徐 鉉 撰

國 學 基 本 叢 書

序

余獲舊鈔本徐騎省集。寶愛甚至。鏤板既成。吮毫作序。悼南唐末造之衰。思東海躬逢之厄。憮然有感。唏矣其言。夫其效命偏隅。歷踐清要。攀龍一鱗。吐鳳五采。濰州夫子。聯李杜之名。集賢學士。馳機雲之譽。可謂弁冕英雋。黼黻巖廊者矣。泊乎國步既訖。大命有歸。走青蓋於江東。侍白衣於樓下。身蒙特宥。迹寄中朝。則又麥秀之詠。無以喻其哀思。竹素之詞。不能寫其隱痛者焉。或謂禽喜受命。遂卻敵師。珉雋捐軀。實因主辱。以斯二者。疑愧前賢。不知南都播越之餘。開寶式微之際。襪衣僧帽。叢姦濫於佛門。春水小樓。效都俞於詞律。軍驅白甲。水縮黃花。已失佑於天人。冀圖存於旦夕。秦宓文辨。任專對而有餘。張儼高才。緣通好以相屈。渾濬之師。已偏儀秦之舌。奚裨而公開命慷慨。秉義堅貞。勿顧一介之使。而止上江之援。乞緩無名之師。以全一邦之命。喙奮風雨。心甘雪旄。蓋不爲馮諡之得歸。直將繼孫晟而抗節矣。天威方震。卒貸行人。運祚俄移。仍隨國主。句踐入吳。則范蠡從侍。安樂降晉。則郤正拜官。然而免爲俘虜之悲。恨不與楚金同死。江南大臣之對。未聞向藝祖求生公之心。豈爲開國千戶侯。而負永陵一培土乎。或又謂藥賜牽機禍階私謁。一將朝命。遂洩狂言。背曹髦而馳語。何異王沈察昌邑而奏言。不如張敞。此尤事乖實錄。語涉不經。夫以重光之孱昏。遇太宗之英武。勢非建德就擒之比。時無唐莊內亂之憂。亦旣名改侯封。錢增月奉。似劉鋹執梃。已長降王。擬叔寶工文。祇堪學士。本不關其後慮。亦安用其雄猜。況乎悔已殺之。諫臣吟東流之江水。闔君常態。詞客遙情。公縱不壅於上聞。帝豈肯援爲罪案。是以文寶拾遺之記。但述

悽傷。李燾通鑑之編。全刪疑誤。有悼史爲左證。杜後人之詆誣。觀於隴西撰碑。便殿請對。楊武陽昭烈之贊。竝述休風。魏文貞李密之銘。義存故主。歎息動夫九陛。忠義章於一時。益可知文字之禁。早與蠲除。明聖之君。必無忌克已方。其浮湛僞朝。遠避榮利。朋黨不入於韓宋。衡軸無競於張陳。抵觸內臣。識元節之壯志。專誅賊首。有廣漢之嚴威。緬厥廉貞。允爲卓絕。暨歸皇宋。終作詞臣。王仲宣之侍華轂。擬其賢勞。蔡中郎之趣飲章。同其傷陷。半臂弗御。嬰子京之寒疾。華髮滿領。嗟樂天之無兒。命途永乖。時論所喟。而冰斯之筆。空爛於當年。燕許之文。獲編於身後。流傳未廣。揮發有待。幸拂拭於千古。得揚摧以片言。思鏡湖賀監之答。猶慨慕其風標。披南閣祭酒之書。竝垂光於天壤。

光緒十六年歲次庚寅冬十一月。黟縣李宗媚謹序。

四庫全書總目提要

騎省集三十卷

宋徐鉉撰。鉉有稽神錄，已著錄。晁公武讀書志、陳振孫書錄解題，並載鉉集三十卷，與今本同。陳氏稱其前二十卷，仕南唐時作，後十卷，皆歸宋後作。今勘集中所載年月事蹟，亦皆相符。蓋猶舊本也。集爲其壻吳淑所編。天禧中，都官員外郎胡克順得其本於陳彭年，刊刻表進，始行於世。鉉精於小學，所校許慎說文，至今爲六書矩矱，而文章淹雅，亦冠一時。讀書志稱其文思敏速，凡有撰述，常不喜預作，有欲從其求文者，必戒臨事卽來請，往往執筆立就。未嘗沈思，常曰：文速則意思敏壯，緩則體勢疎慢，故其詩流易有餘，而深警不足。然如臨漢隱居詩話所稱，喜李少保卜鄰詩，井泉分地脈，砧杵共秋聲之句，亦未嘗不具有思致。蓋其才高而學博，故振筆而成，時出名雋也。當五季之末，古文未興，故其文沿溯燕許，不能嗣韓柳之音，而就一時體格言之，則亦迥然孤秀。翟耆年籀史曰：太平興國中，李煜薨，詔侍臣撰神道碑，有欲中傷鉉者，奏曰：吳王事，莫若徐鉉爲詳。遂詔鉉撰。鉉請存故主之義，太宗許之。鉉但推言歷數有盡，天命有歸而已。其警句曰：東鄰構禍，南箕扇疑，投杼致慈，親之惑，乞火無里婦之詞，始勞因壘之師，終後塗山之會。太宗覽之，稱歎不已。云云。後呂祖謙編文鑑，多不取儷偶之詞，而特錄此碑，蓋亦賞其立言有體，以視楊維禎作明鼓吹曲，反顏而詆故主者，其心術相去遠矣。然則鉉之見重於世，又不徒以詞章也。

進徐騎省文集表

臣克順言。伏以德必有言。見稱於君子。文之行遠。用示於方來。矧逢熙盛之期。茂闡欽明之化。臣克順誠惶誠懼。頓首頓首。伏念臣本惟寒族。偶襲緒風。幼服佩於義方。長陶蒸於孝治。築室百堵。介處於下鄉。教子一經。敢墮於素業。旌閭雖慙於往事。賜書寧謝於古人。家藏稍多。耳剽亦久。竊見故散騎常侍徐鉉。傑出江表。夙負重名。逮事天朝。荐升近列。特受先皇之顧遇。頗爲後進之宗師。文律高深。學術精博。辭惟尙要。思在無邪。克著一家之言。蓋處諸公之右。淳化之歲。被病考終。生嗟伯道之孤。歿慮若放之餒。而臣頃在場屋。獲造門牆。情篤鄉關。禮鈞甥姪。永惟感舊。適值送終。臣家乃具扁舟。載其靈柩。直抵豫章之郡。卜葬西山之阿。一掩佳城。久荒宿草。雖歲時靡輟。爲修黃石之祠。而翰墨罕存。難訪茂陵之札。每思編輯。尤懼舛譌。數年前。故參知政事陳彭年。因臣屢言。成臣夙志。假以全本。并茲冠篇。乃募工人。肇形鏤板。竹簡更寫。無媿於前修。緜几迴觀。願留於睿覽。伏望崇文廣武。感天尊道。應眞佑德。上聖欽明。仁孝皇帝陛下。清衷軫念。鴻霈延慈。稍迴虞舜之聰。暫乙東方之牘。淪恩至厚。俾朽骨以重榮。垂範長新。耀遺編而增煥。豈惟疎賤。獨荷照臨。其新印徐鉉文集兩部。計六十卷。共一十二冊。謹隨表上進。干冒宸嚴。臣無任戰汗。激切屏營之至。臣克順誠惶誠懼。頓首頓首。謹言。

天禧元年十一月日。三司戶部判官。朝散大夫。行尙書都官員外郎。上護軍。臣胡克順。上表。

批答

勅胡克順省。所上表進新印徐鉉文集兩部。計六十卷。共一十二冊。事具悉。徐鉉生於江介。早著時名。歷事祖宗之朝。常居文翰之任。發揮誥命。有溫雅之風。備預咨詢。見該通之學。矧惟素履。無謝古人。汝克慕前修。盡編遺札。俾之摹印。庶廣流傳。觀奏御之爰來。諒恪勤之斯至。覽觀之際。嘉歎良深。故茲獎諭。想宜知悉。

五日。

故散騎常侍東海徐公文集序

祕書郎陳彭年撰

昔姬昌既歿。文不在於茲乎。韓起有言。禮盡見於魯矣。故尼丘降異。以產民宗。闕里垂言。用爲人極。自哲人一往。作者多歧。則有孟子制其橫流。荀卿平其亂轍。戰國之際。百氏沸騰。嬴秦之餘。六經煨燼。菁華欲竭。俎豆無歸。故賈生談仁義於前。揚子宗詩書於後。魏晉名士。咸重玄言。梁隋諸公。始興宮體。茲風一扇。踰數百年。唐氏儁乂爲多。比百王而雖盛。文章所向。方三古而終殊。於是韓吏部獨正其非。柳柳州輔成其事。千齡旦暮。斯豈誣哉。俾大道之將行。故由天意。幸斯文之未喪。亦繫人謀。其有道冠人倫。才爲世表。令名不泯。百代攸宗。今復見之徐公矣。公諱鉉。字鼎臣。其先會稽人也。鄰畿之姿。生民之秀。滄溟沃日。流作言泉。建木干星。植爲行圃。英才茂德。光映於前。修懿範。清規儀刑於來者。弄璋之始。屬唐室之多虞。佩觿之初。直揚都之建號。公文辭濬發。不類幼童。識量淹通。已成大器。彈冠入仕。方居終賈之年。佩玉登朝。卽就嚴徐之列。泊江東內禪。文物初興。廊廟之珍。獨當其任。指紳之望。無出其先。漢之賢臣。蔡邕歷三臺之選。魏之俊士。索靖馳二妙之名。若乃毛玠之公清。汲黯之正直。王倫之知禮。張華之博物。鄭當時之下士。山巨源之薦賢。以公方之。綽有餘裕。故得觀孔光之樹。久奉樞機。寓荀勗之池。常參獻替。雖具瞻之重。猶未正名。而乃眷之殊。已同彼相。及樓船南伐。青蓋東來。遂於艱虞之辰。克盡始終之節。夫章臺之壁。早屬秦求。方城之材。果爲晉用。太祖讀豫州之檄。不責其非。今上聽上林之文。屢言其美。由是甘泉柏殿。重

奉宸遊。瑣闥貂冠。更膺天獎。王公慕義。如見古人。名德在時。目爲耆老。李膺交友。不異神仙。許劭言談。是名月旦。雖來江左。魯公於是贈詩。寓彼漢中。武侯以之。下拜無以踰也。及運逢消長。道或盈虛。辭通籍之。簪纓。陪外藩之樽俎。語鬼神之事。歸宣室而未期。留封禪之書。臥茂陵而長往。嗚呼。惟公稟中和之氣。挺傑出之才。風雨而不迷。霜雪而不變。瞻其絜白。如珪如璋。聽其風聲。如蘭如蕙。自成人之始。至從心之年。險阻艱難。所經多矣。功名富貴。皆自致之。至若平仲事君。一心無改。展禽秉直。三黜彌光。百行立身。世談其盡善。片言違道。人知其不爲。豈但王佐之才。獲稱於士季。公卿之量。見賞於林宗乎。其有立言之旨。學古之功。究乎天人。窮乎性理。文房逸勢。楚國之三休。筆陣雄風。宋人之九拒。昔者洞簫之賦。誦之者後宮。劍閣之銘。刊之者明詔。賈誼過秦之作。史臣置於篇中。王融曲水之辭。鄰使求於座上。蔡中郎之所自許。則有太丘之碑。潘黃門之所用工。獨是荊州之誅。公並窮其淵藪。仍在上游。掇其英華。更多餘力。雖絲篁金石。無以均其雅。黼黻玄黃。不足方其麗。草太玄之客。徒欲載金。述十意之人。自將焚藁。豈獨語其篇什。宜升洙泗之堂。畫彼形容。當在靈均之廟者哉。矧復六書之藝。少而留心。二篆之蹤。老而盡妙。研精不捨。常惜寸陰。尺牘所傳。有同珍寶。聖上方欲恢千年之洪業。答上帝之耿光。朝諸侯而東巡。祀介丘而降禪。若乃以秦丞相之健筆。兼漢郎將之雄文。銘此成功。垂之不朽。求之輿論。公卽其人。斯志未終。大年行盡。殲良之痛。其可已乎。公江南文藁。撰集未終。一經亂離。所存無幾。公自勒成二十卷。及歸中國。入直禁林。制詔表章。多不留草。其餘存者。子壻尙書水部員外郎吳君淑。編爲十卷。通成三十卷。所撰質論。稽神錄。奉詔撰江南錄。修許慎說文。並別爲一家。不列於此。彭年越在幼年。卽承訓導。通家之舊。與文學以攸同。

入室之知。方子淵而豈異。感生平而永歎。報德無階。痛音問之長遠。殞身莫贖。聊存撫實。用以冠篇。時淳化四年七月序。

宋故金紫光祿大夫左散騎常侍上柱國東海縣開國伯食邑七百戶責授靜難軍節度行軍司馬徐公年七十六行狀

公諱鉉字鼎臣其先東海郟人也周德之衰偃王以仁義所歸者七十餘國乃遜於江淮之南會稽太末里有廟存焉積慶所鍾令嗣蕃衍故自烈考已上皆生於會稽公所撰改卜合葬烈考太夫人於洪州西山墓誌詳矣公與弟錯屬烈考卽世年皆幼稚太夫人撫育教導資以生而知之咸以雄文奧學克振令譽公未弱冠以蔭釋褐爲校書郎直宣徽北院機命文翰實專司之以名密稱先主卽位以本官直門下省賜緋試知制誥辭達典雅智效勤恪嗣主初拜祠部員外郎知制誥後覩受命草詔者無所經據不根事實繇是駁議忤旨左遷泰州幕職途中詩云浮名浮利信悠悠四海干戈痛主憂三諫不從爲逐客一身無累似虛舟滿朝權貴皆忤遷郭林泉已遍遊唯有戀恩心不改半程猶自望城樓謫居三年嗣主知其無罪徵復本官仍知制誥公餘力攻篆書度越陽冰而與李斯爲等夷著質論十四篇極刑政之要盡君臣之際並傳於世斯爲不朽矣文章論議與故贈揆相韓公同志齊名時人謂之韓徐及江淮之平建州也而福州與越人拒命不服使陳覺馮延魯招撫之未報遂擅興兵攻取時軍帥不一聽而無上又出之以律衆敗績而退乃歸罪二使將誅之時陳覺之使國老宋公之所舉也於是上表待罪蓋欲解救之遂械二使以歸聽命公與韓公議赦此二人則萬姓謗讟之怨歸于上二使首領之惠在於齊巨辱國容姪斯爲巨蠹遂同上疏極言其罪追正刑書克協衆心式沮狂計嗣主親批答疏略曰昨陳覺之行實太傅舉之矣及師敗之後事下有司太傅無救拔之詞有自訟之表以是之故得不再思何者先朝舊臣

國家元老。不惟舉人偶失。可得興言。直是謀之不臧。亦未有加罪之理。昔魏武帝乘降劉琮之勢。將兼并吳國。張昭時居朝右。爲吳老臣。一旦勸請其君。臣妾於魏。此謀不以爲拙。曷以爲拙乎。賴周瑜輩力爭而止之。及魏師之敗。昭亦晏然自處。吳大帝亦不之見責。彼二子。孤若懷憤排之意。戮之久矣。此際長流遠郡。斥爲庶人。五木被身。一家狼籍。永從流放。與死何殊。卿等憂國情深。除奸意切。諸所徵引。批答未殫。公與韓公同表謝。略曰。伏讀批答。曰。卿等憂國情深。除奸意切。是陛下知其奸也。又曰。永從流放。與死何殊。知陛下必不用也。旣知而棄。雖在何爲。公事君匪躬。嫉惡好直。危言危行。始終不變。率此類焉。尋徵拜中書舍人。公嘗誘掖後進。苟有一善。必延譽之。潔己請益者。亦誨導之不懈。壬子歲。翰林學士江公知貢舉。始以進士王克貞等三人及第。盡復舉場之故事。獨由公左右贊成之。江公卽長興三年。盧華下及第。嗣主因問北朝取人。何如卿此來。江公對以北朝公薦私囑相半。若此來。唯以公道選材。實無有此事。嗣主甚善之。中書舍人張緯聞之。以爲皆大朝及第。不本江公之意。甚銜之。時宰執皆非名第。同力欲罷此科。遂下制。輟應舉焉。明年。公兼判文理院。遂首言此事。纔復。不可遽止。乃以進士張□仲尼□□□□□□□鳳賦。朱觀老子猶龍賦。郭賁無聲樂賦。印葵石城虎踞賦。寫之以進。遂下制云。去歲所司。上言。暫罷貢舉。本難久廢。況以經年。其諸色舉人。並宜依舊解送。自此不復廢矣。公之爲文。長於典雅。直而不迂。以理勝爲貴。其武成王廟碑序。末云。微臣學愧常師。用慙兼備。承明再入。故無經國之材。宣室徵還。幸對受釐之問。將使延州聽樂。長聞雅正之聲。圯上受書。世出帝王之佐。蔣莊武帝廟碑序。末云。微臣潤色無功。討論奚取。思問神於先聖。始欲事君。苟獲罪於玄穹。曷容媚竈。唯於舊史。想見英風。適當罷役之初。爰奉屬

辭之詔。西州作頌。誠慙邑子見稱。南國刊銘。或望至尊所改。又銘末云。謝傅長逝。王公不作。獨我莊武。先
迂。睿略斯皆。披文相質。立言邁俗。豈爲情見乎詞而已矣。時江南久興。建屯田。楚州常州尤甚。聚斂倍克。
之輩。侵奪射利。民不聊生。言事者累諫弗聽。洎國老宋公上疏。主者堅執不易。於是命公往察訪。一如親
行。可興可廢。悉以便宜從事。後奏公既行。而羣黨已切齒矣。楚州應非理遷入屯田之產業。盡還本戶。百
姓謹誦感泣。如釋犴狴。次至常州。亦如楚州處置。協比衆惡之徒。太上御名以擅作威福。徵還私第待罪。蒼蠅
貝錦。膠固組織。詰難問狀。不容自理。鍛鍊深刻。將置大辟。其貶制乃張緯所草。末云。尙以年齡方壯。文學
甚優。特屈彝章。宜從流放。於是長流舒州。時弟錯任右拾遺。集賢殿直學士。亦貶秘書郎。分司東都。公前
左遷秦州。弟亦貶烏江尉。及流舒州。親友臨江相送。韓相有詩云。昔年淒斷此江湄。風滿征帆淚滿衣。今
日重憐鵲鷓羽。不堪波上又分飛。在同城三年。唯游覽勝境。披翫典籍。尤攻吟詠。情性未嘗以得喪蠶芥
於方寸。撰周將軍廟碑銘。文宣王廟碑序。喬公亭記。九疊松讚。皆足志之文。刻於貞石。及疊移饒州。未登
途。而周世宗之師過淮。取舒。蘄公遽攜家。榜小舟。由皖口歸昇州。公賦詩末云。一夜黃星照官渡。本初何
面見田豐。其情發於中。不顧言之太直如此。明年授太子左諭德。未幾復知制誥。拜中書舍人。通署中書
省事。時周世宗弭兵修好。待嗣君以優禮。異數凡表章往復。討論潤色。多公所爲。及世宗崩。祭文實公視
草。嗣主嘉賞。時人傳寫爲之紙貴。侍嗣主殂於豫章。護喪歸建業。後主卽位。官職如故。而訪問詢謀。無改
嗣主之道。其知舉也。不獨考其文章。必先察其德行。故難於得人。出羣拔萃者。最稱吳淑。復以子妻之。其
所問策五道。盡時務政理之要。後主並親答焉。仍俾詞臣悉對之。後主以尙書省綱條弛紊。官司怠棄。積

習已久。思公正之人。以糾劾提振之。徙公爲尚書左丞。逾月而罷。以尚書右僕射游公。判六司。拜公爲工部侍郎。知制誥。翰林學士。尋以憲署曠職。法吏侮文。非委直清。不能嚴肅。拜公御史大夫。而佞用讒勝。吾道不行。於是奉身而退。拜兵部尚書。知制誥。翰林學士。以先奉命修嗣主實錄。乃專以屬辭比事爲務。後主每有著述。必令公兄弟視草。而後編錄。故雜說。公爲之序。文集。弟集賢舍人爲之序。彼昔之二龍兩驥。烏足以方茲令名焉。王師之弔伐金陵也。公急病讓夷。請使於天朝。以釋後主之前事。辯疑分謗。且服罪降名。以鄙入爲請。庶不墮奔世之國祀。已行。遂拜右僕射。同參左右內史事。及覲太祖。敷奏忠懇。執議誠信。雖不得請。太祖亦甚嘉歎。美其秉節無撓。旣復命。自以不能副後主之望。雪泣固讓。不受其新命焉。尋從後主歸朝。授太子率更令。皇上登極。素知公之文學優贍。久司教令。特授直翰林學士院。拜給事中。侍從鑾輿。下并汾襲僞之地。巡狩魏博。逐入寇之虜。申威耀德。因壘懷來。告至策勳。詔示填委。雖翰林諸公。盡熙帝之載。而公亦與有力焉。數年。拜右散騎常侍。慶恩升左散騎常侍。末年。公著靜齋自箴。篆書刊石。寘於座右。曰。爰有愚叟。棲此陋室。風雨可蔽。戶庭不出。知足爲富。娛老以逸。貂冠蟬冕。虎皮羊質。處之勿疑。永爾終吉。後之君子。觀之。有以見公。名重益謙。德成藏密。與其一無所啖。而窺冀所不休者。是天之戮民。不可同年而語矣。惟公未冠筮仕。名稱藉甚。日彰夙習。非聚學辨問之所克也。稟心忠正。治身儉約。公家之事。知無不爲。自幼至老。惡其聚斂貪冒。未嘗微寘於懷。俸祿所入。不問多少。隨時供億而已。居處求安。不務顯敞。但聊以蔽其風雨。量家所受。餘分貸親。故舊知寓止焉。與人交。有始有卒。必誠必信。久要不替。雖中或不善。人無閒然。初與禮部尚書常夢錫。給事中蕭儼。之爲莫逆。蓋以二公常忿宋國老。狙於縮。

太上之業。包藏凶慝。每章言其罪。公亦同力嫉惡。先主嗣主。因審度爲虞。故不任之以政。及宋國老暮年。御名之業。因陳覺李徽古協謀不軌。貫盈事發。同時殛死。嗣主追念常。蕭與公疇昔敢言。果今日之速禍也。時常公已卒。因言曰。夢錫常欲殺齊。恨其誅戮不見。於是贈右僕射焉。適後主從容言及此事。公且曰。夢錫先卒。不見齊。之敗。嗣主已追贈矣。唯臣與蕭儼之。目覩朝典。況臣塵忝官列八座矣。獨蕭儼之往爲理官。以赦前失。入貶黜吉州。以老告退。願以臣今所居官授儼之。旌其先見。後主由是召蕭儼之至建業。以公所陳列慰勞。特授工部尙書。以年過懸車。致仕居吉州。給奉祿終身焉。公於內外族視無疎密。待之如一。其有孤嫠無告者。皆糾合收養。稱家之有無。隨事拯濟。婚嫁視之如家人子。雖讒口謗議紛紜盈耳。公自信不疑。唯恤念舊是急。不知其他。及左遷郃岐。亦坐此獲譴矣。有子曰夷直。朗州桃源令。先公疾卒。女三人。長適左贊善大夫高御名。次女適國子博士吳淑。先公卒。次女幼有才淑。未笄而卒。公享年七十六。某年月日。以疾終於邠州官舍。恬然神氣不亂。唯禁家人勿哭。以爲怛化。但囑以殯歸於洪州西山。祔葬於烈考太夫人之墓。卽以某年月日。洪州胡某以舟至京。護載公之柩歸西山。從理命也。公業隆儒行。奉五常而不墮。志嚮道風。稟三寶而無玷。故其立言蘊德。久而彌芳。繕性觀妙。老而益壯。實古之人與。克播遺風。允資鴻筆。謹狀。

大宋故靜難軍節度行軍司馬檢校工部尙書東海徐公墓誌銘

金紫光祿大夫尙書右僕射兼中書侍郎平章事監修國史上柱國隴西郡開國公李 昉撰

上卽位之元年冬以學士李昉獨直翰林詔太子率更令徐鉉入院分直視草是時昉與公以同道相知論交契之始也越四年春天子帥六師親征太原并壘旣平遂北幸塞垣耀兵盧龍秋七月凱歌歸於京師軍衛之中書詔填委公援筆馬上應答如流以扈蹕勞遷給事中直學士院如故又四年授右散騎常侍始罷文翰之職端拱元年帝親耕籍田改左散騎常侍積階至金紫光祿大夫敍勳至上柱國累封至東海郡開國侯食邑一千戶以淳化二年秋九月檢校工部尙書出爲靜難軍節度行軍司馬明年八月二十六日晨時起方冠帶遽命筆硯語左右曰吾疾作矣手疏一幅約束後事又別署一幅道者天地之母書訖而終年七十六陝西道轉運副使鄭適來邠州遂出家財竭力襄事卽以其年十月奉遷靈柩還京師權厝於板橋東南之佛舍愛塔國子博士吳淑門生殿中丞杜鎬時皆典治中祕書遂以公凶訃聞上覽表軫悼詔出內府錢二十萬賜其家明年七月洪州奉新縣義門胡仲堯自豫章具舟楫迎公之喪葬於洪州新建縣西山之鸞岡原奉遺令從先塋也公字鼎臣其先會稽人自言生於揚州曾祖諱源祖諱徽皆隱德不仕父諱延休衛尉卿贈左僕射才高道直有名於時公幼孤與弟鐸俱苦節自立未弱冠以文行稱於時仕江南李氏周旋三世歷校書郎直宣徽北院尋直門下省三知制誥一遷司封郎中兩拜中書舍人再入翰林爲學士自貶官起爲太子右諭德由尙書左丞爲兵部侍郎爲御史大夫由大夫爲吏部尙書由尙書爲右僕射同參左右內史事堅讓不就王師下金陵隨後主歸朝以太子率更令奉

朝請。今諫議大夫張公。秘說在江南時。奉太夫人慈訓。不妄游。下帷著書。雖親族罕見其面。年十六。遇李氏先主。霸有南土。辟命累至。釋褐連任書府。繇是經史百家。爛然于胸中矣。其典誥命也。落筆灑翰。應用無窮。皆混然而成。有雍正之體。當時名士。如韓熙載者。無敵。尤長於制誥。公與之齊名。其豫機密也。居中守正。無所附會。雖在家宴居。如對君父。其恭慎也如此。當時用事臣。有陳覺。魏岑者。樂禍好權。多撓時政。公嫉之如讎。其掌貢舉也。至公取人。不受私謁。先策問。而後詞賦。進德行。而黜浮華。當時舉場。號爲得士。公弟內史舍人錯。每主文柄。亦以直道自持。故江表後進。力學未至者。聞二徐爲春官。多望風引退。其精饜無私也如此。其持憲也。當官執法。無所屈撓。姦邪爲之側目。權貴因之斂手。當時言風憲者。惟公與故御史中丞江文蔚。王師之渡江也。公將本君之命。使於朝廷。且乞緩師。以奉祭祀。太祖引見。謂公曰。汝主託疾不朝。乖事大之禮。況吾兵業已行。無中輟之理。歸報汝主。善爲之謀。公因慷慨鋪陳。自古成敗之道。表明後主忠孝之節。太祖亦爲之動容。厚禮之遣歸。初大軍已圍建業。後主思命於交兵之間。左右咸有難色。公欣然請行。後主謂之曰。爾旣往。卽當止。上江救兵。勿令東下。公曰。是行非全策。今城中所恃者。救兵。奈何以臣此行止之。後主曰。比以和解爲請。復用決戰。卽是自相矛盾。於爾得不危乎。公曰。今豈以一介之微。而忘社稷之重。但置臣於度外耳。後主撫之泣下。曰。時危見節。汝有之矣。及歸朝。太祖盛怒責之。曰。吾向與汝言。何爲弗達於汝主。且抗拒之罪。皆汝所爲。公頓首謝曰。臣爲江南大臣。而其國滅亡。抵此死有餘罪。餘復何言。太祖於是歎息曰。忠於所事者乎。汝當事我如事李氏。命坐。存撫甚厚。故相太子太師王公溥。一見如舊相識。每有經史異義。多質疑於公。繇是琴樽嘯歌。筆硯酬唱。無有虛日。相得甚歡。故

工部尚書李公穆。有清識。嘗語人曰。吾觀江表冠蓋。若中立有道之士。惟徐公近之耳。兵部侍郎王公祐。負才尚氣。未嘗輕許人。及見公。常言於朝曰。文質彬彬。學問無窮。惟徐公耳。公亦曰。王公詞如江海。心無城府。真奇士也。今吏部侍郎李公至。翰林學士承旨蘇公易簡。皆當世英俊。奉公以師友之禮。公仕朝廷。將二十年。前後錫賜所得。俸祿所入。備伏臘外。未嘗蓄聚一金。所居之地。僅庇風雨。惟古木數株。每夏秋之際。霖潦爲患。頽垣壞宇。人不堪其憂。而公處之晏如也。江南故人子弟。暨親族之孤遺者。來投於公。歲無虛月。公分廩祿以卹之。虛館舍以安之。殆於終年。未有倦色。有布衣刷亮者。老而多誕。游公之門。僅五十稔。年九十。猶矍鑠不衰。每從江南來。詣公公置之道院。日與之碁。未嘗語及他事。而待之如初。公嘗言江南有處士朱貞白。嘗語人曰。今人或言不欺神明也。吾嘗佩服斯言。不敢爲欺心之事。有故人謝岳。嘗爲號州盧氏令。刺史與之有隙。凡選舉之制。過七十卽罷去。遂奏謝年過不堪其任。時江東初下。仕人有可疑者。咸質於公。謝因私請曰。某之齒。公實知之。苟朝廷問公。不敢望公言。未七十。但言不知其年。卽幸矣。公曰。君之甲子。某具知之。而云不知。是欺天也。苟或見問。必以實對。其至行無誑。又如此。公爲文。智思敏速。或求其文。不樂豫作。令其臨事見白。立爲草之。云速則意思壯敏。緩則體勢疎慢。公愛壻吳淑。言江南宰相馮延巳。常語人曰。凡人爲文。皆事奇語。不爾則不足觀。惟徐公不然。率意而成。自造精極。時人以爲知言。所著文多遺落。今其存者。編成三十卷。又擬徐幹中論。作質論數十編。集耳目聞見之異。作稽神錄二十卷。並行於世。公文學之外。長於篆隸。其書札之妙。自成一家。當世士大夫。有得其書者。無不寶之。以爲楷法。任常侍日。奉詔與直史館。句中正等。重修許慎說文。自撰韻譜一十卷。學者伏其精博。公嘗慕

老子清淨之教。莊周齊物之理。故內不能以得喪動。外不能以榮辱干。然而爲學之心。老而彌篤。在邠州日。以時俗文字僞謬。乃親以隸字寫說文。字體纖細。正如蠅頭。過數萬言。年高目明。洞見毫末。其精力不怠如此。夫人太原王氏。子朗州桃源令夷直。並先公而卒。長女適吳氏。早亡。次女適左贊善大夫高慎交。幼女十七娘。才淑過人。未及笄年而夭。自爲誌文。詞甚悽楚。噫。孔門四科。德行文學。洪範五福。壽考康寧。在於古人。鮮有兼美。惟公高才懿行。善始令終。所謂登孔門之二科。居洪範之三福也。語曰。善人吾不得而見之矣。惜哉。銘曰。

祖巨軻兮宗老莊。奉三寶兮師五常。生維揚兮仕建康。歸皇宋兮老大梁。歿幽土兮葬豫章。儒林丈人兮。今也則亡。嗚呼。

祭文

維淳化三年歲次壬辰。十月辛酉朔十八日戊寅。銀青光祿大夫。行尚書吏部侍郎。兼祕書監上柱國李至。朝奉大夫。左諫議大夫。充史館修撰。判館事。上柱國。賜紫金魚袋。楊徽之。張洎等。謹以清酌之奠。致祭於故左騎省常侍徐公之靈。惟公博識宏才。懿文茂學。如金之渾。如玉之璞。天然渾成。不加雕琢。頃在江左。已聞素履。及來天庭。孰不仰止。周旋清顯。殆將二紀。相如視草。隰朋近侍。篆籀稱絕。典謨得體。其馨如蘭。其直如矢。令聞令望。之才之美。今也儒宗。古之君子。五百年來。一人而已。道屈於位。遇休明之世。未盡伸才。困於命。當衰晚之年。不得志。嗟乎。天地之間。人生如寄。自古迄今。其誰不死。矧素髮之垂領。復何悲乎已矣。可惜者。淪於遠郡。契闊千里。鸚鵡之賦未成。二豎之災奄至。瀟于意兮。止一女。鄧伯道兮。終無子。

此素友清交。門生故吏。可以失聲而長號。決瀾而屑涕。以爲天道難忱。善人如是。至受教文字。執弟子之禮。徽之泊。有舊瀟湘。敦故人之契。迎旅櫬於西郊。風切切兮。雨蕭蕭。靈筵慘兮。素帷動。疑肝蠻於寂寥。嗚呼。臨喪一奠。庶英魂之可招。尙享。

東海徐公輓歌詞

李至

吾道亡宗匠。明時喪大儒。傳家無嗣子。封岳有遺書。命劣長沙賈。名齊鄴下徐。不知千古後。文行復誰如。執友韓夫子。傳家弟楚金。人稱聯璧重。世慕二龍深。鮑謝須慙德。機雲亦醉心。可憐黃壤下。埋沒此瑤琳。海內才名重。儒中學問高。病猶不釋卷。老亦自揮毫。蠹簡披皆識。亡書誦豈勞。如能百身贖。爭惜一鴻毛。說文修古篆。質論著新詞。尙父鷹揚頌。周瑜水戰碑。家藏爲世寶。手寫作人師。惜不歸宣室。吾皇問受釐。薄暮邗郊遠。何人不慘顏。無兒見星往。有妾護喪還。舊宅猶臨水。空車卻度關。平生衣上淚。今日爲君斑。

左散騎常侍東海徐公此五君詠中之一

徐公眞丈夫。不獨文章伯。江南兵未解。主憂臣慘戚。公願紓其難。苦求使上國。庶獲一言伸。少息苞茅責。其君驚且歎。執手涕沾臆。謂言知爾晚。何此忠義激。天子叱在庭。請讓雷霆赫。公亦從容對。曾不渝神色。仁者必有勇。斯亦古遺直。書大略其小。我有春秋癖。所以此詩中。不言公翰墨。庶警事君心。勉旃希令德。

後序

徐公既沒。門人等論次其文。爲三十卷。龔祕閣吳正儀。今翰林穎川公。並爲之序。論之詳矣。都官員外郎胡君克順。通才博雅。樂善好賢。早游騎省之門。深蒙鄉里之眷。寶茲遺集。積有歲時。鏤板流行。庶傳悠久。

因以丞相趙郡文貞公鄧帥隴西公所作墓誌輓詠等列於左次用垂茂實俾題於後以記厥由大中祥符九年八月太常丞集賢校理晏殊序

明州重刊徐騎省文集後序

騎省徐公文集三十卷天禧閒尙書都官員外郎胡君克順編錄刊行且奉表上進章聖皇帝降詔獎諭參知政事陳公彭年爲之序引丞相晏元獻公復爲後序騎省在江南有重名仕天朝爲近侍以文翰忠直在當時諸公先旣歿丞相趙郡李文正公實誌其墓所以稱述推尊之者甚至距今且二百年其英名偉節得以不泯而爲後學法者繫文集是賴年世愈遠兵火中厄鮮有存者偶得善本使公庫鏤板以傳紹興十九年十一月十日右朝議大夫充敷文閣待制知明州軍州事提舉學事賜紫金魚袋徐琛跋

徐騎省集目錄

第一卷

文賦三首

詩三十首

第二卷

詩六十九首

歌一首

第三卷

詩七十五首

第四卷

詩七十二首

第五卷

詩七十一首

第六卷

制誥二十九首

第七卷

制誥二十六首

第八卷

制誥三十六首

祭告文二首

第九卷

册九首

謚議一首

第十卷

碑銘五首

第十一卷

碑銘三首

第十二卷

碑銘五首

第十三卷

記七首

第十四卷

記三首

哀册文二首

頌一首并序

贊四首

銘二首

第十五卷

墓誌七首

第十六卷

墓誌八首

第十七卷

墓誌七首

第十八卷

序八首

第十九卷

序六首

第二十卷

表四首

第二十一卷

應制詩一十九首

第二十二卷

雜詩五十九首

第二十三卷

書五首

狀二首

文九首

寄送詩四十八首

文賦二首

序九首

第二十四卷

序五首

連珠五首

贊四首

銘三首

論三首

第二十五卷

碑銘五首

第二十六卷

碑銘五首

第二十七卷

碑銘五首

第二十八卷

記十首

第二十九卷

墓誌六首

第三十卷

墓誌七首

徐騎省集卷第一 賦詩一

頌德賦

木蘭賦

新月賦

宋 東海徐 鉉撰

頌德賦東宮生日獻

惟先王之建國。體皇極而垂制。仰則觀於辰象。俯則察於地義。前星爲帝座之輔。蒼震乃少陽之位。非明德與茂親。不足膺茲主器。故萬邦以貞。而本支百世。是必天錫嘉祉。神輸百祥。山河資其正氣。日月分其融光。應期運以載誕。配乾坤而永昌者也。惟我儲后。昭明俊德。黃裳元吉。沈潛剛克。鈞深致遠。曾莫挹其津涯。問安視膳。每或形於顏色。在昔沖讓。高追太伯。乃剖麟符。保釐東宅。受道師傅。稽疑典冊。化自誠心。風行邦國。乃擁干旌。南徐之城。左撫句吳。前對敬亭。京師河潤。盛德日新。其畏如夏。其惠如春。謝傳圍棋。靜一方之沴氣。條侯高臥。息萬里之驚塵。令問孔昭。元功莫二。人情不可以久鬱。皇統不可以終避。乃畏天命。允茲儲貳。鳴玉軼以徐來。與春郊而總至。龍樓霧廓。雞戟風生。珍符疊委。和氣交迎。百度以之。而式序多壘。以之而載清。史書有年。衢傳頌聲。豈人事之協贊。信宗祊之降靈。于是玄圃凝陰。瑤山密雪。宣猷之緹幕。半下濛汜之曾冰。乍結爰書慶誕之日。始過嘉平之節。麗正晨啓。重明夙設。調護之客。娛侍之臣。峨冠煒燁。佩玉璘玢。咸稽首而再拜。獻多福于萬春。有宮坊之下吏。乃捧觴而進。稱曰。自古聖賢。率由輔導。伊狗名與課實。故成敗之異效。粵若成王。史佚周召。左右前後。惟仁與孝。靡過不舉。無善不告。茲君臣

之一體。故風聲之克劭。降及後代。亦慎厥初。實聘四老。復延二疏。咸由古道。以佑皇儲。若乃征和戾園。有思臺博望之盛。貞觀承乾。有玄齡魏徵之重。或有其禮而無人。或有其人而不用。何擇禍之忘輕。信非賢而罔共。英英副君。鑒古知今。百揆在乎手。萬務經其心。朝廷之所寄者重。蒼生之所望者深。既賞興王之諫。亦訪百官之箴。故曰。生民在勤。好問則裕。不躬不親。人將孰信。一游一豫。樂有常度。節八音以導其和。平調五味。以適其喜怒。情義兼于家國。故知無不爲。愛敬極於君親。故惟道是諭。儉以足用。而施舍不可不行。仁以接物。而刑罰不可不具。冗官宜省。而才不可遺。疆事漸寧。而備不可去。居安思危。覩災而懼。上分一人之憂。以成天下之務。俾中外之禔福。與宗祧而永固。伊下臣之不佞。蒙國士之殊遇。實含和而吐頌。豈登高之能賦。願降鑒於芻蕘。庶效誠於塵露。

木蘭賦并序

頃歲鉉左宦江陵。官舍數畝。委之而去。庭木蘭。因移植於宗兄之家。及鉉徵還。席不遑暖。又竄於舒庸。吾兄感春物之載華。擬古詩而見寄。吟翫感歎。謹賦以和焉。雖不足繼體物之作。庶幾申騷客之情爾。仙人有紫旄節

伊庭中之奇樹。木蘭之可悅。外爛爛以凝紫。內英英而積雪。芬芳兮謝客之囊。旖旎兮仙童之節。此樹本自許蒲茸之竊比。聽蘭牙之並列。於是辭下土之卑溼。歷上京之繁華。恥銜價於豪門。乃託根於貧家。本自

歷陽移植資幽人之賞豫。有好事之稱嗟。一旦逐客程遠。君門路賒。削閨籍與印綬。豈獨留乎此花。噫。人

屢遐棄。花猶得地。分兔苑之餘蔭。向藩房而吐媚。授簡多暇。攀條屬思。持香草以予比。效騷辭而我寄。感

此生之百憂。何斯物之足貴。悲夫。客館長吟。山城夕陰。想馨香之不改。歎歡宴之難尋。憑歸夢於飛翼。寫

商歌於素琴。歌曰。光景兮愁暮。別離兮易久。眞宰兮無黨。貞心兮不朽。誠知異日。重滋田氏之荆。但恐相逢。共歎桓公之柳。

新月賦 庚午歲宿直作

五月五日。繁陰乍晴。倬彼新月。麗於太清。映玉繩而絢彩。揜銀漢以騰精。對鳩鵲西南之影。步明光東北之楹。歷歷遲漏。悠悠我情。雖萬古之不易。感一年而始生。乃有駭女癡男。朱顏稚齒。欣春物之駘蕩。登春臺之靡迤。雜佩璀璨。輕裾颯纒。紛乎拜祝。怡然宴喜。人歲歲以潛換。景年年而若此。昔我當年。胡云不然。世路多故。流光暗遷。易壯心於大觀。變玄髮於華顛。願一毛之無濟。媿兩綬之徒懸。況乎萬象虛明。九門奧秘。對宣室以方罷。閱通宵而不寐。憂心似醉。旣慷慨於君恩。急景如馳。更淒涼於往事。想翹月以長歌。遂抽毫而見意。

詩

早春左省寓直

旭景鸞臺上。微雲象闕間。時清政事少。日永直官閑。遠籟飛簫管。零冰響珮環。終軍年二十。默坐叩玄關。

寒食宿陳公塘上

垂楊界官道。茅屋倚高坡。月下春塘水。風中牧豎歌。折花閑立久。對酒遠情多。今夜孤亭夢。悠揚奈爾何。

將去廣陵別史員外南齋

家聲曾與金張輩。官署今居何未開。起得高齋臨靜曲。種成奇樹學他山。鴛鸞終日同醒醉。蘿薜常時共

往還賤子今朝獨南去。不堪迴首望清閨。

將過江題白沙館

少長在維揚。依然認故鄉。金陵佳麗地。不道少風光。稍望吳臺遠。行登楚塞長。殷勤語江嶺。歸夢莫相妨。

登甘露寺北望

京口潮來曲岸平。海門風起浪花生。人行沙上見日影。舟過江中聞櫓聲。芳草遠迷揚子渡。宿煙深映廣陵城。游人鄉思應如橘。相望須含兩地情。

山路花

不共垂楊映綺寮。倚山臨路自嬌嬈。游人過去知香遠。谷鳥飛來見影搖。半隔煙嵐遙隱隱。可堪風雨暮蕭蕭。城中春色還如此。幾處笙歌案舞腰。

京口江際弄水

退公求靜獨臨川。揚子江南二月天。百尺翠屏甘露閣。數帆晴日海門船。波澄瀨石寒如玉。草接汀蘋綠似煙。安得乘槎更東去。十洲風外弄潺湲。

早春旬假獨直寄江舍人

省署皆歸沐。西垣公事稀。詠詩前砌立。聽漏向申歸。遠思風醒酒。餘寒雨濕衣。春光已堪採。芝蓋共誰飛。

從駕東幸呈諸公

吳公臺下舊京城。曾揜衡門過十春。別後不知新景象。信來空問故交親。宦游京口無高興。習隱鍾山限

俗塵今日喜爲華表鶴。況陪鷓鴣免逐津。

重游木蘭亭

繚繞長隄帶碧潯。昔年游此尙青衿。蘭橈破浪城陰直。玉勒穿花苑樹深。宦路塵埃成久別。仙家風景有誰尋。那知年長多情後。重凭欄干一獨吟。

賦得綵鸞

縷綵成飛鸞。迎和啓蟄時。翠翹生玉指。繡羽拂文楣。詎費銜泥力。無勞剪爪期。化工今在此。醜怪社來遲。

送魏舍人仲甫爲蘄州判官

從事斬春興自長。斬人應識紫薇郎。山資足後拋名路。菡萏秋來憶故鄉。以道卷舒猶自適。臨戎談笑固無妨。如聞郡閣吹橫笛。時望青谿憶野王。

題殷舍人宅木芙蓉

憐君庭下木芙蓉。嫋嫋纖枝淡淡紅。曉吐芳心零宿露。晚搖嬌影媚清風。似含情態愁秋雨。暗減馨香借菊叢。默飲數杯應未稱。不知歌管與誰同。

送史館高員外使嶺南

東觀時閑暇。還修諭蜀書。雙旌馳縣道。百越從軺車。桂蠹晨殮罷。貪泉訪古初。春江多好景。莫使醉吟疎。春日紫巖山期客不至。

郊外春華好。人家帶碧谿。淺莎藏鴨戲。輕靄隔雞啼。掩映紅桃谷。蜚緣翠柳堤。王孫竟不至。芳草自萋萋。

宿蔣帝廟明日遊山南諸寺

便返城闈尙未甘。更從山北到山南。花枝似雪春雖半。桂魄如眉月始三。松蓋遮門寒黯黯。柳絲妨路翠
毵毵。登臨莫怪偏留戀。游宦多年事事諳。

賦得有所思

所思何在杳難尋。路遠山長水復深。衰草滿庭空佇立。清風吹袂更長吟。忘情好醉青田酒。寄恨宜調綠
綺琴。落日鮮雲偏聚散。可能知我獨傷心。

贈王貞素先生

先生嘗已佩真形。紺髮朱顏骨氣清。道祕未傳鴻寶術。院深時聽步虛聲。遼東幾度悲城郭。吳市終應變
姓名。三十六天皆有籍。他年何處問歸程。

春夜月

幽人春望本多情。況是花繁月正明。竟夕無言亦無寐。繞階芳草影隨行。

愛敬寺有老僧嘗遊長安言秦雍閒事歷歷可聽因贈此詩兼示同行客

白首棲禪者。嘗談灞滻游。能令過江客。偏起失鄉愁。室倚桃花崦。門臨杜若洲。城中無此景。將子剩淹留。
游蔣山題辛夷花寄陳奉禮本約陳同游不至。

今歲游山已恨遲。山中仍喜見辛夷。簪纓且免全爲累。桃李猶堪別作期。晴後日高偏照灼。晚來風急漸
離披。山郎不作同行伴。折得何由寄所思。

徐騎省集卷第一詩二

和殷舍人蕭員外春雪

萬里春陰乍履端。廣庭風起玉塵乾。梅花嶺上連天白。蕙草塔前特地寒。晴去便爲經歲別。興來何惜徹宵看。此時鴛侶皆閑暇。贈答詩成禁漏殘。

寄蘄州高郎中

賈傅棲遲楚澤東。蘭皋三度換秋風。紛紛世事來無盡。黯黯離魂去不通。直道未能勝社鼠。孤飛徒自歎冥鴻。知君多少思鄉恨。併在山城一笛中。

寄和州韓舍人

急景駸駸度。遙懷處處生。風頭乍寒暖。天色半陰晴。久別魂空斷。終年道不行。殷勤雲上鴈。爲過歷陽城。從兄龍武將軍沒於邊。戍過舊營宅作

前年都尉沒邊城。帳下何人領舊兵。徼外瘴煙沈鼓角。山前秋日照銘旌。笙歌卻返烏衣巷。部曲皆歸細柳營。今日園林過寒食。馬蹄猶擬入門行。

景陽臺懷古六言

後主亡家不悔。江南異代長春。今日景陽臺上。閉人何用傷神。

春分日

仲春初四日。春色正中分。綠野裴回月。晴天斷續雲。鸞飛猶箇箇。花落已紛紛。思婦高樓晚。歌聲不可聞。

寄駕部郎中瞻

賤子乖慵性。頻爲省直牽。交親每相見。多在相門前。君獨疎名路。爲郎過十年。炎風久成別。南望思悠然。

和王庶子寄題兄長建州廉使新亭

謝守高齋結御名新。一方風景萬家情。羣賢詎減山陰會。遠俗初聞正始聲。水檻片雲長不去。訟庭纖草轉

應生。阿連詩句偏多思。遙想池塘畫夢成。

謝文靜墓下作時閩嶺用師契丹陷梁宋

越徼稽天討。周京亂虜塵。蒼生何可奈。江表更無人。豈憚尋荒壟。猶思認後身。春風白楊裏。獨步淚霑巾。

觀人讀春秋

日覺儒風薄。誰將霸道差。亂臣無所懼。何用讀春秋。

秋日雨中與蕭贊善訪殷舍人於翰林座中作

野出西垣步步遲。秋光如水雨如絲。銅龍樓下逢閑客。紅藥堦前訪舊知。亂點乍滋承露處。碎聲因想滴

蓬時。銀臺鑰入須歸去。不惜餘歡盡酒卮。

送和州張員外爲江都令

經年相望隔重湖。一旦相逢在上都。塞詔官班聊慰否。埋輪意氣尙存無。由來聖代憐才子。始覺清風激

懦夫。若向西岡尋勝賞。舊題名處爲躊躇。

和明道人宿山寺

聞道經行處。山前與水陽。磬聲深小院。燈影迴高房。落宿依樓角。歸雲擁殿廊。羨師閑未得。早起逐班行。
晚歸

暑服道情出。煙街薄暮還。風清飄短袂。馬健弄連環。水靜聞歸櫓。霞明見遠山。過從本無事。從此涉旬閒。

月真歌廣陵妓人翰林殷舍人所錄。搆之垂訪。筵上贈此。

揚州勝地多麗人。其閒麗者名月真。月真初年十四五。能彈琵琶善歌舞。風前弱柳一枝春。花裏嬌鶯百般語。揚州帝京多名賢。其閒賢者殷德川。德川初秉綸闈筆。職近名高常罕出。花前月下或遊從。一見月真如舊識。閑庭深院資賢宅。宅門巖峻無凡客。垂簾偶坐惟月真。調弄琵琶郎爲拍。殷郎一旦過江去。鏡中嬾作孤鸞舞。朝雲暮雨鎮相隨。石頭城下還相遇。二月三月江南春。滿城濛濛起香塵。隔牆試聽歌一曲。乃是資賢宅裏人。綠窗繡幌天將曉。殘燭依依香裏裏。離腸卻恨苦多情。輕障熏籠空悄悄。殷郎去冬入翰林。九霄官署轉深沈。人閒想望不可見。唯向月真存舊心。我慙關茸何爲者。長感餘光每相假。陋巷蕭條正揜屏。相攜訪我衡茅下。我本人愚且貞。歌筵飲席常無情。自從一見月真後。至今贏得顛狂名。殷郎月真聽我語。少壯光陰能幾許。良辰美景數追隨。莫教長說相思苦。

走筆送義興令趙宣輔

聞君孤棹汎荆谿。隴首雲隨別恨飛。杜牧舊居憑買取。他年藜杖願同歸。

天闕山絕句

散誕愛山客。淒涼懷古心。寒風天闕晚。盡日倚軒吟。

除夜

寒燈耿耿漏遲遲。送故迎新了不欺。往事併隨殘曆日。春風寧識舊容儀。預慙歲酒難先飲。更對鄉儺羨小兒。吟罷明朝贈知己。便須題作去年詩。

寄鍾謨

看看潘鬢二毛生。昨日林梢又轉鶯。欲對春風忘世慮。敢言罇酒召時英。假中西閣應無事。筵上南威幸有情。不得車公終不樂。已教紅袖出門迎。

正初答鍾郎中見招

高齋遲景雪初晴。風拂喬枝待早鶯。南省郎官名籍籍。東隣妓女字英英。流年倏忽成陳事。春物依稀有舊情。新歲相思自過訪。不煩虛左遠相迎。

聞鴈寄故人

久作他鄉客。深慙薄宦非。不知雲上鴈。何得每年歸。夜靜聲彌怨。天空影更微。往年離別淚。今夕重霑衣。

江舍人宅筵上有妓唱和州韓舍人歌辭因以寄之

良宵絲竹偶成歡。中有佳人俯翠鬟。白雪飄飄傳樂府。阮郎憔悴在人間。清風朗月長相憶。佩蕙紉蘭早晚還。深夜酒空筵欲散。向隅惆悵鬢堪班。

寒食日作

廚冷煙初禁。門閑日更斜。東風不好事。吹落滿庭花。過社紛紛鷺。新晴淡淡霞。京都盛遊觀。誰訪子雲家。

賀殷游二舍人入翰林江給事拜中丞

清晨待漏獨徘徊。霄漢懸心不易裁。閣老深嚴歸翰苑。夕郎威望拜霜臺。青綾對覆蓬壺晚。赤棒前驅道路開。猶有西垣廳記在。莫忘同草紫泥來。

歐陽大監雨中視決堤因墮水明日見於省中因戲之

聞道張晨蓋。徘徊石首東。濬川非伯禹。落水異三公。衣濕仍愁雨。冠欹更怯風。今朝復相見。疑是葛仙翁。

送吳郎中爲宣州推官知涇縣

征虜亭邊月。雞鳴伴客行。可憐何水部。今事謝宣城。風物聊供賞。班資莫繫情。同心不同載。留滯爲浮名。

寄舒州杜員外

信到得君書。知君已下車。粉闈情在否。蓮幕興何如。人望徵賢入。余思從子居。瀟山真隱地。憑爲卜茅廬。

九月十一日奇陳郎中

我多吏事君多病。寂絕過從又幾旬。前日龍山煙景好。風前落帽是何人。

和司門郎中陳彥

衡門寂寂逢迎少。不見仙郎向五旬。莫問龍山前日事。菊花開卻爲閑人。

賦得擣衣

江上多離別。居人夜擣衣。拂砧知露滴。促杵恐霜飛。漏轉聲頻斷。愁多力自微。裁縫依夢見。腰帶定應非。

九月三十夜雨寄故人

獨聽空階雨。方知秋事悲。寂寥旬假日。蕭颯夜長時。別念紛紛起。寒更故故遲。情人如不醉。定是兩相思。

寄撫州鍾郎中時王師收績於閩中謨在建州

去載分襟後。尋聞在建安。封疆正多事。罇俎若爲歡。都護空遺鏃。明君欲舞干。繞朝時不用。非是殺身難。

送歐陽大監遊廬山

家家門外廬山路。唯有夫君乞假遊。桡牘乍拋公署晚。林泉已近暑天秋。海潮盡處逢陶石。江月圓時上庾樓。此去蕭然好長往。人間何事不悠悠。

立秋後一日與朱舍人同直

一宿秋風未覺涼。數聲宮漏日猶長。林泉無計消殘暑。虛向華池費稻粱。

賦得霍將軍辭第

漢將承恩久。圖勳肯顧私。匈奴猶未滅。安用以家爲。郢匠雖聞詔。衡門竟不移。寧煩張老頌。無待晏嬰辭。甲乙人徒費。親鄰我自持。悠悠千載下。長作帥臣師。

和元帥書記蕭郎中觀習水師

元帥樓船出治兵。落星山外火旗明。千帆日助江陵勢。萬里風馳下瀨聲。殺氣曉嚴波上鷁。凱歌遙駭海邊鯨。仲宣一作從軍詠。迴顧儒衣自不平。

秋日盧龍郵舍

置卻人間事，閑從野老游。樹聲村店晚，草色古城秋。獨鳥飛天外，閑雲度隴頭。姓名君莫問，山木與虛舟。

和蕭郎中小雪日作

征西府裏日西斜，獨試新爐自煮茶。籬菊盡來低覆水，塞鴻飛去遠連霞。寂寥小雪閑中過，班駁輕霜鬢上加。算得流年無奈處，莫將詩句祝蒼華。

中書相公谿亭閑宴依韻

李建勳

雨霽秋光晚，亭虛野興迴。沙鷗掠岸去，谿水上塔來。客傲風欹幘，筵香菊在盃。東山長許醉，何事憶天台。

寄饒州王郎中效李白禮

珍重王光嗣，交情尚在不。蕪城連宅住，楚塞並車游。別後官三改，年來歲六周。銀鈎無一字，何以緩離愁。

寄歙州呂判官

任公郡占好山川，谿水縈迴路屈盤。南國自來推勝境，故人此地作郎官。風光適意須留戀，祿秩資貧且喜歡。莫憶班行重迴首，是非多處是長安。

宣威苗將軍貶官後重經故宅

蔣山南望近西坊，亭館依然鏤院牆。天子未嘗過細柳，將軍尋已戍燉煌。史萬歲嘗謫戍燉煌欹傾怪石山無色，零落圓荷水不香。爲將爲儒皆寂寞，門前愁殺馬中郎。

附池州薛郎中書因寄歙州張員外

新安從事舊臺郎，直氣多才不可忘。一旦江山馳別夢，幾年簪紱共周行。岐分出處何方是，情共窮通此

義長。因附鄰州寄消息。接輿今日信爲狂。

寄江都路員外

吾兄失意在東都。聞說襟懷任所如。已縱乖慵爲傲吏。有何關鍵制豪胥。縣齋曉閉多移病。南畝秋荒憶遂初。知道故人相憶否。嵇康不得嬾修書。

張員外好茅山風景求爲句容令作此送之

句曲山前縣。依依數舍程。還同適勾漏。非是厭承明。柳谷供詩景。華陽契道情。金門容傲吏。官滿且還城。送應之道人歸江西

曾騎竹馬傍洪涯。二十餘年變物華。客夢等閑過驛閣。歸帆遙羨指龍沙。名題小篆矜垂露。詩作吳吟對綺霞。歲暮定知迴未得。信來憑爲寄梅花。

送元帥書記高郎中出爲婺源建威軍使

寒風蕭瑟楚江南。記室戎裝挂錦帆。倚馬未曾妨笑傲。斬牲先要厲威嚴。危言昔日嘗無隱。壯節今來信不凡。唯有盃盤思上國。酒醪甜淡菜蔬甘。

游方山宿李道士房

從來未面李先生。借我西廳臥月明。二十三家同願識。素驃何日暫還城。

題畫石山

彼美巉巖石。誰施黼藻功。回巖明照地。絕壁爛臨空。錦段鮮須濯。羅屏展易窮。不因秋薜綠。非假晚霞紅。

羽客藏書洞。樵人取箭風。靈蹤理難問。仙路去何通。返駕歸塵裏。留情向此中。迴瞻畫圖畔。遙羨面山翁。
臨石步港

病題二首

碕岸墜縈帶。微風起細漣。綠陰三月後。倒影亂峯前。吹浪游鱗小。黏苔碎石圓。會將腰下組。換取釣魚船。
性靈慵懶百無能。唯被朝參遣夙興。聖主優容恩未答。丹經疎闕病相陵。脾傷對客偏愁酒。眼暗看書每
媿燈。進與時乖不知退。可憐身計漫騰騰。
人閒多事本難論。況是人閒懶慢人。不解養生何怪病。已知命敢辭貧。向空咄咄煩書字。與世滔滔莫
問津。金馬門前君識否。東方曼倩是前身。

寄江州蕭給事

夕郎憂國不憂身。今向天涯作逐臣。魂夢暗馳龍闕曙。嘯吟閑繞虎谿春。朝車載酒過山寺。諫紙題詩寄
野人。惆悵儒夫何足道。自離羣後已同塵。

和江州江中丞見寄

賈傅南遷久。江關道路遙。北來空見鴈。西去不如潮。鼠穴依城社。鴻飛在次寥。高低各有處。不擬更相招。
和鍾郎中送朱先輩還京垂寄

分司洗馬無人問。辭客殷勤棹棹過。蒼蘚滿庭行徑小。高梧臨檻雨聲多。春愁盡付千盃酒。鄉思遙聞一
曲歌。且共勝遊消永日。西岡風物近如何。

送郝郎中爲浙西判官

大藩從事本優賢。幕府仍當北固前。花繞樓臺山倚郭。寺臨江海水連天。恐君到卽忘歸日。憶我遊會歷二年。若許他時作閑伴。殷勤爲買釣魚船。

翰林游舍人清明日入院中塗見過余明日亦入西省上直因寄游君

榆柳開新焰。梨花發故枝。輜輶隘城市。圭組坐曹司。獨對芝泥檢。遙憐白馬兒。禁林還視草。氣味兩相知。

陪王庶子游後湖涵虛閣東宮園

懸圃清虛乍過秋。看山尋水上茲樓。輕鷗的的飛難沒。紅葉紛紛晚更稠。風卷微雲分遠岫。浪搖晴日照中州。躋攀況有承華客。如在南皮奉勝遊。

柳枝辭十二首

把酒憑君唱柳枝。也從絲管遞相隨。逢春只合朝朝醉。記取秋風落葉時。南園日暮起春風。吹散楊花雪滿空。不惜楊花飛也得。愁君老盡臉邊紅。陌上朱門柳映花。簾鉤半捲綠陰斜。憑郎暫駐青驄馬。此是錢塘小李家。夾岸朱欄柳映樓。綠波平漫帶花流。歌聲不出長條密。忽地風迴見綵舟。老大逢春總恨春。綠楊陰裏最愁人。舊游一別無因見。嫩葉如眉處處新。濛濛堤畔柳含煙。疑是陽和二月天。醉裏不知時節改。漫隨兒女打鞦韆。水閣春來乍減寒。曉妝初罷倚闌干。長條亂拂春波動。不許佳人照影看。

柳岸煙昏醉裏歸。不知深處有芳菲。重來已見花飄盡。惟有黃鸝啼樹飛。
此去仙源不是遙。垂楊深處有朱橋。共君同過朱橋去。密映垂楊聽洞簫。
暫別揚州十度春。不知光景屬何人。一帆歸客千條柳。腸斷東風楊子津。
仙樂春來案舞腰。清聲偏似傍嬌嬈。應緣鸞舌多情賴。長向雙成說翠條。
鳳笙臨檻不能吹。舞袖當筵亦自疑。惟有美人多意緒。解衣芳態畫雙眉。

徐騎省集卷第二詩三

貶官秦州出城作

浮名浮利信悠悠。四海干戈痛主憂。三諫不從爲逐客。一身無累似虛舟。滿朝權貴皆曾忤。繞郭林泉已徧游。唯有戀恩終不改。半程猶自望城樓。

過江

別路知何極。離腸有所思。登艫望城遠。搖櫓過江遲。斷岸煙中失。長天水際垂。此心非橘柚。不爲兩鄉移。綸闈放逐知何道。桂苑風流且暫歸。莫問升遷橋上客。身謀疎拙舊心違。

經東都太子橋

贈維揚故人

東京少長認維桑。書劍誰教入帝鄉。一事無成空放逐。故人相見重淒涼。樓臺寂寞官河晚。人物稀疏驛路長。莫怪臨風惆悵久。十年春色憶維揚。

秦州道中卻寄東京故人

風緊雨淒淒。川迴岸漸低。吳州林外近。隋苑霧中迷。聚散紛如此。悲歡豈易齊。料君殘酒醒。還聽子規啼。得浙西郝判官書未及報聞燕王移鎮京口因寄此詩問方判官田書記消息

秋風海上久離居。曾得劉公一紙書。淡水心情長若此。銀鈎蹤迹更無如。嘗憂座側飛鴉鳥。未暇江中覓

鯉魚今日京吳建朱邸。問君誰共曳長裾。

贈陶使君求梨

昨宵宴罷醉如泥。惟憶張公大谷梨。白玉花繁曾綴處。黃金色嫩乍成時。冷侵肺腑醒偏早。香惹衣襟歇倍遲。今日中山方酒渴。唯應此物最相宜。

陳覺放還至泰州以詩見寄作此答之

朱雲曾爲漢家憂。不怕交親作世仇。壯氣未平空咄咄。狂言無驗信悠悠。今朝我作傷弓鳥。卻羨君爲不繫舟。勞寄新詩平宿憾。此生心氣貫清秋。

王三十七自京垂訪作此送之

失鄉遷客在天涯。門揜苔垣向水斜。只就鱗鴻求遠信。敢言車馬訪貧家。煙生柳岸將垂縷。雪壓梅園半是花。惆悵明朝尊酒散。夢魂相送到京華。

陶使君挽歌二首

太守今何在。行春去不歸。筵空收管吹。郊迴儼驂騑。營外星纔落。園中露已晞。傷心梁上鷺。猶解向人飛。始憶花前宴。笙歌醉夕陽。那堪城外送。哀挽逐歸艎。鈴閣朝猶閉。風亭日已荒。唯餘遷客淚。霑灑後池旁。

雪中作

賦分多情客。經年去國心。踈鐘寒郭晚。密雪水亭深。影迴鴻投渚。聲愁雀噪林。他鄉一尊酒。獨坐不成斟。

賦得風光草際浮

宿露依芳草。春郊古陌旁。風輕不盡偃。日早未暘陽。耿耿依平遠。離離入望長。映空無定彩。飄逕有餘光。颺若荷珠亂。紛如燭火颺。詩人多感物。凝思繞池塘。

寒食成判官垂訪因贈

常年寒食在京華。今歲清明在海涯。遠巷蹋歌深夜月。隔牆吹管數枝花。鴛鴦得路音塵闊。鴻鴈分飛道里賒。不是多情成二十。斷無人解訪貧家。

送客至城西望圖山因寄浙西府中

枚叟鄒生笑語同。莫嗟江上聽秋風。君看逐客思鄉處。猶在圖山更向東。

送寫真成處士入京

傳神踪跡本來高。澤畔形容魏彩毫。京邑功臣多佇望。凌煙閣上莫辭勞。

九日雨中

茱萸房重雨霏微。去國逢秋此恨稀。目極暫登臺上望。心遙長向夢中歸。荃蘂路遠愁霜早。兄弟鄉遙羨鴈飛。唯有多情一枝菊。滿盃顏色自依依。

寄外甥苗武仲

放逐今來漲海邊。親情多在鳳臺前。且將聚散爲閒事。須信榮枯是偶然。蟬噪疎林村倚郭。鳥飛殘照水連天。此中惟欠韓康伯。共對秋風詠數篇。

寄從兄憲兼示二弟

別路吳將楚，離憂弟與兄。斷雲驚晚吹，秋色滿孤城。信遠鴻初下，鄉遙月共明。一枝棲未穩，迴首望三京。

附書與鍾郎中因寄京妓越賓

暮春橋下手封書，海陵橋名寄向南江問越姑。不道諸郎少歡笑，經年相別憶儂無。

鍾代答

一幅輕綃寄海濱，越姑長感昔時恩。欲知別後情多少，點點憑君看淚痕。

亞元舍人不替深知猥貽佳作三篇清絕不敢輕酬因爲長歌聊以爲報未竟復得子喬校書示

問故兼寄陳君庶資一笑耳

海陵城裏春正月，海畔朝陽照殘雪。城中有客獨登樓，遙望天邊白銀闕。天帝以黃金白銀爲宮闕白銀闕下何英英。

雕鞍繡轂趨承明，闔門曉闕旌旗影。玉墀風細佩環聲，此處追飛皆俊彥。當年何事容疵賤，懷鉛畫坐紫

薇宮。焚香夜直明光殿，王言簡靜官司閒。朋好殷勤多往還，新亭風景如東洛。邛嶺林泉似北山，光陰暗

度盃盂裏。職業未妨談笑閒，有時邀賓復攜妓。造門不問都非是，酣歌叫笑驚四鄰。賦筆縱橫動千字，任

他銀箭轉更籌。不怕金吾詞夜吏，可憐諸貴賢且才。時情物望兩無猜，伊余獨稟狂狷性。褊量多言仍薄

命，吞舟可漏豈無恩。負乘自貽非不幸，一朝削跡爲遷客。旦暮青雲千里隔，離鴻別鴈各分飛。折柳攀花

兩無色。盧龍渡口問迷津，瓜步山前送暮春。去年三月三十日瓜步阻風白沙江上曾行路，青林花落何紛紛。漢皇昔

幸回中道，昇元中鳳駕東遊之路極目牛羊臥芳草。舊宅重遊盡隙荒，故人相見多衰老。禪智寺山光橋風瑟瑟兮

雨蕭蕭，行盃已醒殘夢斷。征途未極離魂消，海陵郡中陶太守。相逢本是隨行舊，乍申拜起已開眉。卻問

辛勤還執手，精廬水榭最清幽。一稅征車聊駐留，閉門思過謝來客。知恩省分寬離憂，郡齋勝境有後池。山亭茵閣互參差，有時虛左來相召。舉白飛觴任所爲，多才太守能搥鼓。醉送金船閒歌舞，酒酣耳熱眼生花。暫似京華歡會處，歸來旅館還端居。清風朗月夜牕虛，駉駉流景歲云暮。天涯望斷故人書，春來憑檻方歎息。仰頭忽見南來翼，足繫紅牋墮我前。引頸長鳴如有言，開緘試讀相思字。乃是多情喬亞元，短韻三篇皆麗絕。小梅寄意情偏切，亞元詩云借問小梅應得信。春風新自海邊來，此篇尤嘉。金蘭投分一何堅。銀鈎置袖終難滅，醉後狂言何足奇。感君知己不相遺，長卿曾作美人賦。玄成今有責躬詩，鉉去春醉中贈醉妓長歌，酷爲喬所賞來篇所引，故以謝之。報章欲託還京信，筆拙紙窮情未盡。珍重芸香陳子喬，亦解貽書遠相問。寧須買藥療羈愁，只恨無書消鄙吝。子喬問藥物所要，又問置新書故有此句。游處當時靡不同，歡娛今日兩成空。天子尙應憐賈誼，時人未要嘲揚雄。曲終筆閣緘封已，翩翾驛騎行塵起。寄向中朝謝故人，爲說相思意如此。

送蒯司錄歸京

早年聞有蒯先生，二十餘年道不行。抵掌曾論天下事，折腰猶悟俗人情。老還上國歡娛少，貧聚歸資結束輕。遷客臨流倍惆悵，冷風黃葉滿山城。

聞查建州陷賊寄鍾郎中諫卽查從事也

聞道將軍輕壯圖，螺江城下委犀渠。旌旗零落沈荒服，簪履蕭條返故居。皓首應全蘇武節，故人誰得李陵書。自憐放逐無長策，空使盧諶淚滿裾。

還過東都留守周公筵上贈座客

賈生三載在長沙。故友相思道路賒。已分終年甘寂寞。豈知今日返京華。麟符上相恩偏厚。隋苑留歡日欲斜。明旦江頭倍惆悵。遠山芳草映殘霞。

送楊郎中唐員外奉使湖南

江邊微雨柳條新。握節含香二使臣。兩綬對懸雲夢日。方舟齊汎洞庭春。今朝草木逢新律。昨日山川滿戰塵。同是多情懷古客。不妨爲賦弔靈均。

表弟包穎見寄此子侍親在饒州累年臥病

常思帝里奉交親。別後光陰屈指頻。蘭佩卻歸綸閣下。荆枝猶寄楚江濱。十程山水勞幽夢。滿院煙花醉別人。料得此生強健在。會須重賞昔年春。

和

平生中表最情親。浮世那堪聚散頻。謝朓卻吟歸省閣。劉楨猶自臥漳濱。舊游半似前生事。要路多逢後進人。且喜新吟報強健。明年相望杏園春。

寄蕭給事蕭江西致仕

危言危行古時人。歸向西山臥白雲。買宅尙尋徐處士。餐霞終訪許眞君。容顏別後應如故。詩詠年來更不聞。今日城中春又至。落梅愁緒共紛紛。

送鍾員外詩序

歲辛亥冬十月。天子命吾友德林爲東府亞尹。太弟諭德蕭君。泊諸客餞於石頭城。雲日蒼茫。園林搖落。

尊酒將竭，征帆欲飛。處者眷眷而不能迴，行者遲遲而不忍去。煙生景夕，風靜江平。君子曰：公足以減私子，當促棹，詩所以言志。我當分題，故以風月松竹山石寄情於贈別云爾。兵部員外郎知制誥徐鉉序。

賦石奉送德林少尹員外

鉉上

我愛他山石，中含絕代珍。煙披寒落落，沙淺靜磷磷。翠色辭文陛，清聲出泗濱。扁舟載歸去，知是汎槎人。

賦月 蕭叟上

麗漢金波滿，當筵玉斝傾。因思頻聚散，幾復換虧盈。光徹離襟冷，聲符別管清。那堪還目此，兩地倚樓情。

賦竹 孫峴上

萬物中蕭灑，修篁獨逸羣。貞姿曾冒雪，高節欲凌雲。細韻風初發，濃煙日正曛。因題偏惜別，不可暫無君。

賦松 謝仲宣上

送人多折柳，唯我獨吟松。若保歲寒在，何妨霜雪重。森梢逢靜境，廓落見孤峯。還似君高節，亭亭豈繼蹤。

賦風 王沂上

靜追蘋末興，況復值蕭條。猛勢資新鴈，寒聲伴暮潮。過山雲散亂，經樹葉飄飄。今日煙江上，征帆望望遙。

賦山別諸知己 鍾蒨上

暮景江亭上，雲山日望多。只愁辭輦轂，長恨隔嵯峨。有意圖功業，無心憶薜蘿。親朋將遠別，且共醉笙歌。

贈泰州掾令狐克已 文公會孫

念子才多命且奇，亂中拋擲少年時。深藏七澤衣如雪，卻見中朝鬢似絲。舊德在人終遠大，扁舟爲吏莫

推辭。孤芳自愛凌霜處。詠取文公白菊詩。

送荻栽與秀才朱觀

羨子清吟處。茅齋面碧流。解憎蓮豔俗。唯欠荻花幽。鷺立低枝晚。風驚折葉秋。贈君須種取。不必樹忘憂。

使浙西先寄獻燕王侍中

京江風靜喜乘流。極目遙瞻萬歲樓。喜氣龍蔥甘露晚。水煙波淡海門秋。五年不見鸞臺長。明日將陪兔苑遊。欲問平臺門下吏。相君還許吐茵不。

常州驛中喜雨

颯颯旱天雨。涼風一夕廻。遠尋南畝去。細入驛亭來。蓑唱牛初牧。漁歌棹正開。盈庭頓無事。歸思酌金罍。

驛中七夕

七夕雨初霽。行人正憶家。江天望河漢。水館折蓮花。獨坐涼何甚。微吟月易斜。今年不乞巧。鈍拙轉堪嗟。

贈浙西顧推官

盛府賓寮八十餘。閉門高臥興無如。梁王苑裏相逢早。潤浦城中得信疎。狼籍盃盤重會面。風流才調一如初。願君百歲猶強健。他日相尋隱士廬。

贈浙西妓亞仙筵上作

翠黛嚙如怨。朱顏醉更春。占將南國貌。惱殺別家人。粉汗沾巡盞。花鈿逐舞茵。明朝綺牕下。離恨兩般勤。

迴至瓜洲獻侍中

紫薇垣裏舊賓從。來向吳門謁府公。奉使謬持嚴助節。登門初識魯王宮。笙歌隱隱遠離後。煙水茫茫悵望中。日暮瓜洲江北岸。兩行清淚滴西風。

邵伯埭下寄高郵陳郎中

故人相別動經年。候館相逢倍慘然。顧我飲冰難輟棹。感君扶病爲開筵。河灣水淺翹愁鷺。柳岸風微噪暮蟬。欲識酒醒魂斷處。謝公祠畔客亭前。

謫居舒州累得韓高二舍人書作此寄之

三峯煙靄碧臨谿。中有騷人理釣絲。會友少于分袂日。謫居多卻在朝時。丹心歷歷吾終信。俗慮悠悠爾不知。珍重韓君與高子。殷勤書札寄相思。舒人以潛皖天柱爲三峯

和張先輩見寄二首

去國離羣擲歲華。病容憔悴媿丹沙。谿連舍下衣長潤。山帶城邊日易斜。幾處垂鉤依野岸。有時披褐到鄰家。故人書札頻相慰。誰道西京道路賒。

清時淪放在山州。筇杖紗巾處處游。野日蒼茫悲鷓鴣。舍水風陰溼弊貂裘。雞鳴候旦寧辭晦。松節凌霜幾換秋。兩首新詩千里道。感君情分獨知邱。

印秀才至舒州見尋別後寄詩依韻和之

羈游白社身雖屈。高步辭場道不卑。投分共爲知我者。相尋多媿謫居時。離懷耿耿年來夢。厚意勤勤別後詩。今日谿邊正相憶。雪晴山秀柳絲垂。

行園樹

松節凌霜久。蓬根逐吹頻。羣生各有性。桃李但爭春。

題雷公井

揜竊愚公谷。蕭寥羽客家。俗人知處所。應爲有桃花。

送彭秀才

賈生去國已三年。短褐閑行皖水邊。盡日野雲生舍下。有時京信到門前。無人與和投湘賦。媿子來浮訪戴船。滿袖新詩好。迴去莫隨騷客醉林泉。

移饒州別周使君

正憐東道感賢侯。何幸南冠脫楚囚。皖伯臺前收別宴。喬公亭下艤行舟。四年去國身將老。百郡徵兵主尙憂。更向鄱陽湖上去。青衫憔悴淚交流。

避難東歸依韻和黃秀才見寄

感感逢人問所之。東流相送向京畿。自甘逐客組蘭佩。不料平民著戰衣。樹帶荒村春冷落。江澄霽色霧霏微。時危道喪無才術。空手徘徊不忍歸。

謝郭先輩

太原郭夫子。行高文炳蔚。弱齡負世譽。一舉游月窟。及我竄羣舒。向風心鬱鬱。歸來暮江上。雲霧一披拂。雷雨不下施。猶作池中物。念君介然氣。感時思奮發。示我數篇文。與古爭馳突。綵緝粲英華。理深刮肌骨。

古詩尤精奧。史論皆宏拔。舉此措諸民。何憂民不活。吁嗟吾道薄。與世長迂闊。顧我徒有心。數奇身正拙。論兵屬少年。經國須儒術。夫子無自輕。蒼生正愁疾。

和集賢鍾郎中

石渠冊府神仙署。當用明朝第一人。腰下別懸新印綬。座中皆是故交親。龍池樹色供清景。浴殿香風接近鄰。從此鸞飛應更遠。徧尋三十六天春。

送劉山陽

舊族知名士。朱衣宰楚城。所嗟吾道薄。是豈主恩輕。戰鼓何時息。儒冠獨自行。此心多感激。相送若爲情。

題伏龜山北隅

茲山信岑寂。陰崖積蒼翠。水石何必多。宛有千巖意。孰知近人境。且暮含佳氣。池影搖輕風。林光澹新霽。支頤藉芳草。自足忘世事。未得歸去來。聊爲宴居地。

送黃梅江明府江前爲江夏令有善政今更宰小邑賦詩留別作此和之

封疆多難正經綸。臺閣如何不用君。江上又勞爲小邑。篋中徒自有雄文。書生膽氣人誰信。遠俗歌謠主不聞。一首新詩無限意。再三吟咏向秋雲。

詠梅子真送郭先輩

忠臣本愛君。仁人本愛民。寧知貴與賤。豈計名與身。梅生爲一尉。獻疏來君門。君門深萬里。金虎重千鈞。向永且不用。劉向谷永況復論子真。拂衣遂長往。高節邈無鄰。至今仙籍中。謂之梅真人。郭生負逸氣。百代繼

遺塵進退生自知。得喪吾不陳。斯民苟有幸。期子一朝伸。

和蕭郎中午日見寄

細雨輕風采藥時。褰簾隱几更何爲。豈知澤畔紉蘭客。來赴城中角黍期。多罪靜思如剉藥。敎書纔聽似含飴。謝公制勝常閒暇。願接西州敵手碁。

送黃秀才姑孰辟命

世亂離情苦。家貧色養難。水雲孤棹去。風雨暮春寒。幕府才方急。騷人淚未乾。何時王道泰。萬里看鵬搏。

送王四十五歸東都

海內兵方起。離筵淚易垂。憐君負米去。惜此落花時。想憶看來信。相寬指後期。殷勤手中柳。此是向南枝。

和太常蕭少卿近郊馬上偶吟

田園經雨綠分畦。飛蓋閑行九里堤。拂袖清風塵不起。滿川芳草路如迷。林開始覺晴天迥。潮上初驚浦岸齊。怪得仙郎詩句好。斷霞殘照遠山西。

又和

抱甕何人灌藥畦。金銜爲爾駐平堤。村橋野店景無限。綠水晴天思欲迷。橫笛乍隨輕吹斷。歸帆疑與遠山齊。鳳城廻望真堪畫。萬戶千門蔣嶠西。

拋毬樂辭二首

歌舞送飛毬。金觥碧玉籌。管弦桃李月。簾幕鳳凰樓。一笑千場醉。浮生任白頭。

灼灼傅花枝。紛紛度畫旗。不知紅燭下。照見彩毬飛。借勢因期尅。巫山暮雨歸。

離歌辭五首

莫折紅芳樹。但知盡意看。狂風幸無意。那忍折教殘。
朝日城南路。旌旗照綠蕪。使君何處去。桑下覓羅敷。
事與年俱往。情將分共深。莫驚容鬢改。只是舊時心。
暫別勞相送。佳期願莫違。朱顏不須老。留取待郎歸。
拂匣收珠佩。迴燈拭薄粧。莫嫌春夜短。匹似楚襄王。

夢游三首

魂夢悠揚不奈何。夜來還在故人家。香灤蠟燭時時暗。戶映屏風故故斜。檀的慢調銀字管。雲鬢低綴折
枝花。天明又作人閒別。洞口春深道路賒。
繡幌銀屏杳靄閒。若非魂夢到應難。牕前人靜偏宜夜。戶內春濃不識寒。蘸甲遞觴纖似玉。含詞忍笑膩
於檀。錦書若要知名字。滿縣花開不姓潘。
南國佳人字玉兒。芙蓉雙臉遠山眉。仙郎有約長相憶。阿母無猜不得知。夢裏行雲還倏忽。暗中攜手乍
疑遲。因思別後閒牕下。織得迴文幾首詩。

徐騎省集卷第四 詩四

和蕭少卿見慶新居

湘浦懷沙已不疑。京城賜第豈前期。鼓聲到晚知坊遠。山色來多與靜宜。簪履尙應憐故物。稻梁空自媿華池。新詩問我偏饒思。還念鷓鴣得一枝。

又和

驚蓬偶駐知多幸。斷鴈重聯愜素期。當戶小山如舊識。上牆幽蘚最相宜。清風不去因栽竹。隙地無多也鑿池。更喜良鄰有嘉樹。綠陰分得近南枝。

送勳道人之建安

下國兵方起。君家義獨聞。若爲輕世利。歸去臥溪雲。挂席衝嵐翠。攜筇破蘚紋。離情似霜葉。江上正紛紛。

送許郎中歙州判官兼黟縣

嘗聞黟縣似桃源。況是優游冠玳筵。遺愛非遙應臥理。許嘗宰涇縣祖風猶在好尋仙。許宣平黟人得道朝衣舊識熏香吏。祿米初營種秫田。大底宦游須自適。莫辭離別二三年。

送彭秀才南游

問君孤棹去何之。玉筍春風楚水西。山上斷雲分翠靄。林間晴雪入澄溪。琴心酒趣神相會。道士仙童手共攜。他日時清更隨計。莫如劉阮洞中迷。

和明上人除夜見寄

酌酒圍爐久，愁襟默自增。長年逢歲暮，多病見兵興。夜色開庭燎，寒威入硯冰。湯師無別念，吟坐一燈凝。

正初和鄂州邊郎中見寄

潦倒含香客，淒涼賦鵬人。未能全卷舌，終擬學垂綸。故友暌離久，音書問訊頻。相思俱老大，又見一年新。

送劉司直出宰

之子有雄文，風標秀不羣。低飛從墨綬，逸志在青雲。柳色臨流動，春光到縣分。賢人多靜理，未爽醉醺醺。

送從兄赴臨川幕

梁王籍寵就東藩，還召鄒枚坐兔園。今日好論天下事，昔年同受主人恩。石頭城下春潮滿，金柅亭邊綠樹繁。唯有音書慰離別，一杯相送別無言。

送龔員外赴江州幕

煩君更上築金臺，世難民勞藉俊才。自有聲名馳羽檄，不妨談笑奉罇罍。元規樓迴清風滿，匡俗山春畫障開。莫忘故人離別恨，海潮迴處寄書來。

送朱先輩尉廬陵

我重朱夫子，依然見古人。成名無媿色，得祿及慈親。莫歎官資屈，寧論活計貧。平生心氣在，終在靜邊塵。

送德林郎中學士赴東府詩序

德林始以才術優贍，入參近司，旋以地望清雅，寵登書殿。會東畿克復，上以君有遺愛於淮海之都，故輟

侍從之班。攝尹正之任。吾一二親友。共能行舟。鉉也不才。請以言贈。理大國若烹小鮮。言不可撓之也。況亂後乎。德林當本仁守信。體寬務斷。大兵之後。民各思父。聽其自理。任其自營。爲之上者。導其蒙。遏其淫而已。示之以聰明。則民益迷。拘之以禁令。則民重困。棄仁則吏暴。失信則衆惑。急則民傷。不斷則民懈。慎此四者。何往而不臧。噫嘻。吾黨皆忘形者也。平生以來。胥會者幾何。思當雞犬相聞。舟輿不接。開口而笑。攜手而遊。在吾輩勉之而已。忘身殉國。急病讓夷。德林此行。宜減離戀。盍各賦一物以爲贈乎。九月十七日序。

得江 奉送德林郎中學士 喬舜上

摻袂向江頭。朝宗勢未休。何人乘桂楫。之子過揚州。颯颯翹沙鴈。漂漂逐浪鷗。欲知離別恨。半是淚和流。

得酒 徐鉉上

酌此杯中物。茱萸滿把秋。今朝將送別。他日是忘憂。世亂方多事。年加易得愁。政成頻一醉。亦未減風流。

得菊 蕭叟上

離情折楊柳。此別異春哉。含露東籬豔。汎香南浦杯。惜持行次贈。留插醉中迴。暮齒如能制。玉山甘判頽。

得遠山 徐鍇上

瓜步妖氛滅。崑岡草樹清。終朝空極望。今日送君行。報政秋雲靜。微吟曉月生。樓中長可見。持用減離情。

得水 陳元裕上

上善湛然秋。恩波洽帝猷。謾言生險浪。豈爽見安流。汎去星槎遠。澄來月練浮。滔滔對離酌。入洛稱仙舟。

得新鴻別諸同志

鍾蒨上

隨陽來萬里，點點度遙空。影落長江水，聲悲半夜風。殘秋辭絕漠，無定似驚蓬。我有離羣恨，飄飄類此鴻。

送陳先生之洪并寄蕭少卿

聞君仙袂指洪涯，我憶情人別路賒。知有歡娛遊楚澤，更無書札到京華。雲開驛閣連江靜，春滿西山倚漢斜。此處相逢應見問，爲言搔首望龍沙。

送龔明府九江歸寧

茂宰隳官去，扁舟着綵衣。湓城春酒熟，匡阜野花稀。解纜垂楊綠，開帆宿鷺飛。一朝吾道泰，還逐落潮歸。

和江西蕭少卿見寄二首

亡羊岐路媿司南，二紀窮通聚散三。老去何妨從笑傲，病來看欲嬾朝參。離腸似線常憂斷，世態如湯不可探。珍重加飡省思慮，時時斟酒壓山嵐。

身遙上國三千里，名在朝中二十春。金印不須辭入幕，麻衣曾此嘆迷津。卷舒由我真齊物，憂喜忘心卽養神。世路風波自翻覆，虛舟無計得沉淪。

送薛少卿赴青陽

我愛陶靖節，吏隱從弦歌。我愛費徵君，高臥歸九華。清風激頰波，來者無以加。我志兩不遂，漂淪浩無涯。數奇時且亂，此圖今愈賒。賢哉薛夫子，高舉凌晨霞。安民卽是道，投足皆爲家。功名與權位，悠悠何用誇。攜朋出遠郊，酌酒藉平沙。雲收遠天靜，江闊片帆斜。離懷與企羨，南望長咨嗟。

送高起居之涇縣

右史罷朝歸。之官句水涓。別我行千里。送君傾一卮。酒罷長嘆息。此嘆君應悲。亂中吾道薄。鄉族舊人稀。胡爲佩銅墨。去此白玉墀。吏事豈所堪。民病何可醫。藏用清其心。此外慎勿爲。縣郭有佳境。千峯谿水西。雲樹杳迴合。巖巒互蔽虧。彈琴坐其中。世事吾不知。時時寄書札。以慰長相思。

宿茅山寄舍弟

茅許稟靈氣。一家同上賓。仙山空有廟。舉世更無人。獨往誠違俗。浮名亦累真。當年各自勉。雲洞鎮長春。晚憩白鶴廟。寄句容張少府。

題紫陽觀

日入林初靜。山空暑更寒。泉鳴細巖竇。鶴唳眇雲端。拂榻安碁局。焚香戴道冠。望君殊不見。終夕凭欄干。南朝名士富仙才。追步東鄉遂不迴。丹井自深桐暗老。祠宮長在鶴頻來。巖邊桂樹攀仍倚。洞口桃花落復開。惆悵霓裳太平事。一函真跡鎖昭臺。

贈奚道士含象

奚生曾有洞天期。猶傍天壇摘紫芝。處世自能心混沌。全真誰見德支離。玉霄塵閉人長在。金鼎功成俗未知。他日鸞輪謁茅許。願同雞犬去相隨。

題碧巖亭贈孫尊師

絕境何人識。高亭萬象含。凭軒臨樹杪。送目極天南。積竄生泉洞。歸雲鎖石龕。丹霞披翠巘。白鳥帶晴嵐。

仙去留虛室。龍歸漲碧潭。幽巖君獨愛。玄味我曾耽。世上愁何限。人間事久諳。終須脫羈鞅。來此會空談。

題白鶴廟

平生心事向玄關。一入仙鄉似舊山。白鶴唳空晴渺渺。丹砂流澗暮潺潺。嘗嗟多病嫌中藥。擬問真經乞小還。滿洞烟霞互陵亂。何峯臺榭是蕭閑。

步虛詞五首

氣爲還元正。心由抱一靈。凝神歸罔象。飛步入青冥。整服乘三素。旋綱躡九星。瓊章開後學。稽首奉真經。天帝黃金闕。真人紫錦書。霓裳紛蔽景。羽服迴陵虛。白鶴能爲使。斑麟解駕車。靈符終願借。轉共世情疎。聖主過幽谷。虛皇在蕊宮。五千宗物母。七字祕神童。世上金壺遠。人間玉籥空。唯餘養身法。修此與天通。何處求玄解。人間有洞天。勤行皆是道。謫下尙爲仙。蔽景乘朱鳳。排虛駕紫烟。不嫌園吏傲。願在玉宸前。三素靠霏遠。盟威凜凜寒。火鈴空滅沒。星斗曉闌干。佩響流虛殿。爐烟在醮壇。蕭寥不可極。驂駕上雲端。

留題仙觀

瑤壇醮罷晚雲開。羽客分飛俗士迴。爲報移文不須勒。未曾游處待重來。

和陳洗馬山莊新泉

已開山館待抽簪。更要巖泉欲洗心。常被松聲迷細韻。忽流花片落高岑。便疏淺瀨穿沙徑。始有清光映竹林。何日煎茶醞香酒。沙邊同聽暝猿吟。

奉和七夕應令

今宵星漢共晶光。應笑羅敷嫁侍郎。斗柄易傾離恨促。河流不盡後期長。靜聞天籟疑鳴佩。醉折荷花想豔粧。誰見宣猷堂上宴。一篇清韻振金鑪。

又和八日

微雲疎雨淡新秋。曉夢依稀十二樓。故作別離應有以。擬延更漏共無由。那教人世長多恨。未必天仙不解愁。博望苑中殘酒醒。香風佳氣獨遲留。

和印先輩及第後獻座主朱舍人郊居之作

成名郊外揜柴扉。樹影蟬聲共息機。積雨暗封青蘚徑。好風輕透白練衣。嘉魚始賦人爭誦。荆玉頻收國自肥。獨坐公廳正煩暑。喜吟新詠見玄微。印以南有嘉魚賦及第

和致仕張尚書新創道院

梓澤成新致。金丹有舊情。挂冠朝睡足。隱几暮江清。藥圃分輕綠。松牕起細聲。養高寧厭病。默坐對諸生。尚書時有瘖疾

和尉遲贊善秋暮僻居

登高節物最堪憐。小嶺疎林對檻前。輕吹斷時雲縹緲。夕陽明處水澄鮮。江城秋早催寒事。望苑朝稀足晏眠。庭有菊花鱗有酒。若方陶令媿前賢。

和陳贊善致仕還京口

海門山下一漁舟。中有高人未白頭。已駕安車歸故里。尚通閨籍在龍樓。泉聲漱玉牕前落。江色和煙檻

外流。今日君臣厚終始。不須辛苦畫雙牛。

京使迴自臨川得從兄書寄詩依韻和

珍重還京使。殷勤話故人。別離長挂夢。寵祿不關身。趣向今成道。聲華舊絕塵。莫嗟容鬢老。詩句逐時新。

陪鄭王相公賦簷前垂冰應教依韻

牕外虛明雪乍晴。簷前垂露盡成冰。長廊瓦疊行行密。晚院風高寸寸增。玉指乍拈簪尚媿。金階時墜磬難勝。晨飡堪醒曹參酒。自恨空腸病不能。

送禮部潘尚書致仕還建安

名遂功成累復輕。鱸魚因起舊鄉情。履聲初下金華省。帆影看離石首城。化劍津頭尋故老。同亭會上問仙卿。冥鴻高舉真難事。相送何須淚滿纓。

和尉遲贊善病中見寄

仙郎移病暑天過。卻似冥鴻避爵羅。晝夢乍驚風動竹。夜吟時覺露霑莎。情親稍喜貧居近。性懶猶嫌上直多。望苑恩深期勿藥。青雲岐路未蹉跎。

池州陳使君見示游齊山詩因寄

往歲曾遊弄水亭。齊峯濃翠暮軒橫。哀猿出檻心雖喜。傷鳥聞弦勢易驚。病後簪纓殊寡興。老來泉石倍關情。今朝池口風波靜。遙賀山前有頌聲。

再領制誥和王明府見賀

蹇步還依列宿邊。拱辰重認舊雲天。自嗟多難飄零困，不似當年膽氣全。雞樹晚花疎向日，龍池輕浪細含煙。從來不解爲身計，一葉悠悠任大川。

送高舍人使嶺南

西掖官曹近，南溟道路遙。使星將渡漢，仙棹乍乘潮。柳映靈和折，梅依大庾飄。江帆風淅淅，山館雨蕭蕭。陸賈真迂闊，終軍久寂寥。送君何限意，把酒一長謠。

和王明府見寄

時情世難消，吾道薄宦流。年厄此身莫，嘆京華同寂寞。曾經兵革共漂淪，對山開戶唯求靜。貰酒留賓不道貧，善政空多尙淹屈。不知誰是解憂民。

和方泰州見寄

逐客栖栖重入京，舊愁新恨兩難勝。雲收楚塞千山雪，風結秦淮一尺冰。置醴筵開情豈盡，投湘文就思如凝。更殘月落知孤坐，遙望船牕一點星。

文獻太子挽歌辭五首

國有承祧重，人知秉哲尊。清風來望苑，遺烈在東藩。此日升緱嶺，何因到寢門。天高不可問，煙靄共昏昏。夏啓吾君子，周儲上帝賓。音容一飄忽，功業自紛綸。露泣承華月，風驚麗正塵。空餘商嶺客，行哭下宜春。出處成交讓，經綸有大功。淚碑瓜步北，棠樹蒜山東。百揆方時敍，重離遂不融。故臣偏感咽，曾是嘆三窮。甲觀光陰促，園陵天地長。簫笳咽無韻，賓御哭相將。盛烈傳彝鼎，遺文被樂章。君臣知己分，零淚亂無行。

綵仗清晨出，非同齒冑時。愁烟鑱平甸，朔吹繞寒枝。楚客來何補，緱山去莫追。迴瞻飛蓋處，揜袂不勝悲。

送王員外宰德安

家世朱門貴，官資粉署優。今爲百里長，應好五峯游。柳影連彭澤，湖光接庾樓。承明須再入，官滿莫淹留。

以端谿硯調張員外水精珠兼和來篇

請以端谿潤，醜君水玉明。方圓雖異器，功用信俱呈。自得山川秀，能分日月精。巾箱各珍重，所貴在交情。

奉使九華山中途遇青陽薛郎中

故人相別動相思，此地相逢豈素期。九子峯前閑未得，五谿橋上坐多時。甘泉從幸余知忝，宣室徵還子未遲。且飲一杯消別恨，野花風起便離披。

奉命南使經彭澤值王明府不在留此

遠使程途未一分，離心常要醉醺醺。那堪彭澤門前立，黃菊蕭疎不見君。

南都遇前嘉魚劉令言遊閩嶺作此與之

我持使節經韶石，君作閑遊過武夷。兩地山光成獨賞，隔年鄉思暗相知。洪涯壇上長岑寂，孺子亭前自別離。珍重分岐一杯酒，強加滄飴數吟詩。

閣阜山

殿影高低雲揜映，松陰繚繞步徘徊。從今莫厭簪裾累，不是乘輅不得來。

玉笥山留題

仙鄉會應遠。王事知何極。征傳莫辭勞。玉峯聊一息。形骸已銷散。心想都凝寂。真氣自清虛。非關好松石。九仙皆積學。洞壑多遺跡。遊子歸去來。胡爲但征役。

廬陵別朱觀先輩

桂籍知名有幾人。飄飛相續上青雲。解憐才子寧唯我。遠作卑官尙見君。嶺外獨持嚴助節。宮中誰薦長卿文。新詩試爲重高詠。朝漢臺前不可聞。

文或少卿文山郎中交好深。至二紀已餘。睽別數年。二子長逝。奉使嶺表。塗次南康。弔孫氏之孤。

於其家觀文或少卿手書於僧室慷慨悲歎留題此詩

孫家虛座弔諸孤。張叟僧房見手書。二紀歡游今若此。滿衣零淚欲何如。腰間金印從如斗。鏡裏霜華已滿梳。珍重遠公應笑我。塵心唯此未能除。

朱處士相與有山水之願。見送至南康。作此以別之。

憐君送我至南康。更憶梅花庾嶺芳。多少仙山共遊在。願君百歲尙康強。

清明日清遠峽作

嶺外春過半。塗中火又新。殷勤清遠峽。留戀北歸人。

迴至南康題紫極宮裏道士房

王事信靡盬。飲冰安足辭。胡爲擁征傳。乃至天南陲。天南非我鄉。留滯忽踰時。還經羽人家。豁若雲霧披。何以寬我懷。老莊有微詞。達士無不可。至人豈偏爲。客愁勿復道。爲君吟此詩。

和歙州陳使君見寄

新安風景好。時令肅轅門。身貴心慵下。功多口不言。韜鈴家法在。儒雅素風存。簪履陪游盛。鄉閭俗化敦。臨牕山色秀。繞郭水聲喧。織絡文章麗。矜嚴道義尊。樓臺秋月靜。京庾晚雲屯。曉吹傳衙鼓。晴陽展信旛。一篇貽友好。千里倍心論。未見歸驂動。空能役夢魂。

和賈員外戩見贈玉蘂花栽

瓊瑤一簇帶花來。便斲蒼苔手自栽。喜見唐昌舊顏色。爲君判病酌金盃。

光穆皇后挽歌三首

仙馭期難改。坤儀道自光。闕宮新表德。沙麓舊膺祥。素帟堯門揜。凝笳畢陌長。東風慘陵樹。無復見親桑。永樂留虛位。長陵啓夕扉。返虞嚴甲仗。復土揜空衣。功業投三母。光靈極四妃。唯應彤史在。不與露花晞。隱隱闔門路。煙雲曉更愁。空瞻金輅出。非是濯龍游。德感人倫正。風行內職修。還隨偶物化。同此畏軒丘。

嚴相公宅牡丹

但是豪家重牡丹。爭如丞相閣前看。鳳樓日暖開偏早。雞樹陰濃謝更難。數朵已應迷國豔。一枝何幸上塵冠。不知更許憑欄否。爛熳春光未肯殘。

侍宴賦得歸鴈

夜靜羣動息。翩翩一鴈歸。清音天際遠。寒影月中微。何處雲同宿。長空雪共飛。陽和常借使。免與素心違。

又賦早春書事

苑裏芳華早。皇家勝事多。弓聲達春氣。奕思養天和。煖酒紅爐火。浮舟綠水波。雪晴農事起。擊壤聽唐歌。

薔薇詩一首十八韻呈東海侍郎太尉中書令鄭王從善

綠影覆幽池。芳菲四月時。管絃朝夕興。組繡百千枝。盛引牆看徧。高煩架屢移。露輕濡綵筆。蜂誤拂吟髭。日照玲瓏幔。風搖翡翠帷。早紅飄薜地。狂蔓挂蛛絲。嫩刺牽衣細。新條宰草垂。晚香難暫捨。嬌態自相窺。深淺分前後。容華互盛衰。罇前留客久。月下欲歸遲。何處繁臨砌。誰家密映籬。絳羅房燦爛。碧玉葉參差。分得殷勤種。開來遠近知。晶熒歌袖袂。柔弱舞腰支。膏麝誰將比。庭賞自合嗤。勻粧低水鑑。泣淚滴煙霏。畫擬憑梁廣。名宜亞楚姬。寄君十八韻。思拙媿新奇。

依韻和令公大王薔薇詩

綠樹成陰後。羣芳稍歇時。誰將新濯錦。挂向最長枝。卷箔香先入。凭欄影任移。賞頻嫌酒渴。吟苦怕霜髭。架迴籠雲幄。庭虛展繡帷。有情縈舞袖。無力冒遊絲。嫩葉鶯偷采。柔條柳伴垂。荀池波自照。梁苑客嘗窺。玉李尋皆謝。金桃亦暗衰。花中應獨貴。庭下故開遲。委豔粧苔砌。分華借槿籬。低昂勻灼爍。濃淡疊參差。幸植王宮裏。仍逢宰府知。芳心向誰許。醉態不能支。芍藥天教避。玫瑰衆共嗤。光明烘晝景。潤膩裊輕霏。麗似期神女。珍如重衛姬。君王偏屬詠。七子盡搜奇。

和門下殷侍郎新茶二十韻

暖吹入春園。新芽競粲然。才教鷹觜拆。未放雪花妍。荷杖青林下。攜筐旭景前。採茶須在日未出前。孕靈資雨露。鍾秀自山川。碾後香彌遠。烹來色更鮮。名隨土地貴。味逐水泉遷。力藉流黃暖。形模紫筍圓。茶之美者有圓捲紫筍。正

當鑽柳火。遙想湧金泉。陽羨茶山有金任道時新物。須依古法煎。輕甌浮綠乳。孤竈散餘煙。甘薺非子匹。
宮槐讓我先。槐芽亦竹孤空冉冉。荷弱謾田田。解渴消殘酒。清神減夜眠。十漿何足饋。百榼盡堪捐。采擷
唯憂晚。營求不計錢。任公因焙顯。陸氏有經傳。愛甚真成癖。嘗多合得仙。亭臺虛靜處。風月豔陽天。自可
臨泉石。何妨雜管絃。東山似蒙頂。願得從諸賢。

徐騎省集卷第五

春雪應制

繁陰連曙景。瑞雪灑芳辰。勢密猶疑臘。風和始覺春。繁林開玉蘂。飄座裊香塵。欲識宸心悅。雲謠慰兆人。

進雪詩

欲使新正識有年。故飄輕絮伴春還。近看瓊樹籠銀闕。遠想瑤池帶玉關。潤逐麴麩鋪綠野。暖隨杯酒上朱顏。朝來花萼樓中宴。數曲賡歌雅頌閒。

自題山亭三首

簪組非無累。園林未是歸。世喧長不到。何必故山薇。小舫行乘月。高齋臥看山。退公聊自足。爭敢望長閑。跂石仍臨水。披襟復挂冠。機心忘未得。碁局與魚竿。

和陳表用員外求酒

暑天頻雨亦頻晴。簾外閑雲重復輕。珍重一壺酬絕唱。向風遙想醉吟聲。

奉和右省僕射西亭高臥作

院靜蒼苔積。庭幽怪石欹。蟬聲當檻急。虹影向簷垂。晝漏猶憐永。叢蘭未覺衰。疎篁巢翡翠。折葦覆鷗鷺。對酒襟懷曠。園基旨趣遲。景皆隨所尚。物各遂其宜。道與時相會。才非世所羈。賦詩貽座客。秋事爾何悲。

憶新淦觴池寄孟賓于員外

往年淦水駐行軒，引得清流似月圓。自有谿光還碧甃，不勞人力遞金船。潤滋苔蘚欺茵席，聲入杉松當管絃。珍重詩人頻管領，莫教塵土咽潺湲。

右省僕射後湖亭閑宴鉉以宿直先歸賦詩留獻

湖上一陽生，虛亭啓高宴。楓林烟際出，白鳥波心見。主人忘貴達，座客容疵賤。獨慚殘照催，歸宿明光殿。

送孟賓于員外還新淦

暫來城闕不從容，卻佩銀魚隱玉峯。雙澗水邊欲醉石，九仙臺下聽風松。題詩翠壁稱逋客，采藥春畦狎老農。野鶴乘軒雲出岫，不知何日再相逢。

孟君別後相續寄書作此謝之

多病怯煩暑，短才憂近職。跣足北牕風，遙懷浩無極。故人易成別，詩句空相憶。尺素寄天涯，淦江秋水色。

納后夕侍宴

天上軒星正，雲間湛露垂。禮容過渭水，宴喜勝瑤池。彩霧籠花燭，升龍肅羽儀。君臣歡樂日，文物盛明時。簾捲銀河轉，香凝玉漏遲。華封傾祝意，觴酒與聲詩。

又三絕

時平物茂歲功成，重翟排雲到玉京。四海未知春色至，今宵先入九重城。銀燭金爐禁漏移，月輪初照萬年枝。造舟已似文王事，卜世應同八百期。

漢主承乾帝道光，天家花燭宴昭陽。六衣盛禮如金屋，彩筆分題似柏梁。

北苑侍宴雜詠詩

竹

勁節生宮苑，虛心奉豫遊。自然名價重，不羨渭川侯。

松

細韻風中遠，寒青雪後濃。繁陰堪避雨，効用待東封。

水

碧草垂低岸，東風起細波。橫汾從遊宴，何謝到天河。

風

昨朝纔解凍，今日又開花。帝力無人識，誰知玩物華。

菊

細麗披金彩，氛氳散遠馨。汎杯頻奉賜，綠解制頽齡。

柳枝詞十首座中應制

金馬辭臣賦小詩，黎園弟子唱新詞。君恩還似東風意，先入靈和蜀柳枝。
百草千花共待春，綠楊顏色最驚人。天邊雨露年年在，上苑芳華歲歲新。
長愛龍池二月時，毵毵金線弄春姿。假饒葉落枝空後，更有黎園笛裏吹。

綠水成文柳帶搖。東風初到不鳴條。龍舟欲過偏留戀。萬縷輕絲拂御橋。
百尺長條踈麴塵。詩題不盡畫難真。憑君折向人間種。還似君恩處處春。
風暖雲開晚照明。翠條深映鳳凰城。人間欲識靈和態。聽取新詞玉管聲。
醉折垂楊唱柳枝。金城三月走金羈。年年爲愛新條好。不覺蒼華也似絲。
新春花柳競芳姿。偏愛垂楊拂地枝。天子偏教詞客賦。宮中要唱洞簫詞。
凝碧池頭蘸翠漣。鳳凰樓畔簇晴煙。新詞欲詠知難詠。說與雙成入管絃。
侍從甘泉與未央。移舟偏要近垂楊。櫻桃未綻梅花老。折得柔條百尺長。

奉和宮傅相公懷舊見寄四十韻

謝傅功德望全。鸞臺初下正蕭然。搏風乍息三千里。感舊重懷四十年。西掖新官同買馬。南朝輿運似
開天。文辭職業分工拙。流輩班資讓後先。每愧陋容勞刻畫。長慚頑石費雕鐫。晨趨綸掖吟春永。夕會精
廬待月圓。立馬有時同草詔。聯鑣幾處共成篇。閑歌柳葉翻新曲。醉詠桃花促綺筵。少壯況逢時世好。經
過寧慮歲華遷。雲龍得路須騰躍。社櫟非材合棄捐。再謁湘江猶是幸。兩還宣室竟何緣。已知瑕玷勞磨
瑩。又得官司重接連。聽漏分宵趨建禮。從遊同召赴甘泉。雲開闔闔分臺殿。風過華林度管絃。行止不離
宮仗影。衣裾嘗惹御爐烟。師資稷契論中禮。依止山公典小銓。多謝天波垂赤管。敢教晨景過華輶。翺飛
附驥方經遠。巨楫乘風遂濟川。玉燭調時鈞軸正。台階平處德星懸。巖廊禮絕威容肅。布素情深友好偏。
長擬營巢安大廈。忽驚操鉞領中權。吳門日麗龍銜節。京口沙晴鷁畫船。蓋代名高方赫赫。戀恩心切更

乾乾袁安辭氣忠仍懇。吳漢精誠直且專。卻許丘明師紀傳。更容疏廣奉周旋。朱門自得施行馬。厚祿何妨食萬錢。密疏尙應勞獻替。清談唯見論空玄。東山妓樂供閑步。北牖風涼足晏眠。玄武湖邊林隱見。五城橋下棹洞泐。曾移苑樹開紅藥。新鑿家池種白蓮。不遣前驕妨野逸。別尋逋客互招延。棊枰寂靜陳虛閣。詩筆沉吟劈彩牋。往事偶來春夢裏。閑愁因動落花前。青雲舊侶嗟誰在。白首親情倍見憐。盡日凝思殊悵望。一章追敘信精研。韶顏莫與年爭競。世慮須憑道節宣。幸喜書生爲將相。定由陰德致神仙。羊公剩有登臨興。尙子都無嫁娶牽。退象天山鎮浮競。起爲霖雨潤原田。從容自保君臣契。何必扁舟始是賢。

相公垂覽和詩復貽長句輒次來韻

西院春歸道思深。披衣閑聽暝猿吟。鋪陳政事留黃閣。偃息神機在素琴。玉柄暫時疎末座。瑤華頻復惠清音。開晴便作東山約。共賞烟霞放曠心。

九日落星山登高

秋暮天高稻稔成。落星山上會諸賓。黃花汎酒依流俗。白髮滿頭思古人。巖影晚看雲出岫。湖光遙見客垂綸。風煙不改年長度。終待林泉老此身。

十日和张少監

重陽高會古平臺。吟徧秋光始下來。黃菊後期香未減。新詩捧得眼還開。每因佳節知身老。卻憶前歡似夢迴。且喜清時屢行樂。是非名利盡悠哉。

御筵送鄧王

禁裏秋光似水清。林煙池影共離情。暫移黃閣只三載。卻望紫垣都數程。滿座清風天子送。隨車甘雨郡人迎。綺霞閣上詩題在。從此還應有頌聲。

和張少監晚菊

憶共庭蘭倚砌栽。柔條輕吹獨依隈。自知佳節終堪賞。爲惜流光未忍開。采擷也須盈掌握。馨香還解滿罇壘。今朝假猶無事。更好登臨汎一杯。

送馮侍郎

聞君竹馬戲毗陵。誰道觀風自六卿。今日聲名光舊物。共看旌旆擁書生。斬蛟橋下谿煙碧。射虎亭邊草路清。應念筵中倍離恨。老來偏重十年兄。

又絕句寄題毗陵驛

曾持使節駐毗陵。長與州人有舊情。爲向驛橋風月道。舍人髭鬢白千莖。

陳侍郎宅觀花燭

今夜銀河萬里秋。人言織女嫁牽牛。珮聲寥亮和金奏。燭影熒煌映玉鉤。座客亦從天子賜。更籌須爲主人留。世閒盛事君知否。朝下鸞臺夕鳳樓。

送蕭尚書致仕歸廬陵

江海分飛二十春。重論前事不堪聞。主憂臣辱誰非我。曲突徙薪唯有君。金紫滿身皆外物。雪霜垂領更離羣。鶴歸華表望不盡。玉筍山頭多白雲。

賦得秋江晚照

落日照平流。晴空萬里秋。輕明動楓葉。點的亂沙鷗。罾網魚梁靜。罌罌稻穗收。不教行樂倦。冉冉下城樓。

奉和子龍大監與舍弟贈答之什

石渠東觀兩優賢。明主知臣豈偶然。鴛鴦分行皆接武。金蘭同好共忘年。懷恩未遂林泉約。竊位空慙組綬懸。多少深情知不盡。好音相慰強成篇。

史館庭梅見其毫末。歷載三十。今已半枯。同僚諸公。唯相公與鉉在耳。視物興感。率成短篇。謹書獻上。伏惟垂覽。

東觀婆娑樹。曾憐甲坼時。繁英共攀折。芳歲幾推移。往事皆陳迹。清香亦暗衰。相看宜自喜。雙鬢各垂絲。

鼎臣學士侍郎以東館庭梅昔翰苑之毫末。今復半枯。向時同寮零落。都盡素髮垂領。茲唯二人感舊傷懷。發於吟咏。惠然好我。不能無言。輒次來韻。攀和。悅。

憶見萌芽日。還憐合抱時。舊歡如夢想。物態暗遷移。素豔今無幾。朱顏亦自衰。樹將人共老。何暇更悲絲。

再次前韻代梅答

託植經多稔。頃筐向盛時。枝條雖已改。情分不曾移。莫訝堦前老。還同鏡裏衰。更應憐墮葉。殘吹挂蟲絲。

太傅相公深感庭梅再成絕唱。曲垂借示。倍認知憐。謹用舊韻。攀和。

禁省繁華地。含芳自一時。雪英開復落。紅藥植還移。謂嘗爲翰林。又爲史館。靜想分今昔。頻吟歎盛衰。多情共如此。爭免鬢成絲。

太傅相公以東觀庭梅西垣舊植昔陪盛賞今獨家兄唱和之餘俾令攀和輒依本韻伏媿斐然

錯

靜對含章樹

漢有含章簷下樹

閑思共賞時香隨荀令在根異武昌移物性雖搖落人心豈變衰唱詠勝笛曲來

往韻朱絲

鼎臣學士侍郎楚金舍人學士以再傷庭梅詩同垂寵和清絕感歎情致俱深因成四十字陳謝

悅

人物同遷謝重成念舊悲連華得瓊玖合奏發塤箎餘枿雖無取殘芳尙獲知問君何所似珍重杜秋詩

太傅相公以庭梅二篇許舍弟同賦再迂藻思曲有虛稱謹依韻奉和庶申感謝

舊春終無替流光自足悲攀條感花萼和曲許塤箎前會成春夢何人更已知緣情聊借喻爭敢道言詩

太傅相公與家兄梅花詠唱許綴末篇再賜新詩俯光拙句謹奉清韻用感鈞私伏惟采覽

錯

重歎梅花落非關塞笛悲論文叨接萼末曲媿吹箎毛詩云仲氏吹箎枝逐清風動香因白雪知陶鈞敷友悌更

賦邵公詩

和鍾大監汎舟同游見示

潮溝橫趣北山阿一月三游未是多老去交親難暫捨閑中滋味更無過谿橋樹映行人渡村徑風飄牧

豎歌孤櫂亂流偏有興滿川晴日弄微波

又和游光睦院

寺門山水際。清淺照孱顏。客櫂晚維岸。僧房猶揜關。日華穿竹靜。雲影過塔閑。箕踞一長嘯。忘懷物我間。

和張少監舟中望蔣山

谿路向還背。前山高復重。紛披紅葉樹。閒鬪白雲峯。盡日慵移櫂。何年醉倚松。自知閑未得。不敢笑周顛。

御札

新酒初熟。偶與鄭王諸公。開嘗於清宴堂。廡之間。既覽秋物。復矚霜牋。因賦茱萸一題。以遣此時之興。卿鴻才敏思。不可獨醒。宜應急徵。同賦前旨。

茱萸詩

翰林學士臣徐鉉進

萬物慶西成。茱萸獨擅名。房排紅結小。香透夾衣輕。宿露霑猶重。朝陽照更明。長和菊花酒。高宴奉西清。

奉和御製茱萸

臺畔西風御果新。芳香精彩麗蕭辰。柔條細葉粧治好。紫蒂紅芳點綴勻。幾朵得陪天上宴。千枝長作洞中春。今朝聖藻偏流詠。黃菊無由更敢鄰。

蒙恩賜酒奉旨令醉進詩以謝

明光殿裏夜迢迢。多病逢秋自寂寥。臣以病戒酒多時蠟炬乍傳丹鳳詔。御題初認白雲謠。今宵幸識衢鱗味。明日知停入閣朝。爲感君恩判一醉。不煩辛苦解金貂。

秋日汎舟賦蘋花

素豔擁行舟。清香覆碧流。遠煙分的的。輕浪汎悠悠。雨歇平湖滿。風涼運漚秋。今朝流詠處。卽是白蘋洲。

題梁王舊園

梁王舊館枕潮溝。共引垂藤繫小舟。樹倚荒臺風淅淅。草埋欹石雨修修。門前不見鄒枚醉。池上時聞鴈驚愁。節士逢秋多感激。不須頻向此中游。

奉調度支陳員外

古來賢達士。馳鶩唯羣書。非禮誓弗習。違道無與居。儒家苦迂闊。遂將世情疎。吾友嗣世德。古風藹有餘。幸遇漢文皇。握蘭佩金魚。俯視長沙賦。恓恓將焉如。

明道人歸西林求題院額作此送之

昔從岐陽狩。簪纓滿翠微。十年勞我夢。今日送師歸。曳尾龜應樂。乘軒鶴漫肥。含情題小篆。將去挂巖扉。

送宣州丘判官

憲署游從阻平臺。道路賒喜君馳後乘。於此會仙槎。緩酌遲飛蓋。微吟望綺霞。相迎在春渚。暫別莫咨嗟。

北使還襄邑道中作九月三十日

九月三十日。獨行梁宋道。河流激似飛。林葉飜如掃。程遙苦晝短。野迥知寒早。還家亦不閑。要且還家了。

禁中新月

今夕拜新月。沉沉禁署中。玉繩疎閒彩。金掌靜無風。節換知身老。時平見歲功。吟看北墀暝。蘭燼墜微紅。

觀吉王花燭

王門嘉禮萬人觀。況是新承置醴歡。花燭喧闐丞相府。星辰搖動遠游冠。歌聲暫闕聞宮漏。雲影初開見露盤。帝里佳期頻賦頌。長留故事在金鑾。

碁賭賦詩輸劉起居奠

刻燭知無取。爭先業未精。本圖忘物我。何必計輸贏。賭墅終規利。焚囊亦近名。不如相視笑。高詠兩三聲。

春盡日游後湖贈劉起居劉時方燒藥

今朝湖上送春歸。萬頃澄波照白髭。笑折殘花勸君酒。金丹成熟是何時。

送察院李侍御使廬陵因寄孟員外

繡衣乘驛急如星。山水何妨寄野情。肯向九仙臺下歇。閑聽孟叟醉吟聲。

後湖訪古各賦一題得西邸

南朝藩閫地。八友舊招尋。事往山光在。春晴草色深。曲池魚自樂。叢桂鳥頻吟。今日中興運。猶懷翰墨林。

送德邁道人之豫章

禪靈橋畔落殘花。橋上離情對日斜。顧我乘軒慙組綬。羨師飛錫指煙霞。樓中西嶺真君宅。門外南州處

士家。莫道空談便無事。碧雲詩思更無涯。

送陳祕監歸泉州

風滿潮溝木葉飛。水邊行客駐驂騑。三朝恩澤馮唐老。萬里鄉關賀監歸。世路窮通前事遠。半生談笑此

心違。離歌不識高堂慶。特地令人淚滿衣。

又聽霓裳羽衣曲送陳君

清商一曲遠人行。桃葉津頭月正明。此是開元太平曲。莫教偏作別離聲。

又題白鷺洲江鷗送陳君

白鷺洲邊江路斜。輕鷗接翼滿平沙。吾徒來送遠行客。停舟爲爾長歎息。酒旗漁艇兩無猜。月影蘆花鎮相得。離筵一曲怨復清。滿座銷魂鳥不驚。人生不及水禽樂。安用虛名上麟閣。同心攜手今如此。金鼎丹砂何寂寞。天涯後會眇難期。從此又應添白髭。願君不忘分飛處。長保翩翩潔白姿。

徐騎省集卷第六制一

保寧王制

南昌王制

張居詠制

馬希崇舒州節度使制

馮延巳加特進制

林仁肇浙西節度使制

鄧王加司空制

上太后尊號制

徐運授太子太保制

朱業江州節度使制

朱業宣州節度使制

劉從效檢校太師制

嚴續除司空制

改封江王制

謝扈加特進制

鄭王加元帥制

朱業加中書令制

馬在貴加官制

游簡言平章事制

保寧王制

門下昔先王聰明時憲文質載周親親之義莫之或改乃知封建之重宗社攸賴友愛之美風教攸先寅奉舊章敢忘循舉二十弟某稟質冲粹慎德孝恭出言有章好學不倦故我文考慈訓備隆而能踐修嘉猷惠迪前哲卓爾令器時惟老成粵予眇冲肇當纘服賴貽謀之啓後仰垂鑒之在天尙念多艱懼弗克

荷是用睦懿親以祐涼德。班宗彝以懷萬邦。錫爾以山川。表爾以車服。師長之任。申而寵之。敦敍之恩。於是乎在於戲苴茅侯社。禮莫縟焉。連華棣萼。親莫昵焉。履信思順。可以無悔。尊師重道。可以多聞。盡愛敬之奉親顏。極惠和以厚宗室。勿恍勿墮。有初有終。服我訓辭。永光懿烈。可。

南昌王制

門下。昔西周之分陝。服則曰風聲所存。南朝之治揚州。則曰本根攸寄。非親賢碩望。不足以表東夏。非輔相重位。不足以副具瞻。天下爲公。百王不易。肆予敷命。匪敢有私。長子某。敦信厚之風。秉孝恭之德。允迪前烈。率由生知。自剖麟符。往綏淮甸。尊敬師保。奉行詔條。有所問而不干。知爲善之最樂。東楚之俗。向風而安。時以爲能。朕亦自慰。夫陟明賞。善有國大典。苟得其所。雖親何嫌。是用特就留臺。寵開相府。崇貴之義。儀制存焉。噫。爲政無他。勤則有繼。舉德甚易。終之實難。無以安佚自居。而忘夙夜之戒。無以驕貴自負。而忽藥石之言。治亂盛敗。則有先聖之遺經。憲章文物。則有中朝之成式。諮訪佩服。身先行之。敬哉慎哉。無忝多訓。可。

張居詠制

門下。昔在先王。任賢尙齒。出將入相。所以任賢也。尊師重傅。所以尙齒也。況乎擇藩屏之寄。膺輔導之求。高步承華。誕揚師訓。克堪其選。我有人焉。某負貞幹之材。稟純厚之德。亟更庶尹。歷事累朝。昇元始基。賴其獻納。故陟鸞臺之位。爰立作相。保大踰歲。藉其綏懷。故委龍節之權。受賑于社。懋乃嘉績。叶于朕心。殿邦政成。輯瑞來覲。方圖位著。爰得僉諧。而昔自故相。已嘗爲保。重煩耆德。俾傳東朝。尊敬之儀。典章斯在。

噫。昔者叔孫疏廣。善於其職。克繼來躅。可不慎哉。勉著嘉猷。以副時望。可。

撫州節度使馬希崇除舒州節度使制

門下。姬周同德。曹叔封於王畿。炎漢功臣。楊僕恥居關外。是知藩翰之重。所寄必同。遠近之差。以斯爲寵。我有成命。爾其敬聽。某識度恢弘。風猷茂遠。家勳蓋世。不怙貴以驕人。多難薦臻。每忘身而濟物。智能適變。仁足亢宗。來庭不俟於七旬。保境豈徒于五郡。劉總舉全燕之地。弘正輸雄魏之邦。故實攸存。懋章何悛。是用加之。飫賜尊以上公。陟負璽之崇資。委建牙於列鎮。虛襟而見前席。與談言語。有章威儀。可則既叶。跂予之望。且堅戀闕之心。藹爾誠明。形于表疏。愈歎忠勤之操。宜更節制之權。而永泰全軍。舒庸舊國。地望無慚于汝水。封疆密邇于王城。用諧日近之言。尙資河潤之福。俾迺新命。往受中權。於戲。大義昭彰。朝恩渙汗。千里之地。可以觀政。三軍之帥。可以圖功。永樹風聲。無忘多訓。可。

太弟太保馮延巳落起復加特進制

門下。爵賞之行。憲章斯在。急於務則適其變。終其事則歸于禮。將軍重位。足以奪孝子之情。特進崇班。自昔冠諸侯之上。申爲懋典。允屬公才。具官馮延巳。儒雅積中。機神應物。風雲夙契。魚水冥符。處多士之朝。副具瞻之望。及移相府。出鎮臨川。封境綏懷。聲猷茂遠。頃集蓼莪之痛。俯從金革之權。露冕有誠。輯瑞來覲。疇咨舊德。保佑東朝。比疏傅之在前。允諧擬議。類魯公之拜後。適就遷除。俾進崇階。庶申優寵。於戲。將相之重。資爾以惟聖。儲兩之尊。繫爾以成德。知人則哲。予用弗疑。勉揚令圖。無忝多訓。可落起復冠軍大將軍。加特進。餘並如故。

林仁肇浙西節度使制

門下建侯樹屏有國之攸先崇德報功百王之所共斯爲令典予敢忘之鎮海軍節度浙江西道觀察等使留後金紫光祿大夫檢校太傅濟南縣開國伯食邑七百戶林仁肇稟此星芒鬱爲時幹鼓鑿之氣指勅敵而愈高金石之心因時艱而益壯故能灼殊功於南部夷多壘於東門元戎所行績用昭著及總留務于浙之西成師著無犯之威察俗有惟清之化屹爾京口殷然長城予惟汝嘉俾正藩守因爾才略樹之風聲雄師大邦所以屏王室尊官盛典所以懋官成惟惠惟和有嚴有翼使予無東顧之慮者繫其賴焉克堅一心以永百祿可依前檢校太傅兼御史大夫使持節都督潤州諸軍事潤州刺史充鎮海軍節度使浙江西道管內營田觀察處置等使功臣散官勳封如故

紀國公封鄧王加司空制

門下宗子維城良臣維聖故有王社之數鼎司之權親親賢賢古之大訓也我有成命時維至公第七子某識度淹通器質清粹就傅之歲威儀不懋出閣已來聞望所著向由邦政入踐中樞內形將順之規外盡彌綸之業人知親附俗待和平邦家之基斯實攸賴今六駢巡守萬乘啓行方資扈蹕之勤宜有疇庸之典畫南陽而錫壤掌邦土以命官併加馭貴之資益峻具瞻之望於戲義極君父愛敬之道兼焉任綜文武弛張之政存焉爾其佩服前訓咨詢舊德勿驕勿惰有初有終永樹風聲以保元吉

上太后尊號制

門下膺昊穹之眷荷宗祏之重何嘗不嚴奉慈訓聿循孝理所以化成天下弘濟多艱親親尊尊教之大

者也。況沈潛之德，不顯于國風。輔佐之勤，光昭於王業。今遺恩累洽，靈鑒在天。俾予小子，恭踐大寶。思弘任嬀之烈，紹恢三五之基。彝章盛典，敢忘祇奉。宜上大行國主皇后尊號爲太后。

太子少傅徐運授太子太保制

門下崇德尚賢，推恩錄舊。茲惟令典，允屬時英。予以眇躬，嗣膺丕業。戚藩之望，羽翼之恩。敢忘寵章，用光師道。某清直稟氣，忠厚爲資。實戚里之所宗，歷累朝而見重。敬愼卽保家之主，恭勤無出位之思。爰自京口臨藩，克貞師律。鸞臺作相，足厚時風。留侯旋務於退身，疏受更聞於稱職。純誠益著，雅望攸高。昨者預奉綴衣，導揚末命。忠貞以濟，典禮無違。顧惟沖人，懼德弗嗣。當此承祧之日，益堅重傅之懷。是用就改崇資，仍加食賦。於戲班崇一品，秩視三師。苟非賢臣，孰克臻此。永期納誨，無替令猷。可。

朱業江州節度使制

門下古者諸侯之賢，入爲鄉士。上公之寵，出爲方伯。故中外之任，踐更攸宜。我有勳臣，咸曰名將。藩維宿衛，夾輔沖人。肆予仰成，是用申告。某家傳武略，天賦純誠。名因勇聞，位以材致。周旋數紀，佐佑累朝。由裨將以統元戎，勳勞滋茂。自百城而登連帥，聲政洽聞。寵益盛而若驚，位益高而愈讓。予纂服之始，駿奔來朝。且堅戀闕之心，因處周廬之任。忠貞彌固，夙夜惟寅。輦下肅清，時乃之力。永言舊德，豈忘予懷。會九江元侯入奉朝任，中流之寄，非賢不居。是用輟蘭錡之權，付金符之重。往分巨屏，更佇殊庸。噫，簡師旅以壯軍聲，明紀律以宣庶政。可畏可愛，富之教之。是汝所長，無替前效。陟明有典，厥惟欽哉。可。

朱業宣州節度使制

門下車服之寵。所以報功。藩閫之權。所以觀政。茲爲令典。允屬信臣。某智勇克兼。忠貞特立。秉武經而致用。服戎政以居多。誠悃洞然。終始一揆。及分符出守。持節主留。恩信並行。詔條畢舉。肅連營而無犯。視赤子以如傷。所臨之方。去思仍在。向鍾多難。入衛京師。憂國忘家。令行禁止。羣情自固。戎事以寧。肆予仰成。時乃之力。今疆場俯靜。蒸黎未康。宣城奧區。國家巨屏。方當謀帥。是用策勳。資果毅以壯先聲。假惠和而蘇疲俗。付爾節鉞。往鎮撫之。惟爾慈儉。足以安民。剛正足以行法。必當望風自理。投刃皆虛。宜弘寬大之規。以集中庸之德。勉茲具美。永振嘉猷。可。

泉州節度使劉從效檢校太師制

門下望高於朝。則享師保之任。惠加於物。則進土田之封。所以啓佑沖人。藩屏王室者也。我有寵數。屬於元侯。某山岳儲精。星芒稟異。挺全才而應用。激大義以致身。而自際會先朝。奮揚奇策。靜一方之多難。越萬里以來庭。故得倚作藩宣。誓之帶礪。而能恩威洽著。紀律修明。戎政有經。理聲日遠。黎獻有不欺之頌。朝廷無南顧之憂。茂績忠規。古難其比。粵予眇質。嗣德弗明。賴我友邦。越乃賢帥。推誠翼戴。克荷景靈。渙汗之恩。惟恐不至。是用增以井賦。崇爲太師。美號峻階。併伸殊渥。噫。乞言之禮。可以觀德。殿邦之寄。可以樹勳。勉揚令圖。永錫繁祉。可。

右揆嚴續除司空兼門下侍郎平章事制

門下天作司牧。必生丞弼。非君臣同體。道則不明。非律呂交感。功則不濟。粵予眇質。負荷景靈。不有時賢。豈戡多難。敬若先意。疇茲舊臣。某純粹炳靈。惠和成性。襲台鼎之慶。連肺腑之親。歷奉累朝。亟更庶尹。憂

國家之事。知無不爲。經夷險之閒。中立不倚。言必由於忠信。行必自於誠明。勞而弗矜。謙以自牧。先朝鑒其誠志。任以腹心。頃當巡守之初。俾貳主留之寄。盡規竭慮。夜思晝行。京輔以寧。時乃之力。及奉揚末命。以佑冲人。送往事居。禮無違者。忠勳茂績。人無閒然。今二后在天。萬物思理。予方乃眷。民亦具瞻。是用命作司空。倚爲左相。兼國史樞機之任。進升階食賦之資。豈曰寵章。是同憂責。嗚呼。受遺作弼。厥惟艱哉。爾其崇遠大之謨。布簡寬之政。詢箴諫之士。塞便佞之言。滿假自賢。則其智益蔽。虛懷接物。則其猷益光。念茲在茲。以底於道。可。

信王改封江王加中書令制

門下。唐堯之聖也。旣以序九族爲先。漢祖之隆也。亦以守四方在念。矧予小子。弗堪多難。實賴羣后。共康蒸民。粵有賢侯。亦在諸父。庸勳表德。敢或愛焉。第二十叔某。天賦機神。生知禮樂。肇開朱邸。則孝敬之道。升聞。出建齋壇。則威和之風。遠振。況五嶺之際。俗雜地雄。吏服其明。民安其教。煦如冬日。隱若長城。孤以不明。祇奉不御。今上咨乃庶尹。至于友邦。師保之規。旣自家而刑國。蓼蕭之澤。當由親而及遠。是用正左相之位。崇三司之儀。增賦進封。併伸寵數。於戲。昔我文考。並建懿親。藩屏所繫。社稷是衛。燕翼之旨。可不勉歟。敬佇嘉猷。以永繁祉。可。

謝匡策加特進階增食邑

門下。王者均慶推恩。無遠弗及。矧有舊德。居然將臣。方申求舊之懷。豈愜疇庸之典。某素推勇氣。夙負壯圖。立功旗鼓之閒。發跡風雲之會。出分符竹。入守關防。翼衛天門。董齊蘭錡。咸著在公之績。可觀適用之

材享此期頤。保茲優逸。臻富壽之福。全終始之名。比之古人。不可多得。孤以眇質。嗣守慶基。方資無改之規。式重後凋之節。俾升階序。仍進戶封。於戲。二品崇階。三朝貴仕。人臣寵祿。何以過斯。勉荷朝恩。永揚令問。可。

鄭王加元帥江寧尹制

門下。睦親尊賢。王者之盛業也。中台上將。有國之重任也。是必疇咨公議。稽若前經。舉而行之。謂之令典。我有愛弟。時惟宗英。論道經邦。勳德滋茂。肆子有命。允叶厥中。某挺命世之才。秉生知之哲。機神穎邁。器宇冲深。自寶玉分封。緇衣授職。內蘊清明之德。外宣寅亮之功。持謙下之資。以親附百姓。體儉勤之節。以表率時風。學問該通。每諮詢而自益。忠誠孝悌。常將順以無違。昔者三后叶心。十亂同德。允茲古義。非爾而誰。粵予眇躬。惠迪先訓。獲守大業。汔臻小康。實繫手足之賢。以集股肱之寄。無德不報。雖親何嫌。是用誕舉渥恩。就加名數。夫元帥者。民之司命。中樞者。國之宗臣。尹京所以表則四方。增封所以藩輔王室。毗倚之重。何以加斯。於戲。義兼國家。權總文武。動靜之際。治亂繫焉。所先者在乎弼諧。所慎者在乎聽受。清如止水。故是非之說不可欺。平如懸衡。故善惡之徵不能惑。有犯無隱。非好異也。不違如愚。非苟合也。惟公是務。惟道是從。所務必老成。所親必端士。服茲多訓。永樹英聲。可。

朱業加中書令宣州節度使制

門下。予嘗顧藩屏之重。思黎獻之康。欲使折衝之威。迭行於封略。惠和之化。普及於方州。既報政之屢聞。乃改轅而敷寵。咨爾賢帥。聽吾話言。某武毅致身。忠厚成性。踐更事任。昭著勳庸。倚若金湯。誓之帶礪。自

持使節出鎮中流。恢簡易之風。立嚴明之令。仁而有斷。吏不敢欺。故使萬井阜安。連營輯睦。藹爾殿邦之績。叶予進律之文。率是通才。何適不可。予以宣城列鎮。甸服奧區。久闕元戎。未孚王化。藉爾有成之政。副吾共理之懷。右相之崇。宰司所重。申爲殊獎。以極朝恩。於戲。有惠於民。有功於國。中台貴位。累鎮劇權。苟非純誠。何以臻此。爾尙守益恭之節。勵匪懈之心。永懋嘉猷。以光時望。

馬在貴加官制

門下盡忠于國者。其報深。有勞於事者。其澤厚。方切念功之義。仍當均慶之初。不有寵章。孰光懋典。馬某深沈有勇。質重寡言。少推學劍之能。早識擇君之舉。自策名旗鼓。受任疆場。履險身先。有功不伐。向分符竹。實制要衝。化行於富庶之時。節著于艱難之際。純誠懿績。時論多之。入總禁營。遂成優秩。富壽之福無闕。敬慎之風愈高。予惟汝嘉。思有以勸。屬此推恩之際。俾升掌武之資。噫。忠勳旣明。寵祿亦至。終始之義。今古所高。勉揚令猷。以享元吉。

游簡言左僕射平章事制

門下昔在明王。膺圖嗣統。雖復格天光表。繼文下武。猶曰實相以濟。又曰克艱厥臣。矧惟寡昧。疇咨庶尹。若乃承弼之重。毗倚之隆。詢於具瞻。敢或輕授。游某世濟文雅。挺生公器。中興之始。卽爲辭臣。重熙在運。亟更近署。忠爲令德。實浮於名。藹然直聲。允洽時望。先皇帝省方展義。分命羣司。藉爾重臣。輔予小子。直躬無避。正辭不諂。翊從行闕。克申其勞。至於受命交兵之間。抗節履危之際。由義以濟。知無不爲。此皆古之所以爲艱。予之所以嘉尙者也。閒歲出於獨斷。命長南宮。議者但高其盡公之誠。未許其理劇之用。遂

能正身而令當官不回。厲風霜之威。以糾其慢。堅夙夜之節。以率其勤。請託不行。紀綱自舉。羣議由是咸伏。六職以之孔修。風雨不渝。始終一致。實爲國器。想見古人。而躬親簿領之間。遽成勞勩。從容廟堂之上。未盡謀猷。疇庸之典。予所多愧。是用命作左相。陟茲鸞臺。進金紫之崇階。典圖書之祕府。勳爵并賦。併示寵名。於戲。釋細務足以導節宣之和。參大政足以暢彌綸之業。緊爾致君之效。成我知臣之明。往惟欽哉。無假多訓可。

徐騎省集卷第七

李匡明御史大夫制

劉崇俊起復制

王彥儔加階制

趙丕御史中丞制

杜昌業江州制

魏王宣州大都督制

高逸休壽州司馬制

馮延巳兼起居郎閣居常兼起居舍人制

查文道知雜制

劉彥貞觀察使制

刁紹工部尙書制

李貽業宗正卿制

蕭儼祠部郎中制

李匡明御史大夫制

宋齊丘知尙書省制

馮延魯江都少尹制

李匡明舒州刺史制

陳褒制

招討妖賊制

王崇文等並本州觀察使制

李萼節度副使制

王仲連米崇楷等制

張義方勤政殿學士制

外祖母追封制

張義方左常侍制

陳繼善工部侍郎制

陳景進工部郎中制

敕御史所職實爲紀綱百官之邪得以糾正衆目不理得以舉明使朝廷凜然罔懈於位茲朕之攸賴而和庶政也向者治刑不暇官業靡申遂用省其訊鞠之煩委以澄清之寄庶循理本諒在得人通議大夫守吏部尙書柱國賜紫金魚袋隴西縣開國子食邑五百戶李匡明學術優深德望清重可副丞相以鎮時風中散大夫守右常侍判御史臺事柱國賜紫金魚袋趙丕自掌憲司克勤於職而侍從之列朝夕論思期於弼違宜在專任今以庶獄移從理官可歸騎省以備顧問各踐乃位允期懋功匡明可御史大夫不可守本官罷判臺事

宋齊丘知尙書省制

敕兩掖南宮樞機之地也元台上公股肱之寄也況親賢在位中外具瞻式敍彝倫爰申明命夫眞宰之重大政咸歸出納王言固當綜錄侍中壽王某向兼南省未叶舊章宜罷判尙書省使領中書門下兩省事太保齊丘雖道在經邦方資納誨而事殷會府兼藉允釐可知尙書省事大元帥齊王總納百揆以貞萬邦凡百謨猷悉關獻替其三省事並取齊王參決朕允思恭己以荷景靈用一國之才敢辭則哲成天下之務庶叶無爲方俟沃心豈勞多訓

劉崇俊起復制

敕匡時啓運功臣威邊將軍濠州都團練觀察處置等使光祿大夫檢校太傅使持節濠州諸軍事守濠州刺史渦口兩城使兼御史大夫上柱國彭城縣開國子食邑五百戶劉崇俊濠上觀風克昭祖服光祿大夫檢校太保持節常州諸軍事常州刺史兼御史大夫上柱國劉佑晉陵守土允茂政經而皆夙練軍

聲習知邊要。方深朝寄。遽屬內艱。永言護塞之權。宜舉墨綬之制。俾加寵命。改授階資。勉抑孝心。以從王事。並可起復雲麾將軍。餘如故。

馮延魯江都少尹制

敕。朝議郎。行尚書虞部員外郎。武騎尉。賜緋魚袋。馮延魯。頃者。尹縣留都。首變田制。克勤于事。以利于人。自歸朝行。已踰周歲。如聞衆庶。未甚樂成。矧彼浩穰。所宜均一。是用假爾亞尹。往畢舊功。其在條理得中。厚薄無撓。俾乃比屋。咸遂所安。止於刑讞之繁。亦以公平爲用。務令稱職。無忝加恩。可以本官判江都少尹公事。

王彥儔加階制

敕。王者旌董戎之功。重殿邦之任。疏寵之命。因事有加。所以勸能而侂效也。佐時衛聖功臣。建威將軍。康化軍節度。池州觀察處置等使。起復雲麾將軍。檢校太尉。兼侍中。使持節。池州諸軍事。池州刺史。上柱國。太原郡開國侯。食邑二千戶。王彥儔。作鎮方隅。克揚威信。師謀不撓。庶政有常。肅爾先聲。宣我朝命。向者起于哀制。授以崇階。禮適就於變除。寄方隆於藩屏。俾從增邑。式示推恩。勉揚令圖。無替丕績。可光祿大夫。加食邑一千戶。餘如故。

李匡明舒州刺史制

敕。通議大夫。守御史大夫。柱國。賜紫金魚袋。隴西縣開國子。食邑五百戶。李匡明。向緣時望。命長憲臺。既歷歲時。亦聞敬慎。方佇茂績。以光大猷。遽覩拜章。固辭重位。俾全寵遇。宜輟準繩。尙賴分憂。無忘守節。可

檢校司徒兼御史大夫使持節舒州諸軍事守舒州刺史充本州團練使餘散官賜邑如故

趙丕御史中丞制

敕朕以御史未理庶政靡清思得良臣副吾慎選中散大夫守右散騎常侍柱國賜紫金魚袋天水縣開國子食邑五百戶趙丕再履憲署欽若攸司迭爲侍臣匡予不及俾授格心之寄宜膺獨坐之權夫才識兼通然後能得大體公正無黨然後能肅百司糾正失中則紀綱撓顧避不言則職業墮爾其欽哉無辱朕命可御史中丞餘官勳賜爵邑如故

陳襄制

敕出身事主忠之效也以年致政古之制也淳風將振斯道復行朕用嘉焉宜示優寵宣徽使某官陳襄以敬慎之操俊乂之才輔予潛九之初叶我司聰之寄出納惟允佐佑盡規勤勞王家數紀於是永念耆德方注虛懷遽從知退之言亟有縣車之請雖面諭難抑豈舊功可忘而司衛列卿秩崇務簡俾退辭近侍猶在立朝勉迴高尚之心式厚君臣之義可衛尉卿

杜昌業江州制

敕十連之帥百城之長藩屏王室其揆一也隨時省置何常之有焉朕祇荷慶基懋循古訓迭用舊德以頒詔條交修予違踐更爾位肆因大慶式舉朝章金紫光祿大夫上柱國京兆縣開國子食邑五百戶杜昌業始以明敏肅恭服勞近密出納惟允固慎無違先帝用能委之邦政明九伐以恢王略堅一心以迪大猷六事允諧時乃之用將圖爾效且盡其才朕以中流之寄九江爲重控五嶺之衝要鎮百蠻之驛騷

屬予相臣。入總樞務。惟爾公望。克嗣其勳。是用輟夏官之崇。膺外臺之職。尙虛使節。以便理戎。其往慎乃攸終。遵我成憲。簡易以申令。恩信以卽師。惟惠惟忠。無忝朕命。依前檢校太保兼御史大夫使持節江州諸軍事江州刺史本州團練觀察使散官勳如故。

招討妖賊制

朕聞先王之靜人也。四夷咸賓。尙先慎德之誠。一夫不獲。則軫納隍之心。是故導以仁聲。浹之惠澤。猶不可化。遂威有刑。昨者嶺表遺屯。聚爲寇盜。違其上命。犯彼戰鋒。而敢乘我國哀。伺我邊隙。侵軼我封部。誘惑我黔黎。保據谿山。肆爲剽掠。朕以肇膺丕業。先洽德音。矧彼狂徒。皆吾赤子。弗忍盡殺。冀其自新。所以雖命師徒。且令招撫。而凶惡不革。結聚愈繁。暴害吏民。攻圍縣邑。一至於此。其能久乎。國有常刑。吾又何愛。仍聞衆軍致討。累有殺傷。平人無辜。暴骨于野。輿言及此。永惻朕心。況常賦及期。三農失業。特申矜恤。更示懷來。虔州今年應屬省租稅。並可放免。仍委諸縣長吏。安存編戶。宣示國恩。防護警巡。勿令擾動。妖賊張茂賢。首爲劫盜。罪在難容。若能束身歸降。亦與洗滌收錄。如聞命之後。因循未賓。卽令招撫諸軍。分路進討。如所在百姓。及徒黨中有能擒斬茂賢者。不計有官無官。並賜三品賞錢一萬貫。莊一區。並已分產業。並永放苗稅差役。傳之子孫。此恩不改。若能同心計畫。及數內。或擒獲得稱王稱統軍軍使之屬。并次第首級。止於一隊。一寨頭領者。卽約此例。等降優賞。放免苗稅差役。或能自出身歸投。有田畝者。各令歸業。仍放三年租賦。無田者。委本道錄奏。各與逐便優穩安排。及重加賞賚。如凶惡不迴。爲諸軍擒獲者。不問人數。卽便處斬。明申威信。汝自擇焉。諸軍將士。有能斬獲茂賢。殺戮支黨。官賞之制。並越常規。予不

食言爾宜自勵。朕永惟止殺。許彼悛心。且妖賊等。燒毀倉儲。蹂踐禾稼。聚食則資糧立盡。外取則穀實不收。進則大軍扼其前。退則領兵掎其後。況烏合之衆。本不同心。緩則苟避征租。急則各圖恩賞。函首來獻。翹足可期。咨爾羣黨等。自保家鄉。共思寧息。與其碎身於鋒刃。孰若樂業於閭里。咨爾將士等。各奮驍雄。早成功績。與其暴師於境上。孰若受賞於轅門。體我深懷。速清邊徼。布告本道。咸使聞知。

魏王宣州大都督制

敕。惟先王體國經野。建邦設都。並立懿親。以藩王室。當畿服之地。則任輔翊之重。有戎昭之績。乃增督護之威。是以王略恢而諸侯和矣。宣城重鎮。陪京之南。制天險之津梁。據三楚之襟帶。境環千里。邑聚萬民。我朝以來。戎寄尤切。太師魏王。受鉞先帝。建牙是邦。宣導皇風。董齊師律。生殖茂遂。禮讓興行。時惟懋功。叶此時論。粵朕小子。懼德弗堪。允孚大猷。其在叔父。雖師保之命。已迪茂章。而刺舉之名。未極公望。宜升大府。式壯中權。於戲。立愛之恩。予不敢怠。敬保之義。王其謂何。勉啓乃心。以底於道。可升宣州爲大都督府。以魏王爲宣州大都督府長史。餘並如故。仍編入册。命宣降。

王崇文劉仁瞻張鈞並本州觀察使制

敕。守邊之要在乎崇垣翰而重威令也。任能之方在乎因善政而加寵秩也。懋迪斯道。時惟令猷。金紫光祿大夫。檢校太傅。使持節。吉州諸軍事。守吉州刺史。兼御史大夫。上柱國。太原縣開國男。食邑三百戶。王崇文。儒雅飾身。威猛宣用。入奉旅賁之列。出申刺舉之能。光祿大夫。檢校太傅。使持節。袁州諸軍事。守袁州刺史。兼御史大夫。上柱國。劉仁瞻。沈厚有謀。明斷能理。護塞之略。歷任弗遷。光祿大夫。檢校太傅。使持

節歙州諸軍事守歙州刺史兼御史大夫上柱國清河縣開國子食邑五百戶張鈞踐履班行昭著聲聞
守土之效一心靡違而皆克樹乃勳誕揚我武協比成績勤勞王家朕以眇躬欽承鴻業實賴良將綏爰
四方肆于布慶之辰而有加等之命就升使職並駕兼車仍崇馭貴之封增立將軍之號併申寵寄尙示
克終無懈乃誠以底於理陟明有典予不敢忘崇文可光祿大夫依前檢校太傅使持節吉州諸軍事守
吉州刺史兼御史大夫充本路都團練觀察處置等使進封開國子食邑五百戶仍賜號威勇將軍散官
勳如故仁瞻可依前檢校太傅使持節袁州諸軍事袁州刺史兼御史大夫充本州團練觀察處置等使
封彭城縣開國男食邑三百戶仍賜號貞威將軍散官勳如故鈞可依前檢校太傅使持節歙州諸軍事
守歙州刺史兼御史大夫充本州都團練觀察處置等使進封開國伯食邑七百戶仍賜號武威將軍散
官勳如故

高逸休壽州司馬制

敕朝議郎行袁州司馬賜緋魚袋高逸休立身謹行聞於朝廷負才好謙老於州縣先皇獎異錫以銀章
優秩自居十數年矣其子情秉乃直筆爲吾史臣適當均慶之初先有腰金之命而愛敬之切發於中誠
乞循迴授之文庶遂顯親之義辭旨懇激覽之惻然俾允所陳且成其美仍加寵秩以就縣車噫望族舊
人惟爾而已觀本朝之恢復拖紫綬以優游孝子克家耆年致養茲惟盛事足慰爾心可檢校尙書水部
員外郎壽州都督府司馬致仕賜紫金魚袋

宣州營田副使兼馬步都指揮使李萼可節度副使罷軍職

敕王者官人之旨。必褒賢能而均勞逸也。列辟垂憲。予弗之忘。某官李萼。夙負壯圖。少爲裨將。餘勇可賈。有勞不矜。泗水剖符。邊候寧晏。宣城從帥。連營輯和。而將領之權。久煩耆德。毗贊之任。未極初筵。俾援尙齒之文。就疏加等之命。勉承朝獎。無替忠誠。可。

駕部郎中馮延己兼起居郎屯田郎中閤居常兼起居舍人

敕朕凝旒端冕。以臨萬邦。而左右史臣。執簡近侍。言動得失。注記無回。故布政罔不臧。承化罔不若。惟聖攸賴。慎柬難虛。某官馮延己。君子之儒。多文爲富。發之爲直氣。播之爲雄文。某官閤居常。行顯樞機。學臻精博。得廷臣之體。多長者之言。而皆踐彼周行。奉予元子。或奏記有翩翩之譽。或鱗疊多疊疊之談。藹然清風。叶此時望。是宜兼領郎署。咸躋掖垣。於戲。君舉必書。朕敢忘乎。恭己無德不報。爾忽怠於懋官。各振公才。副茲多訓。可。

侍御史王仲連可起居舍人監察米崇楷可右補闕

敕朕嘗思古先哲王。所以致理區中。垂憲萬祀者。蓋有史臣以記其過。有諫官以弼其違。或面諍於庭。或舉書於冊。故政令所及。罔不化成。而怠惰之心。無自入矣。將振斯典。必求其人。某官王仲連。爰藉才能。亟參秩序。正己而率下。盡節而向公。某官米崇楷。早負時名。尋升閤籍。佩韋以臨事。慎獨以修身。而並服豸冠。或司綱憲。或立朝多按劾之奏。或典刑有欽恤之心。叶我懋章。宜升右掖。勉修官業。以副簡求。直筆正言。無有所諱。可。

水部員外郎判刑部查文徽可侍御史知雜

敕秦漢以御史掌四方之記。我朝以雜端正百官之邪。其名則同。所職實重。副是慎選。其惟通才。某官查文徽克負美名。早從交辟。尋陟郎署。升爲王臣。法讞之難。俾其參決。而察情無不當。持論無不平。俾上絕濫刑。下知恥格。率是幹用。使持憲綱。在能振舉霜威。肅清朝序。爾其直躬而處衆。正色以當官。糾繆繩愆。無或顧避。陟明有典。可不懋哉。可。

左常侍張義方可勤政殿學士

夫珥金貂。直騎省。以備顧問。非不重也。而文學之選。宜又加焉。某夙號名儒。久登華貫。臺閣踐歷。聲實相符。侍極而來。當官無撓。朕祇奉先烈。勤求大中。諮訪闕疑。藉爾稽古。特加近職。以示開懷。順美彌遠。無忘讜直。

楚州刺史劉彥貞可本州觀察使

敕懋官之旨。非增秩不足以示寵。行邊之任。非進號不足以申威。施之其人。是爲令典。某寬厚得衆。深沈有謀。克荷家聲。累膺朝寄。百城觀政。三郡底寧。而長淮上游。地雄師衆。刺舉之職。未極當官。廉問之權。實諧僉議。因是敷寵。更佇厥成。噫。千里之長。三軍之帥。任遇斯重。勳庸是圖。爾其敬哉。無墮乃力。可。

外祖母追封某國夫人

敕昔帝欽明。義先敦序。九族旣睦。萬邦以懷。矧乃推自業之恩。疏漏泉之澤。有光茂典。式表孝心。外祖母李氏。麗德坤儀。垂訓內則。儲慶漸生民之什。顯魂開石窞之田。肆予眇躬。弗忘祇稟。而嗣膺鴻業。若涉大川。奉長樂以自寧。過濯龍而軫念。追遠之數。宜有加焉。是用進啓大邦。載崇懿號。昭示威里。知予永懷。可。

大理卿判戶部刁紹可工部尙書

敕周禮六卿皆有軍政漢制尙書奏事禁中歷代親重也如是今予有命亦屬其才某官刁紹始以幹能屢參煩劇向由卿寺踐歷省垣制國用而無違登生齒而有羨丕顯成績是爲才臣今朕祗嗣丕圖永懷司會俾率諸吏表於南宮爰陟冬卿式申慶澤爾其欽承彝訓修舉官司無忘克終以忝殊渥可

兵部侍郎張義方左常侍制

敕某珥貂服冕侍從獻替騎省之任也必以儒學大僚端方名士入膺茲選允叶茂章而爾義方可謂能矣踐歷臺省抑揚聲實純誠直道造次靡忘今予眇躬嗣守丕訓弗惠厥德思聞讜言乃均慶恩命爲常侍從容左右敬佇嘉猷爾其念哉無渝乃節可

太常少卿李貽業可宗正卿

敕先王睦親也必求宗姓之賢者朝行之名臣爲之表儀序其昭穆今我有命時惟舊章某官貽業學以潤身文以行禮貞以幹蠱直以事君有一於此是可嘉尙矧備四者非所謂名賢乎今朕嗣續丕基敷遵慶澤是用選於掌樂爲我司屬使吾宗室有信厚之風非貽業而誰勉修厥官無忝多訓可

左司郎中陳繼善可工部侍郎

敕國有六職百工預其一焉我朝已來其選尤重矧自尙書郎而擢拜者不其鮮歟某官陳某以幹蠱之才克御今上之美亟更庶尹遂歷省垣委之以繁雜之務而事益明兼之以樞筦之司而利不匱弘羊心計亦莫加焉屬朕出震嗣圖施令布慶二卿之任頗難其人今以繼善爲之爾其可以稱職噫大僚之體存

平簡易。興利之要在乎廉平。無淪乃誠。以撓吾法。可。

水部郎中判刑部蕭儼可祠部郎中賜紫

敕某官蕭儼。夫王者之爲政也。任能舉直。理刑懋功。如斯而已矣。今秋官卿佐皆闕。爾儼實專其司。定法察情。克舉攸職。切言直氣。屢聞於朝。靡私厥躬。何其愛朕之深也。方將圖效。適屬均恩。是用就升名曹。仍加命服。俾耀省闕。時予寵章。爾其念哉。無易乃心。無回乃行。決獄以寬簡。當官以公平。一心克終。予慎嘉汝。可。

屯田郎中李景進可工部郎中

敕某官李景進。昔漢館陶公主爲子求郎而不得。何者。非其人也。今汝景進。亦吾外戚。而謹愿儒雅。好學善言。久爲臺郎。頗副時望。故均慶澤。擢轉名曹。彼漢推公。而吾獎善。兩得其道。不亦宜乎。

徐騎省集卷第八

張援可司農卿制

李潯正授江都令制

潘處常可金部郎中制

高越可檢校水部郎中制

景達檢校司空制

景廸可檢校左僕射制

鄭延樞可清江縣令制

艾筠可江都少尹制

閻度可江寧府參軍制

馮侗可祕書省正字制

李景述可虞部郎中制

趙丕可司農卿制

成幼文可主客員外制

袁特可浙西判官制

喬匡舜可浙西掌書記賜紫制

查文徽可樞密副使制

顧彥回可浙西推官制

周弘祚可池州刺史制

鮑濤可虔州判官制

閻居常可檢校司空制

韓熙載可兼太常博士制

張緯可句容令制

高越可水部郎中制

趙仁澤寧國軍都虞候制

高弼可元帥府書記制

孔昌祚可泗州刺史制

方訥可東都留守判官制

田霖可東都留守制

張師古可校書郎制

王崇昭可江西觀察衙推制

沈翽可大理司直制

李匡明可中書侍郎制

翟延祚可水部員外郎制

唐顯可監察御史制

馮延魯可勤政殿學士制

林廷皓責授制

告天地文

祭世宗皇帝文

太府卿張援可司農卿兼大理寺事

書曰。任官惟人。又曰。惟刑之恤。朕服斯道。因舉而行。某官張援。爲性端方。處衆和雅。貞亮足以幹事。哀矜足以得情。亟更攸司。弗易時用。因予有慶。期爾盡才。命爲大農。俾掌廷尉。於戲。庶獄之愼。不可忘也。單辭而行。不可爲也。平反伏念。夜思晝行。尙於措刑。體我求理。敬之哉。

權知江都令李潯正授

勅。四京令之重也。其選惟一。是必試可以進之。均慶以寵之。蓋欲慎厥官而安其政也。某官李潯。屢爲長吏。綽有能名。東夏之理。不易其操。事簡俗便。予甚多之。爰用加恩。俾從真授。勉欽朝獎。無懈乃心。可。

和州司馬潘處常可金部郎中

勅。先王之制官刑也。過無所隱。其肆大眚也。善靡有違。無私之義。於是乎在。某早服時望。亟更臺郎。予在東朝。列于賓席。旋貳廷尉。實奉邦刑。偶違伏念之言。遽貽一黜之命。今朕祗嗣丕業。誕敷慶恩。豈以職事之愆。遂忘罇俎之舊。是用召自近郡。陟於南宮。勉承寵光。以永無咎。可。

浙西判官高越可檢校水部郎中賜紫

勅王者之建藩輔也。必命重臣以臨之。又擇賢士以佐之。政成當遷。留而增秩。古之制也。高越以儒學淹雅。見稱於時。頃自南宮。直于東觀。筆削之言。方勵弓旌之禮。是求從事大邦。率多婉畫。有嘉令望。爰屬慶恩。俾假正郎。仍紆紫綬。服我加等之命。無懈盡規之心。

安陸郡公景逵檢校司空太府少卿

勅夫太上立德。其次親親。能兼之者鮮矣。惟是具美。屬於我朝。某孝友資身。貞幹爲質。守樞機而無悔。居富貴而不驕。藹然善聲。成此嘉器。朕肇襲丕業。廣覃慶恩。矧有名臣。近在宗屬。是用假以空土。列於亞卿。仍進崇階。併示優寵。於戲。行爲民則。爾其勿忘。愛克厥威。朕不敢尙。服我多訓。永揚令圖。

保定郡公景迪可朝散大夫檢校左僕射賜紫制

勅朕歷選列辟。見其睦親名器之難。必當慎簡。信不可私於其屬也。故我疏寵。務先推公。保定郡公景迪。靜惟端方。動必孝敬。佩師友之訓。成信厚之風。宗室之間。聞望尤著。屬我嗣服之始。叶於立慶之恩。爾其率循令猷。惠迪前烈。勿驕勿惰。以永乃成。

左拾遺鄭廷樞可清江縣令賜緋

勅夫邑令之有聲者。入奉清列。諫官之滿歲者。出宰百里。蓋朝廷憂民立政之意也。某官早歷宦緒。無廢官常。擢參禁垣。克服彝憲。而南楚大邑。長吏尤難。命自周行。往宣朝旨。仍加朱紱。以示殊恩。無易乃心。勉修所職。

浙西判官艾筠可江都少尹

勅天下之大建親分陝以尹之東夏之重選能設貳以維之茲用安民而政舉也某官艾筠識量純素學術通明奉我東朝周知其善輟借侯幕載揚令名海隅之康筠有其力夫以亞尹之難如彼而有適用之才若此俾膺慎選不亦宜乎勉勵公方更施勤績

閩度可江寧府參軍

勅鄉貢明經閩度士子起家而預清級者蓋亦有之自非才地兼茂則不能光朝命而叶時論矣以爾名父之子自強不息學業履行實浮於名屬予出震之初成我多士之世俾掾天府以漸亨衢無忘益恭更揚令聞

馮侗可祕書省正字

勅五品子馮侗蘭臺圖書之府起家而預之自非有才孰克處此以爾早服嚴訓實揚令名勵學檢身如恐不及成爾嘉器富我士林俾授初資以漸清貫無忘詩禮之學以益刊正之勤可

舒州司馬李景述可虞部郎中

勅王者用士其要惟公苟得其才近親何避某官李景述承茂勳之後秉素士之風頗有美名聞於戚里郡丞之任爲久臺郎之位爲宜俾疏慶恩改授清級無忘師友之訓以奉朝廷之儀

江州判官趙丕可司農卿

勅王者之正百官也黜其有過其肆大眚也許以自新則邦典行而朝恩浹矣某官趙丕謹行以處衆克

勤以在公。臺省踐更。誠心不替。故先皇獎用。寄以華繩。而靡達官常。自罹常憲。朕續承鴻業。廣布慶恩。以其久列班行。偶因迷謬。特申渥澤。俾授正卿。勉勵乃心。佇揚令望。

江西推官成幼文可主客員外郎

勅諸侯之佐。命于朝廷。而治職有勞。奏課稱最者。則當升闈籍。補爲省郎。蓋勸能取士之旨也。某從事大鎮于茲累年。本以誠明濟之通敏。論不阿諂。政無頗邪。一方允釐。爾實有力。今予寵爾以立朝之位。命爾以司藩之官。爾其敬哉。無忝我陟明之典。

洪州判官袁特可浙西判官

勅袁特。朕以關輔之大。控制要津。出保傳之重鎮。之以屏王室。擇賓從之賢佐。之以齊政經。而特尹縣神州。理甚簡便。運籌盛府。言必端詳。叶於柬求。宜授斯任。夫潤之民。固與洪無異。而爾之操。當與初不渝。則官業允釐。而朝獎無替矣。敬服斯訓。往勵乃司。可。

洪州掌書記喬匡舜可浙西掌書記賜紫制

勅喬匡舜。朕以師傅之重。敬而不違。式遂便安。俾臨關輔。而軍旅之事。不可無佐。奏記之任。不可非才。聞匡舜以高文受知。以直道從事。歷歲斯久。弘益居多。故因其賓席之資。加以紫綬之貴。改轅東適。從吾上公。無替初心。以忝朝命。

知雜御史查文徽可起居郎樞密副使制

勅乘記言之筆。以待左右。受司聰之寄。以典出納。並居二職。其可非才。某官查文徽。儒雅表文。忠厚成質。

早踐華貫。時爲名臣。以南宮清望之資。當憲府雄極之任。提綱有序。而衆目以理。正身自處。而周行以清。物論與之。予用嘉尙。居中理極。不亦可乎。噫。爲朕腹心。注人耳目。執節一懈。悔咎隨之。爾其慎之。無忝吾命可。

潤州丹徒令顧彥回可浙西推官

勅。長人之吏。親職爲勞。觀風之佐。坐籌爲異。均其所任。是曰優恩。某官顧彥回。以清節士風。嘗參王府。以耆年篤行。出字齊民。課績尤異。自當優寵。馳驅州縣。非爲所宜。俾陟賓階。奉我元老。優游盛府。足以光華。

撫州刺史周弘祚可池州刺史

朕以將復滄風。務先理道。思得良二千石。以安吾民。儻副簡求。迭授大郡。斯蓋布政懋官之旨也。某官周弘祚。勳臣之子。雅有父風。自服佩恩華。踐更事任。訓齊武力。能得士心。綏懷邊戎。克壯兵略。俗阜秩滿。序勞當遷。朕觀其才。可謂良矣。青陽名郡。控制中流。前所任者。咸屬重望。今以授爾。爾其欽哉。進爵升階。式示兼寵。苟勤節弗易。池人來蘇。考績策勳。吾有彝典。

吉州判官鮑濤可虔州判官

勅。虔之爲鎮。俗雜地廣。化不可一。時生寇攘。萑蒲旣平。閭井思乂。可以佐吾良帥。而寧吾齊民者。亡聞。某官鮑濤。久倅列郡。克舉官常。從政以和。理劇無滯。況虔吉鄰。聲績素彰。便道之官。率舊爲用。副茲慎選。誰曰不然。爾其敬承。無忝明訓。

給事中閻居常可金紫檢校司空充廬州節度副使

勅王者推念舊之心。申優賢之旨。官序出處。從其所安。諒不可滯於一方也。某官閣居常。執心沖粹。爲學精博。修賢人之業。多長者之言。學予纂承。實重舊德。俾掌駁議。直于瑣闥。而無妄之疾未痊。貞退之請彌切。重違誠願。抑此朝恩。俾佐藩方式。便頤養。金印紫綬。邦土憲司。併申寵光。以示優渥。陟明之典。當俟有瘳可。

虞部員外郎史館修撰韓熙載可太常博士

勅某官韓熙載。朕以因心之感。同軌有期。嚴恭禋祀。仍從此始。求所以節豐儉而振廢闕者。屬於禮官。慎選其人。必在時彥。以熙載學問精贍。辭氣亮直。本以通識濟之奇文。惟名與實。咸副是命。故輟自東觀。列于曲臺。使代稱禮樂之盛。吾實有望於爾。勉之哉。

虞部員外郎史館修撰張緯可句容令

勅爲政之要在乎安民。長人之吏在乎慎選。故吾用古道。擇尙書郎而命之。某官張緯。學問該通。辭藝精絕。自東朝載筆。石室抽文。朝論藹然。以爲名士。矧又洞識理體。周知物情。是爲通才。何適不可。王畿大邑。旣庶而富。藉爾敏惠。爲吾教之。仍假臺郎。以申朝獎。苟聞報政。豈慙加恩可。

浙西判官高越可水部郎中

勅多士之世。副臺郎之選者。前代謂之賢。乃知三署之屬。例無輕授。某官高越。早踐朝序。嘗爲史臣。當官有聲。聚學不倦。頃屬上將。出臨大藩。輟參入幕之資。備觀理劇之用。府罷赴闕。時名益高。司川之秩。俾從眞授。無忘職業。以荷朝恩。

左監門將軍趙仁澤可寧國軍都虞候

勅南藩之寄宣城爲最師勁而衆地近而雄故朝命列校以貳軍事所以重其威令也某官趙仁擇名將之子頗有父風在軍積年武略精練出寧大邑歸預禁營副予簡求俾隸宣部往綏乃績無替前勞

左司郎中高弼可元帥府書記

勅某官高弼王者之用師也必先以文告之命訓誓之辭故戎車之往記室爲重而朕前委愛弟實司邦政今命爾弼使典軍書任才責功其意斯在矧弼嘗參西掖尋履南省所歷之任籍籍有聲今能奮雄辭而塞慎選陟明之典予豈忘哉

左領軍將軍孔昌祚可泗州刺史

勅左領軍衛將軍甲仗宮城營造等使孔昌祚朕以長淮北偏隔閔戎夏惟彼泗口實當要衝凡爲守臣罔不慎選而昌祚以貞幹事以勤懋德周廬巡徼之政宮禁繁劇之司董齊典禮靡有違者歷歲且久秉心不渝朕觀其才可爲邊將授以符竹付之臨淮爾其揚我武威修乃郡政登于考功之籍以塞任能之恩可

水部郎中方訥可主客郎中東都留守判官

勅某官方訥朕以分陝之任非親賢不可故迭用子弟以居守復以佩臚之齒唯訓導是務故慎選名德以從行而朕在東朝先皇命爾訥列我賓席恭慎文雅抱其風度將順規諷揖其忠誠尋又奉子愛子益固是道今所授任非訥而誰客曹正郎留臺幕職往示兼寵爾其敬哉乃心不渝懋典寧忘

祕書郎田霖可東都留守巡官

勅某官田霖。朕命愛子。表正東夏。管記之任。罇俎之間。唯才與行。乃可是選。而朕在儲貳。則嘗知霖。文藝直心。綽有餘裕。累參載筆之任。近登祕籍之司。列於王官。頗叶時望。故授以留臺之職。副茲託乘之求。爾往敬哉。無忝予命。

前山陽縣尉張師古可祕書省校書郎

勅王者之行慶也。獎能振滯。赦過責功。如斯而已矣。某前爲縣佐。以公事罷免。而聞其立身修己。有足多者。故從其滌瑕之命。升諸祕籍之司。往服乃官。勿重而悔。

江州錄事參軍王崇昭可江西觀察衙推

勅某官王崇昭。西南大藩。庶政繁會。訟獄之理。欽恤是先。重輕一墜。手足無措。必得朝士以典掌之。而聞崇昭可當斯任。往蒞乃職。無忘益恭。

前舒州錄事參軍沈翺可大理司直

勅某。蔭籍從任。以儒術資身。蓬閣曳裾。早揚聲聞。侯藩載筆。亦懋勤勞。向事圭符。實司綱紀。州縣之職。非其所長。既失儀刑。遂從罷秩。今慶賞斯浹。一旨咸矜。復爾名籍。俾參棘寺。吾不記過。爾其自修。

前舒州刺史李匡明可中書侍郎

勅朕以不德。恭承丕基。思聞獻替之言。以自開悟。故以侍從之列。尤用簡求。矧乃職奉詔命。地參公輔。歷代精選。可虛授乎。某以風度爽邁。克嗣遺今上御名。以文章弘雅。累踐清途。先皇器之。任遇尤重。故其冠翰苑。

掌天官長憲臺。肅千里靖恭于位。績用有成。舒人既康。執璧來覲。宜加疏等之命。擢爲鳳閣侍郎。敬之哉。出爲諸侯。非不貴也。入首三品。非無位也。持重足以鎮物。納忠足以報我。匡正不逮。予有望焉。

歙州觀察推官翟延祚可水部員外郎

勅某以外諸侯吏入爲尙書郎者。非推恩酬勞。何以臻此。聞爾宰百里。佐廉車。皆有政能。宜當選任。往祇乃事。無忝予恩。

大理司直唐顯可監察御史

勅某夫御史之列。皆一時之清選。而貴仕所由漸也。開爾執心有常。從事以直。持刑甚平。允當官有勤勞。故升諸朝廷。俾之察視。爾其懋乃才用。修我紀綱。無傾側糾訐以爲能。無依阿顧避以自守。勿貽爾悔。以忝予恩。

禮部員外郎馮延魯可中書舍人勸政殿學士制

勅侍從庶職。總同清要。若乃參書殿之列。備切問之重。使如綸之命。式光人文。無詢之言。不入吾耳。所寄若是。其選可知。某惟望與才。皆副是任。況東畿亞府。有理劇之用。南宮禮典。多伏奏之勤。俾膺簡求。必叶虛佇。夫前言往行。爾所祇服。正辭讜議。予之嘉聞。無從非彝。以忝多訓。

筠州刺史林廷皓責授制

勅恥過作非。言不顧行。爲臣如此。在法難容。某頃自歸朝。頗推有勇。俾之爲將。所以圖功。及封疆多難之時。車徒四出之際。遂能激揚壯節。指麾師旅。付以圭符。而畏懦屢聞遁逃。不暇震驚城守。詿誤軍謀。當此

之時已宜行法。予以義深罪已。功在止戈。既屈身以弭兵。乃含垢而務德。復移郡寄。仍縮使權。苟奏課之有聞。亦在人而何棄。未終考績。爰撥訟辭。猶且累上表章。屢言今上御名。陷洎遣制使。明徵其辭。乃自滌揚罷郡以來。筠州移任之後。侵漁公帑。積數且多。干犯詔條。爲罪不一。證據明具。詞理並窮。殊不省非。更爲文過。謂競廝養爲恥。以對獄官爲羞。欲蓋彌彰。侮我何甚。其武勇也。旣如彼。其誠心也。又如此。倘猶弘恕。何以律人。尙以君臣之間。務全終始。特從薄貶。庶克自新。勉荷寬恩。無重而悔。

告天地文

臣以寡昧。叨嗣慶基。對越上玄。申養長樂。側身恭已。靡敢荒寧。而聖尊后。自夏秋以來。寢膳違裕。醫藥備竭。禱祠畢致。數月於是。有加無瘳。憂勞之誠。不知所惜。敢陳蠲潔。仰告威靈。伏惟精懇上通。玄恩錫佑。哀臣烏鳥之志。憫臣欒棘之心。使六氣惟和。百祥薦降。冀於旦夕。速就康寧。臣內顧眇躬。弗明於道。方深慈訓之益。欲報劬勞之恩。烝烝之懷。區區於是。隳瀝肝膽。以俟鑒臨。

祭世宗皇帝文

稽古靈命。造圖伊始。聖人旣生。萬物咸理。玄功格而高謝。令聞垂而巳通。玉帛于無外。執豆籩而萃止。蓋百代之不易。言皇猷之至美。恭惟盛德。乃聖乃神。爰初纘服。舊邦惟新。瞻顧函夏。實始經綸。三驅示禮。四載彌勤。濟之以武。守之以文。降鑿迴慮。全國庇民。旣戢兵而禁暴。咸服義以歸仁。功成理定。返樸還淳。羣賢在位。百度惟貞。方將致宣王之薄伐。焚老上之龍庭。還師衽席。檢玉云亭。何祝壽之無感。忽綴衣之在辰。嗚呼哀哉。神祔軒工。化流南國。率感義以孺慕。共銜哀而膈臆。日月以之匿曜。煙雲爲之改色。痛輯

瑞之長違。恨攀髯而不得。嗚呼哀哉。永惟下國。獲嗣餘基。奉天光而不早。順文告以何遲。仰電霆之震。以警其失。賴陽春之澤。以赦其迷。既賓禮之加厚。亦恩情之過私。大信有千齡之固。承歡無再稔之期。覽訃書而慟絕。捧遺賜以漣洏。嗚呼哀哉。集同軌於七月。遏八音於四海。喬山之冠劍長掩。灞涘之川源不改。收薦忠信。敬陳脯醢。庶有感而必通。願降神而如在。

徐騎省集卷第九

光穆后諡册

封保寧王册

追封許國太妃册

蔣莊武帝册

追封安王册

追封豐王册

劉仁贍改封越王册

慶王進封陳王贈太尉册

追贈留從効父册

昭惠后諡議

光穆后諡册

維年月日。嗣國主臣某。再拜稽首言。臣聞體厚德而母萬物。存乎尊位。騰耿光而蕃百世。繫乎鴻名。繼統
廣業。莫斯爲重。顧惟小子。懼忝貽謀。對越祖宗。敢揚公議。伏惟大行聖尊后。姜任顯族。皇英茂德。作合元
聖。長發祥符。秉婦禮於儲闈。正嬪則於四海。孝心天賦。惠問川流。祚啓重熙。尊歸理內。率循陰教。欽若皇
猷。順承利坤元之貞。輔佐流周南之化。慈撫公族。仁懷六宮。清淨廣于真風。戒慎刑于外戚。用能永錫繁
祉。弘濟多難。保佑冲人。克荷不御今上名。仰繫慈訓。方恢景福。靈臺告祀。永樂長違。罔極之懷。觸緒荒殞。恭惟
尊名節惠之典。載考儒臣。禮官之稱。咸以爲光大孝悌之懿。肅雍賢德之盛。昭映前烈。垂示無窮。列辟承
式。弗敢失墜。謹奉玉册琮寶。上尊諡曰光穆皇后。伏惟威靈如在。鑒茲緝禮。延九廟之積慶。與二儀而長
存。嗚呼哀哉。謹言。

封保寧王册

維保大元年八月丁未朔某日。皇帝若曰。稽古夷庚。祇叶皇極。建侯樹屏。保乂王家。用能乘運會昌。歷世重光。先哲所以啓後。列辟所以時憲者也。我思立愛。宜有加焉。咨爾二十弟某。中和萃靈。寬裕成德。戲必俎豆之禮。學無城闕之遊。聰明仁智。仰遵前訓。孝友姻睦。率由生知。昭此玉音。應于麟趾。朕以不德。凜乎丕承。文武之功。期無獨享。契龜胙土。仰爲舊章。今使使某官某。持節册爾爲保寧王。食邑二千戶。敬之哉。昔我文考。對越上帝。敷佑下民。克儉于家。無縱于逸。再造之業。與世無窮。予以爾有邦。膺受繁祉。今爾尙迪遺烈。保終令圖。無從非彝。無狎非正。考是聽訓。典是師綏。寧乃封。以永元吉。

追封許國太妃册

維保大三年太歲乙巳。七月乙未朔某日。皇帝若曰。昔在徂后。法象天明。旁求淑女。式敷陰教。並建內職。以麗外朝。故其先德之舉。顯魂之命。比爰庶尹。無不及焉。蓋敬終貽後之旨也。咨爾故汝南郡君周氏。恭儉執中。明智資性。頃諧法相。入奉先朝。紘綆之勤。夙著于彤史。湯沐之寵。竟飾於泉扃。粵予纂承。祇稟茲訓。家道旣正。國風以理。仰蹈成式。永懷舊人。是用釐舉闕遺。追崇名數。昆吾舊宅。太岳全邦。申畫四封。以光懿德。今使使某官某。持册封許國太妃。嗚呼。令聞不忘。盛典無替。昭昭復魂。聞予此言。

蔣莊武帝册

維年月日。皇帝若曰。稽古皇極。訓民事神。詔大號以崇正直之威。垂大名以紀昭明之德。性幣有數。典禮不愆。政是以和。神降之福。莫不由斯者已。若乃以死勤事。沒而不朽。流光儲祉。蔣帝有焉。惟帝冥符靈氣。

孕毓玄造。嘉猷雄略。昭映前人在昔。潛耀大川。躍鱗下邑。著艱難之節。所以事君。彰變化之神。所以顯俗。惟德是輔。感而遂通。建福會昌。以戡時難。豐功厚德。以享帝郊。史臣執簡于無窮。工祝正辭于不絕。顧惟寡昧。祇嗣龐鴻。敢忘人謀。以叶靈貺。瞻言神岳。作鎮皇州。興運惟新。禎符丕顯。而位極于炎昊。名謝於康惠。墜典未舉。予用慊焉。濮陽諸姬。實纂服之舊邦。尅亂除害。乃庇人之盛業。合爲禋禮。申告祠庭。今使使某官持節奉冊。追諡曰莊武帝。嗚呼。丹青懿烈。光光如彼。簡冊廟貌。昭昭如此。永爲民正。無乏神主之望焉。

追封安王冊

維年月日。國主若曰。稽古大猷。啓迪來裔。藩翰之寄。重事也。不以親屬爲嫌。寶玉之分。盛典也。不以死生易節。昔在有魏。蒼舒早世。降及我唐。子雲無祿。咸用追啓王社。飾于泉扃。垂爲憲章。肆予遵舉。咨爾某。稟信厚之德。持謙下之資。在傅不勤。爲善最樂。烝烝孝敬之性。恂恂友悌之風。及苴茅北藩。授任殿省。別六尚之名物。參九伐之政令。行以正直。持之公平。諸御知方。羣校競勸。職修事舉。朕甚多之。爵止極于公封。位未登於六事。流光不待。時望慊焉。申予有慟之懷。加爾飾終之禮。冬卿峻秩。楚澤全封。丕舉茂章。永光餘烈。今命使某持節冊贈工部尚書。封安王。嗚呼。延吳之懷。予用多愧。問平之德。人其識諸。簡冊無虧。丹青不泯。昭昭復魄。亦克知之。

追封豐王冊

維年月日。國主若曰。名器之重。典冊之崇。不以親疏爲嫌。至公之舉也。不以死生易節。歸厚之道也。先哲

彝訓我儀行之。咨爾某。挺岐嶷之姿。稟山河之秀。亦既就傅。時惟老成。迪祖宗之猷。不愆不忘。奉詩禮之學。惟幾惟勤。公室所推。藩屏攸寄。秀而不實。凋此妙齡。天性所鍾。永悼何已。眞王異數。護寒雄藩。舉爲寵章。飾彼幽壤。今命使云云。嗚呼。分以寶玉。直以白茅。弗及圖功。猶足表德。尙爾不昧。知予此心。

衛王劉仁瞻改封越王册

維年月日。國主若曰。忠臣之事君也。歿且不朽。王者之念功也。久而弗忘。故賢哲膺期。風烈所及。千載之下。若旦暮焉。矧先朝舊臣。藩方賢帥。雄名大節。震耀區中。粵子纂承。敢忘褒寵。咨爾故某。命世英傑。奔葉動庸。便蕃寵遇。茂著聲實。間者輟自離衛。鎮于壽春。導德申威。罔不率俾。國步中梗。邊烽載驚。介然孤城。橫制險地。威略所奮。以戰則靡亢。恩信所加。以守則彌固。社稷是衛。豈惟封疆。嗚呼。壯圖中奪。而英氣動於二國。奇表長謝。而忠規流於百代。肆我文考。爰極寵章。崇爲帝師。建以王社。大名備物。無不及焉。咨予小子。敬想先正。聞繫之感。斯極。飾壤之禮。未行。是用越于彝章。再光贈典。山陰大國。會稽遺墟。申畫四封。永旌懿烈。今遣使某官持節。改封越王。嗚呼。忘身殉國。其至如彼。慎終追遠。其厚如此。永錫繁祉。子孫保之。

慶王進封陳王贈太尉册

維年月日。國主若曰。古稱王者之貴。必有兄也。豈不以在原之助。義切於邦家。陟岡之恩。情均于存沒。自非贈飾之寵。寧申敦敍之懷。稽迪前經。式揚盛典。咨爾某。受天正氣。爲國宗英。器量川停。機神秀出。縱橫之智。發爲事業。儒雅之度。播爲文辭。自錫壤侯藩。調兵蘭錡。行令惟一。撫下惟仁。周慮不驚。宸極甘寢。天

覆形於鍾愛時望極於維城景命不融儀表長謝壯圖大略嗟時運之難并遺文餘烈綿歲序而常在粵予小子祇荷不御今上奉慈訓于長樂頒分器于懿親友于之恩追懷何已是用修嚴禩禮申告九原以王有文雅之稱故改封於陳社以王有重厚之器故建號於上公光昭令猷永垂不朽今命使某云云噫花萼之遊宛成今昔寶王之數遂隔平生尚想明靈鑒茲永悼

追贈留從効父册

維年月日國主若曰立身揚名君子所以顯父母也慎終追遠王者所以厚風俗也政之大者其可忘乎咨爾清源軍節度使留某父贈鄜州都督彥雄行當於躬量韜於世修誠明而應物積善慶以流光實啓高門誕生賢嗣建節風雲之會致身藩翰之權清寧一方表率羣后歲勤職貢恭守朝經位崇帝師勳在王府向非稟訓有自膺期而生則功勳所昭何以及此雖褒贈之典已賁於九原而督護之名未光於大府俾加緼禮薦洽朝章今遣使云云持節册贈爾爲潞州大都督於戲節鉞之貴命屈於生前典册之崇禮符于不朽既足以光爾之有後亦所以表予之推恩昭昭有靈知我斯意

昭惠后諡議

臣聞廣莫極於坤元則含容光大擬議著焉尊莫隆於王后則窈窕思賢詠歌發焉是以上德無名而稱謂流於百代至道無象而儀刑表於萬方此固天理出於自然聖人所以無避者也矧惟節惠之禮百王盛典述德之議史臣至公誕昭耿光敢揚懿德伏惟大行國后生商遺烈安劉積慶淑質奇相惠問英才光映台華作儷公族紹隆藩闈載輯儲闈世子專寢門之禮孝心不匱大君以家人之慶天覆有加誠由

肅雍之德。叶此睦姻之盛。言內則者。以爲美談。及屬運飛天。尊歸配地。嚴恭匪懈。稟母儀于上宮。慈惠積中。率婦道於天下。澣濯是服。而六衣有煒。環珮中節。而九御有倫。思脫簪之誠。以成憂勤之政。躬大練之飾。以輔純儉之風。陰教旣孚。王化茂遠。方輿告變。椒風永闕。慟結長樂。哀纏紫宸。龜筮叶從。攢塗將啓。旌德之號。彤管斯存。若乃山河表德。而文之以禮。金玉其相。而守之以恭。垂訓以慈。進賢以哲。至於誦經習詩之敏。審音知樂之明。超然遠識。夙絕終古。勤行孝養。下自從化。故寬裕懷於六宮。天資明惠。學無不通。故遺愛鍾于宸眷。載稽具美。實光前烈。謹按諡法。德禮不愆。容儀恭美。皆曰昭。慈哲遠識。寬裕遺愛。皆曰惠。仰惟實錄。足表鴻猷。諡曰昭惠后。謹議。

徐騎省集卷第十

武成王廟碑

武烈帝廟碑銘

筠州清江縣重修三清觀記

武成王廟碑

蔣莊武帝新廟碑銘
重修筠州祈仙觀記

下臣伏讀前史窮探政經莫不以兵戰爲危事目干戈爲凶器異達人之格論蓋曲士之常談若乃上考
洪荒遐觀擬象九疇垂範何嘗棄從革之功五緯麗天詎可淪長庚之耀春生夏長非秋無以收成雷動
風行非霜不能肅殺先王設教疇敢渝之垂衣裳以正其本爲弧矢以申其用坂泉戡亂所以見軒后之
神明丹浦庇人所以成帝堯之光宅七旬來格本由舞羽之仁八百同辭始自葬枯之惠故修文廟堂之
上者武功之始折衝千里之外者文德之形好仁而忘兵則西夏偃王以之而殞恃力而棄義則夫差羸
政由是而亡乃知文德不修則武功不立武功不試則文德不昭相須而成其揆一也故立其教者謂之
聖大其業者謂之賢聖則應天順人西伯受代殷之任賢則開物成務太師有佐命之功當其偃息朝歌
盤桓渭水量恢宇宙旣處困而能通才冠生民亦俟時而後動雲雷之屯已今上御名天人之契冥符歷數有
歸君臣相遇投釣而起同車以還尊爲王者之師我無慙德加之百姓之上人絕異言大矣哉聖哲膺期
無得而稱已故能式遏亂略大拯橫流把白旄而誓師操黃鉞而助斷解倒懸之困釋比屋之誅大統旣

集天保已定。然後式廬表墓。歸馬放牛。申義風于夷齊。授成事於旦奭。宏開四履。高視五侯。及其德澤將衰。風流已遠。猶使紀侯。大去不遺。九世之讐。周室既卑。更賴一匡之業。自非道充四表。功濟三才。孰能不顯烈光。若斯之盛者也。其後聖人既沒。真風漸漓。戰國如焚。羣生殄瘁。先王利器。舉爲爭奪之資。闕里諸生。率用縱橫之說。遂使中都憤歎。聿興未學之詞。柱史傷嗟。始發不祥之論。流遁忘返。積習生常。則我武漢之晉。將墜於地。夫至公所以應羣動。上德所以綜萬殊。達其旨則左右咸宜。迷其本則弛張兩失。自漢參霸道。魏濟姦雄。藐爾千年。荒哉七德。國家參墟發命。扈水膺圖。羣黎興後。后之辭八表。有宅心之地。高祖奉天。革政扇牧野之高風。太宗屈已。師臣躡渭濱之盛軌。施其法則致其報。入其國則思其人。貞觀年中。始于礪谿立廟。玄宗祇若先訓。奮發神謀。平內難於女戎。嗣鴻圖於代邸。永言遺範。重事嚴禋。開元中。詔京師及天下州府。並立太公廟。著良辰於上戊。抗辨禮於虞庠。而復歷選前修。式崇配享。得其體者。參入室升堂之列。蹈其跡者。儼攝衣函丈之容。穆矣皇風。煥乎甲令。肅宗來朝。走馬初嚴。避敵之師。九五飛龍。遂荷在天之命。澆戈既戮。商奄猶驕。方資戡定之勤。更舉褒崇之詔。禮尊南面。位極真王。取其大告之稱。以定易名之典。代歷之闕。文備矣。聖皇之能事。烝哉。故得靈鑒孔昭。羣臣競勸。諸侯供職。函夏同文。中興之功。配天齊古。雖復運逢興替。時有安危。造周之德。既隆。思漢之人。常在。烈祖沉潛。剛克。神武有徵。靜氛。癘于蕭牆。功高庖正。掃機槍於丹徼。業茂賓門。由是四海樂推。三靈眷命。光復舊物。洪惟至公。大道將行。皇猷累洽。今上允文允武。克長克君。自出震見離。發號施令。雷行天下。豐宜日中。信及豚魚。仁霑行葦。若夫尙齒尊賢之教。宵衣旰食之勤。制禮作樂之文。返樸斲雕之質。固已紛綸帝錄。掩映瑤編。猶復叶比。

臧謀曠咨庶政以爲五材並用廢一不可天下雖平忘戰必危是故簡萬乘之人申九伐之令六官聯事
百度惟貞副君以介弟之尊當撫軍之任威而不猛動必以仁大元帥齊王明德茂親由諸王而宿衛副
元帥燕王敦詩說禮以長子而帥師用能啓迪大中張皇下武其餘西京名將霧集星羅北府奇兵颯馳
電驚並列雲臺之像咸開長水之營地利人和思深慮遠域中無事則用之於進賢興功四方有變則用
之於弔民伐罪故出車甌駱則係以長纓鞠旅衡湘則舉爲內地皆所以拯其塗炭之患息其沉闕之爭
非徒誇大兵威兼并十宇而已至於篋竹萑蒲之聚田昭屈景之宗或粗舉先聲或聊分偏校莫不厥角
稽顙請命卽刑吏不絕書野無遺寇斯乃聲明文物之外廟堂帷幄之間思未半之功已倍矣加以爲而
不宰讓德於天潔粢豐盛靡達於時事春蘭秋菊遠被于無文乃顧戎韜式嚴邦政以爲三王四代之事
罔不從師前哲令德之人必將崇祀列聖盛典實啓孫謀乃復舊章爰作新廟于是宗伯建位梓人授規
入端門而右迴旁太學以西顧瞰康莊而列屏因爽塏而營基他山之石咸移中伐之材畢萃成之不日
自比靈臺揆彼方中寧慙楚室崇堂屹以特起高門豁其洞開筵有籩豆之區階有賓主之位干戈在序
鐘鼓在庭繹然觀藝之場藹爾致誠之地春秋二仲時和氣清醴醎交羞牲牲不疾鶚冠礪劍展告虔薦
信之儀玉戚朱干儼象德達神之列中軍元帥出建靈旗六郡良家來登勇爵旆旌饒吹桓桓推轂之威
金石絲簧穆穆燕毛之序觀之者亂臣知懼比夫漢尊黃老詎臻清淨之源秦用刑名徒有刻深之弊中
庸之德其在茲乎嗟夫聖人沒而微言絕王澤竭而頌聲息奚斯露寢諸侯之事何觀吉甫清風衰世之
音孰尙豈若帝圖光赫聖作宏新人知鼓篋之方家識止戈之漸固可著之金石列在鼎彝微臣學愧常

師用慙兼備。承明再入。固無經國之才。宣室徵還。幸對受釐之間。將使延州聽樂。長聞雅正之聲。圯上受書。世出帝王之佐。敢揚丕訓。敬勒貞珉。其銘曰。

於惟基命。建用皇極。實有武備。以昭文德。弗惠弗迪。是糾是殛。天地剛柔。惟帝之則。是則是傲。文王武王。惟師尚父。時惟鷹揚。匡正天下。綏爰四方。微禹之烈。于湯有光。肅肅牽牲。皇皇表海。簡禮從質。因民不改。難老曰壽。專征爲大。泱泱之風。至今猶在。大道旣隱。明王不遭。走鹿爭逐。賴魚告勞。泯若四履。紛吾六韜。我思古人心。焉切切。天或愛民。物無終否。率此叛國。歸于聖帝。自葛初征。至牧乃誓。君子萬年。本枝百世。鴻圖再造。二聖重光。亦旣大賚。寧惟小康。六事允釐。四維孔張。夢寐卜獵。咨嗟釣璜。虎踞之陽。龍藏之渙。爰作新廟。畢崇明祀。設榘交戟。朱門納陛。嵬崑穹崇。重深奧祕。名光大告。禮重眞王。侑神祀食。入室升堂。威儀文物。容貌采章。列聖有作。茲焉不忘。膠庠旣成。教義旣明。三湘卽序。百越來庭。馬無南牧。人怨東征。烈烈政典。洋洋頌聲。商郊車騎。灌壇風雨。績用不泯。威神若覩。鏤金石以表德。荐馨香而受祜。春蘭兮秋菊。無絕兮終古。

蔣莊武帝新廟碑銘

臣聞南正司天。授宗祝史巫之職。春官掌禮。詔犧牲玉帛之儀。首所以別類人神。統和上下。三時不害。力穡以之。普存百物。阜安薦信。猶其多品。用能舉明德。而徵景福。播和樂。以致靈祇。三五已還。皆是物也。若乃渾元宣氣。山岳成形。雲雨於是乎生。財用於是乎取。故有毳冕之服。璋邸之符。或以肆瘞垂文。或以廢懸著法。虞舜聖帝也。而有徧于之祀。周武明王也。而有惟爾之祈。至于枋田高邑之都。蕩蒞桑封之秩。稽

稔有羨。蘭菊無虧。大典奇篇。論之備矣。後王徂帝。聞斯行諸。金陵山者。作鎮揚都。盤根福地。時天險之左。次瞰臺城之北。隅陽嶺前。瞻包舉青林之苑。陰崖右轉。經營玄武之池。絕巘嶽岑。蔽虧日月。深岩窈窕。吐納風雲。層臺累榭。臨其巔。湧泉清池。湛其下。白鹿麕麇。騰其藪。鴛鴦雛孔翠。栖其林。豫章杞梓之材。橘柚楂梨之實。赭堊丹青之美。錫銀金碧之饒。固以事異假珍。富兼諸夏。登于軌物。掌以虞衡。矧復奇怪中潛。綱縑上屬。真人來應。瘞雜寶以祈年。智士攸同。指盤龍而建國。亦何必嵩工發峻。始號降神。岷嶺騰精。獨稱建福。自時厥後。代富靈遊。刺史還都。卽有栽松之地。諸生肄業。非無講學之場。岫幌雲關。訪徵君子。幽谷鹿巾霞帔。集道侶于中林。斯亦羣帝之密都。先王之册府者也。在昔霜鍾細品。猶淹耕父之居。反景微光。尙駐長留之駕。況乎皇州列岳。宅怪儲靈。不有吉神。孰司陰隲。蔣帝孕清明之氣。稟正直之資。實九德之所生。與五龍而比翼。自西江考績。謝聯事於玄夷。北部申威。輯庶功於黃綬。于時祚終四百。運偶三分。夫懷塗炭之愁。家有剝廬之痛。帝則勤勞狗物。慷慨憂時。旣援張敞之桴。卽振李崇之鼓。赤心未盡。執漢節以忘生。青骨難誣。降北山而受享。飛蟲顯俗。生民之舒慘焉。依白馬耀奇。平昔之威容如在。故使中都之印。式報陰功。長水之營。旁旌同氣。廬宮改命。非因介子之焚。廟貌崇壇。詎比愚公之徙。自是光靈茂遠。代祀綿長。或昭德而致祥。或害盈而降罰。黃旗紫蓋。奉五馬之禎符。朱鬣碧蹄。殄高山之亘盜。賢如謝傅。猶繫草木之形。親若始安。亦假弟兄之助。故得王封錫羨。帝服歸尊。追炎昊以齊稱。躅虞黃而接武。事光典册。惠浹幽遐。任水木之遞遷。顧高深而自改。國家綠圖受祉。黃鉞庇人。分二牧於土中。包九有于宇下。雖十聯百里。兩更守宰之權。而四望五郊。不易宗彝之數。及威儀暫失。龜鼎中遷。瀛海颺迴。坤輿幅裂。而盤

礪之際。常奉周正。封域之間。獨爲漢守。衣冠舊族。宛洛遺甿。咸趨懷德之鄉。共免永嘉之亂。終使皇天眷祐。百姓與能。克昌再造之基。奄有六朝之地。烈祖功踰嗣夏。體濬哲而致中興。皇上德邁繼文。懋元良而恢下武。格天光表。慰率土之歌謠。累洽重熙。漸羣黎之肌骨。所以珍符總至。靈命畢陳。極金篋以標年。盡瑤編而紀瑞。襲於六藝。貫彼三墳。矧復聖作無方。神謀不測。殷周損益。文武弛張。制在先機。申於後甲。百吏奉行而不暇。兆民日用而不知。帝典恢弘。天文貞觀。攜華發藻。扶躡披覽。丹浦非好戰之師。兩階有誕敷之舞。坐知千里。廓清五嶺之氛。役不踰時。底定七閩之難。國風王澤。自北而南。樹立之權。由來尙矣。康無專享。止崇藩屏之封。穆弔不咸。但著急難之咏。未有極至公之舉。正太弟之尊。大義鴻猷。如今日之盛者也。副君膺則哲之寄。有聖人之資。由上德而貞萬邦。用英才而總百揆。麗正繼明之業。仰奉宸謀。持謙敬客之心。俯懷庶品。則有齊藩上寄。紆盞綬而握兵符。燕邸真王。珥貂冠而掌宮籥。周公則武王之弟。夏啓則吾君之子。故能緝熙帝載。寅亮天工。晏平仲之論和。北宮子之謂禮。自家刑國。草偃風行。上下之際。旣交華夷之情。如一。黑齒奇肱之俗。款塞來王。碧嵩素滄之濱。除宮望幸。后夔典樂。已播薰絃。司馬進稱。行陳祕檢。功旣隆矣。德亦厚矣。尙復往而未止。謙以益尊。政靡不修。思無不及。以爲無文。咸秩訓誥之格。言明祀是崇。春秋之大義。農祥晨正。豐絜四馳。密雲不雨。馨香並薦。載紆容鑿。爰顧遺祠。詔曰。蔣帝受命。上玄。奠職茲土。力宣往代。澤被中區。所謂有益於人。以死勤事者也。今號位已極。名謚弗彰。闕典未申。朕甚不取。其以勝敵克亂之業。爲民除害之功。因姓開國。追謚莊武。仍令有司。修寢廟。備制度焉。於是卽舊謀新。審形面勢。農工告隙。營室方中。或懸水以爲規。或飭材而攻木。搏埴之工。麇至。坊塤之伎。星羅徑術。

常夷靡薙王孫之草。荆榛舊闢。寧誅宋王之茅。百堵齊興。旬歲而畢。繚垣十里。重屋四周。樹文玉於庭中。交枝蠶靡。挺開明於闕外。詭狀髮鬢。納陸逶迤。碧疊元州之石。橫梁天矯。雪披後渚之梅。豁朱戶之曠曠。陽光不夕。闕深宮之靈霽。暮靄常霏。堂上布筵。楹間設奠。管磬鐘鼓。羅于下。籩豆簠簋。肆於前。再變之音。克諧。永貞之祝。無愧。神光倏忽。捲服連蜷。孔蓋翠旌。若有來而罔覲。蕙肴蘭籍。若有去而不亡。用是高揖。靈玄。永司純嘏。魍魎魑魅。豈煩夏鼎之圖。風雨雪霜。無待桑林之禱。則知民和而後降福。事理而後不祈。人祇之間。如斯而已者也。粵若先王命祀。神道教人。前哲令德之流。九魁六宗之類。或以公族視秩。或以戶邑奉祠。子晉之爲帝賓。真階匪極。傳說之騎龍尾。景耀未融。斯皆地勢本高。升聞易達。詎有權輕五校。壤狹一同。而能比敬軒臺。分光堯日。縱質文之迭改。代奉典章。及聖哲之不承。更加崇飾。故金簡玉字。與王之統可尋。兩騎五車。受職之期。斯在。雖將歷選。安得同年。昔者崑閩窮遊。尙紀白雲之什。燕然薄伐。亦陳玄甲之銘。孰與冥貺昭彰。壽宮宏麗。水通懸圃。萃氣色于闔門。路接白楊。煥丹靑于垌野。此而莫述。後嗣何觀。微臣潤色無功。討論奚取。思問神於先聖。姑欲事君。苟獲罪于玄穹。曷容媚竈。惟於舊史。想見英風。適當罷役之初。爰奉屬辭之詔。西州作頌。誠慚邑子見稱。南國刊銘。或望至尊所改。庶使千八百國會。執玉於茲峯。七十二家。配泥金於此地。其銘曰。

茫茫玄造。萬物資始。一經神怪。一緯人理。先聖則之。以著綱紀。仰觀俯察。上天下地。高卑既定。品物咸宜。宣氣者山。配地曰祇。三公是擬。九德攸司。天作金陵。蔣帝荒之巖巖。金陵作鎮。上國陰林。巨壑材生物植。洞穴岩房。逶迤詰屈。隱士無言。仙童不食。洪惟廟貌。奠此名區。位重天孫。權傾陸吾。薜荔之服。辛夷之車。

若自空桑來遊下都。翼翼京揚。馮馮輦轂。運屬多壘。聿祈深福。峻殄堅夷。勛亡景覆。肸蠶玄功。威蕤帝籙。皇唐膺運。和悅人神。崇名則舊。受職惟新。祥圖雜集。祀典紛綸。終全王土。以俟真人。再造延洪。繼文光大。陰陽不測。天地交泰。沒羽梯航。雕題冠帶。成民致力。祭神如在。猶防闕典。乃顧遺靈。永懷簡冊。欽若昭明。克亂除害。膺茲大名。亦有制度。備於祠庭。式瞻昏定。昏定既正。爰揆農時。農時弗虧。虞衡蕭給。般爾交馳。加之龔斲。益以章施。新廟既成。神居既寧。我有常祀。蒸餼薦腥。匪禁匪祈。敬我惟馨。三時不害。大庖不盈。昔在周家。逮於漢室。徒聘驪騮。虛羅甲乙。純嘏弗臻。斯猷愈失。載返真風。爰歸聖日。五衢植木。四照栽花。馳烟驛霧。晦景縈霞。方介十坐。何憂一車。行觀吉玉。願折踈麻。謝傅長逝。王公不作。獨我莊武。先紆睿略。魯墳無棘。遼城有鶴。刻此茗華。永傳嵩霍。

武烈帝廟碑銘

臣聞昊穹凝命。玄化不宰。司契牧民之重。授以聖功。益謙輔德之明。顯諸神道。玉燭景風之瑞。所以報憂勤。天時地物之妖。所以警安逸。是以古之聖人。覩災而懼。因敗而成。撥亂反正之動。假武修文之業。延洪光大。皆有幽贊者焉。故禹奠九州。受蒼水繡衣之命。武師牧野。接五車兩騎之神。或假靈於五將三門。或取象於長庚北落。奇怪恍惚。歷代有之。然則潔粢豐盛。崇名紀號。欽若天意。不顯陰功。元元本本。政之大者也。茲我后所以側身修德。允濟時屯。武烈帝所以禦災捍患。光膺帝服。人神合應。豈不偉哉。惟帝才冠生民。道高振古。登賢能于鄉老。論昭穆於本朝。若夫忠孝文武之風。信智言之懿。提綱案部之績。夷凶靜亂之勤。論道經邦之猷。宮懸錫馬之寵。忘身徇國之節。驚愚顯俗之奇。固已炳煥丹青。鏗鏘金石。用能

高標明祀。大庇蒸民。犧牲玉帛。數有加於羣望。備物典冊。禮遂縟於眞王。是知妙極無方。數均不測。告禎符於元后。集景命於舊邦。豈徒雪霜風雨。禳祈零禁而已。我唐之中興也。南司天。北司地。命羲和而治曆。法鳴鳩以安民。令行而風雨不愆。澤廣而禽魚允若。無文咸秩。墜典由是孔修。有開必先。百神於焉受職。及運終下武。慶洽重熙。二聖相承。載光明德。五材並用。誕告多功。御名正而泰階平。王澤流而頌聲作。人將登於壽域。時已洽於淳風。數或推移。唐堯有懷襄之患。天將警戒。周成有雷雨之災。丙辰歲。金革爰興。師徒四出。師屯細柳。火照甘泉。蠡茲越人。伺隙稱亂。焚我郊保。軼我封陲。宵災御亭。晨圍武進。天子爲之旰食。東郊於是弗開。於時令儲后以長子帥師。以九命作伯。風行京口。氣懾句吳。激大義以推心。授成謀而警衆。右武衛將軍柴克宏。見危致命。臨難忘生。總率禁兵。星言赴援。人懷國耻。如報私仇。軍政肅而上。下接和人心。感而神祇助順。若昆陽雷電之震耀。淮淝草木之形勝。兵勢颺馳。醜徒冰泮。冥貺彰灼。有如此焉。當是時也。以承平之人。鄰貢獻之國。燿燿卒至。溝隍未嚴。首尾方畏。衆寡非敵。摧堅如拉朽。擒寇如拾遺。崇朝之間。邊鄙克定。匪大君之昭感。豈人力之獨能。雖通幽洞靈。實聖哲之所務。而問神語怪。非典冊之攸先。故揚摧而論。蓋史臣之職也。主上以功成弗處。無德不報。增封進號。厥有舊章。乃下詔冊贈武烈帝。備名數禮也。於是正南面之尊。窮大壯之勢。耽耽新廟。奕奕崇堂。雉門兩觀之嚴。左城右平之制。龍旂鑾輅。雲罕軒懸。兼三代之盛儀。抗五郊之殊禮。與夫周人革命。止陳玄牡之祈。晉室主盟。但用朱絲之禱。報功之典。不亦盛乎。常州刺史何重貴。初領前軍。獨當強寇。以忠貞爲甲冑。以恩信爲金湯。首挫賊鋒。力全郡壘。塞帷之任。因以疇庸。坐樹之風。更成德讓。皆足以光昭雅頌。垂示來雲。後之君子。知天命不可

以智取大福不可以力勝。幸災怙亂，鬼得而誅。背盟奸好，人將誰與。覆車斯在，殷鑒匪遙。類委土以爲師，樹豐碑而紀事。下臣奉詔，謹勒銘云。

玄功不宰，帝德無爲。化機冥運，羣動交馳。必有神道，鑒而董之。董之伊何，惟帝之職。恍惚有象，陰陽不測。如岳降祥，配天輔德。保我蒸民，莫匪爾極。偉哉閒傑，多藝多才。名馳八紘，位重三槐。祀典光啓，王封肇開。人思召樹，俗畏軒臺。洪惟我后，積仁累慶。運啓再造，功宣二聖。金鏡在握，璿璣以正。陰陽旣和，人神交應。時災有數，孰克違斯。靈命自天，疇能問之。盜兵竊發，玄貺冥期。風雲鼓蕩，氣厲殲夷。蔣侯助順，霍山啓道。卑聽匪遠，誠明則到。上曰欽哉，享茲昭告。帝服加尊，大名紀號。多壘旣平，連營旣寧。奕奕新廟，崇崇百城。民罔疵癘，年斯順成。庭有備物，時殷頌聲。禍福何常，惟人所擇。棄信毀義，恃衆與力。上帝不蠲，明神是殛。勒石嚴祠，敢告萬國。

重修筠州祈仙觀記

筠州祈仙觀者，東晉黃真君上升之地。因爲道觀，綿歷代祀，互有增修。國朝保大中，元宗皇帝奉爲吳讓皇，再加營今上御名。金石具刻，此不備書。夫言意假象，故立朝修之所。形器有壞，故資繕完之工。此觀當荆楚之要津，實郵傳之便道。過賓稅駕，遊子解裝。憧憧往來，罕或虛月。加葺之後，二紀有餘。閉閤垣墉，頽落且半。道士羅自正，總攝真侶，啓煥玄風，以爲道由。人弘德以勤繼，不飾不美。人其謂何？于是心謀躬行，節用蓄力，授其徒之可任者，會其士之好道者。月省歲計，經之營之。卽舊謀新興，廢補闕十有餘歲。其績大成。凡建聖祖殿，黃真君殿各一區。峙瑤壇，範洪鐘，造橫橋於通津，植茂樹而蔽野。其修舊整壞者，層樓重廊。

二十餘閒。其取材也。時其擇匠也。良程之以壯。督之以固。瓴甌礪礪。尙其密。藻繪丹雘。尙其麗。帑廩不費。工庸不勞。煥然新宮。峙此靈境。君子是以知其能也。夫神仙之事。史臣不論。豈不以度越常均。非擬議所及。故邪。仲尼書日食星隕。皆略其微。而著其顯。慮學者之致惑也。又況於希夷恍惚之際乎。然而載籍之閒。微旨可得。書云。三后在天。詩云。萬壽無疆。斯皆輕舉長生之明効也。及周漢而降。則事迹彰灼。耳目不誣。天人交感。民信之矣。于是通儒洪筆。始著于篇。至如許君。黃君。通幽洞冥。窮神極妙。逮爾姻族。與夫家人。乘景上躋。超然絕俗。故墟舊井。真氣裴回。至其鄉而思其人。仰其道而踐其迹。斯觀之盛。豈徒然哉。鉉頃歲扈從南巡。有事于游帷之觀。唯二宮相距兩舍而遙。使指有程。瞻望弗及。逮今一紀。無日忘之。會羅君狀其功績。圖其形勝。見託紀述。欣然而書。開寶七年九月二十四日記。

筠州清江縣重修三清觀記

元氣既判。天地乃位。氣之清明。靈粹者。鍾乎洞天福地。名山大川之閒。眞宰之所戾也。景福之所興也。然則游居走望。乃建道館焉。通都大邑。往往而在。豫章之地。實曰奧區。帶豫章之通川。據西山之雄鎮。鬱映磅礴。神異所栖。高真十二。震耀方夏。萬靈軌轍。靡迤蟬聯。保大庚戌歲。詔復高安縣爲筠州。析其北鄙。爲清江縣。而三清觀。負新邑之左。瞰長江之濱。形勝高奇。壇宇嚴淨。聞諸故老云。昔吳許二君。嘗遊茲地。夜觀青氣。上屬於天。相與嘆曰。此非凡地。當爲神仙之宅。及二君登晨之後。邑人追感前言。共御今上茅茨。歲時薦獻。衆目爲草堂道院。函關紫氣。事往名留。蓋屋草樓。人非郭是。年世彌遠。增修益崇。開成中。始詔賜號三清之觀。自時厥後。又踰十紀。運逢治亂。道有汗隆。中興已還。百度咸復。官得其守。人盡其能。道士吳

宗元充迪玄風。克堪道任。以爲朝禮之城。飈歛所臨。不飾不美。衆將安仰。於是月考歲計。庀工飭材。補廢扶傾。無所不至。建三清之殿。造虛皇之臺。設待賓之區。敞飭賢之室。範華鐘之鏗。御今上層樓之茗亭。回廊複道。重深奧祕。于是飾儀衛。備器用。肅然必洽。煥焉可觀。夫其誠至者。其禮修。其守固者。其事舉。道不遠矣。人焉慶哉。宗元又以雲境昭回。祥符胥鑿。思刻貞石。以貽後人。不遠千里。見訪論譔。嘉尙其志。故爲直書。時甲戌開寶七年十二月十二日記。

徐騎省集卷第十一

舒州周將軍廟碑銘

壽州刺史劉公神道碑銘

唐故德勝軍節度使扶風馬匡公神道碑銘

舒州周將軍廟碑銘

將軍諱瑜字公瑾廬江舒人也。吳史列傳功炳乎丹青。皖城遺祠頌闕乎金石。嗚呼。皇天有造物之柄。有愛民之仁。必待聖人而後行。王者有承天之德。有濟世之量。必待聖人而後發。故天人合應。聖賢相須。民之司命。闕一不可。雖復凌雲之御今上。非一木之材。千金之裘。非一狐之腋。然其建大號。運長策。總攬英傑。弘濟艱難。亦一二人而已。故革夏者。九有之師。而伊尹爲阿衡。翦商者。三千同德。而呂望爲尙父。秦爲無道。高祖誅之。則鄼侯蓋於羣后。莽據閏位。光武正之。則仲華冠於四七。漢宗失御。孫氏奮發。破虜討逆。繼志勤王。而將軍傾蓋于千載之期。濡足於百六之會。策名江左。宣力中朝。殊勳盛烈。曠代齊契。何其偉哉。于時王業始基。羣凶方熾。國難薦及。人心屢搖。將軍情發于中。義形于色。履艱危之際。貞節彌堅。率振蕩之衆。伸威方厲。推誠以明大義。故逆折游說之鋒。屈身以表至公。故首定君臣之敬。摧赤壁之陣。勢動九州。建漢中之謀。量包四海。於是強敵攝迹。羣生延頸。姦雄之智。無所施焉。漢室之隆。未可量也。嗚呼。天未悔禍。國之不幸。修塗止於偏帥。大命殞於巴丘。流勳于當時。遺恨于終古。豈四百之祚。歷數難移。三分之基。疆宇有限。不然。何雄才大略。神授之如彼。短命促齡。天奪之若此。忽乎茫昧。不可得而詳也。夫英聲由

于茂實。元功出于全德。威稜所及。非勉強之攸能。績用斯存。豈毀譽之可奪。有吳爲新造之國。柴桑乃觀望之師。大帝非爭衡之才。子布有私室之顧。將軍投袂而起。橫戈以出。魏蜀二主。天下英雄。或垂翅而宵奔。或俛首而求隸。降茲以往。烏足道哉。至於分財推宅之仁。觀樂審音之妙。知人先覺之哲。存交服物之懷。實天縱其能。亦行有餘力矣。嗟夫。民墜塗炭。眞主所以臞瘠。天造草昧。良佐所以驅馳。非君臣同體。不足以濟大業。非帷幄共斷。不足以制橫流。將軍能沮幼生之譚。而吳主亦能拒敵國之閒。將軍能畫不世之策。而吳主亦能破羣疑之心。故得不顯霸功。若斯之盛。當此時也。如趙士之碌碌。漢相之齷齪。徒使有若林之會。安能施一繩之維。又況於市道之交。署門之客哉。此義夫節士。所以感激于風雲。惆悵于時運者也。嗚呼。微管之績。旣耀于中區。盛德之祀。遂崇於東夏。歷世逾遠。善慶彌彰。翼子謀孫。徙封移社。而支庶繁衍。故在舒庸。召樹猶存。魯堂無壞。光靈不泯。實生太尉中書令。西平恭烈王焉。半千之運。懸符祖德。萬夫之望。允濟時屯。始爲定亂之雄。終爲佐命之老。而仁風所被。多在故鄉。王與嗣子。鄴。皆節制廬江。今仲子祚。復刺舉濬部。過里門而載軾。瞻廟貌而長懷。命梓人以新其堂。奧督里宰以除其徑術。教祝史以潔其籩豆。率宗屬以薦其孝思。肇建豐碑。以永前烈。懿哉象賢之美。共理之勤。民用綏和。歲則大有。戾夫不佞。敢作頌云。

皇天上帝。敷佑下民。旣命賢主。亦生賢臣。有若將軍。救時之屯。仗義秉信。資忠輔仁。堂堂定策。審審忘身。雄飛夏口。橫厲江陵。將軍猶生。漢室不傾。將軍旣沒。天下三分。盛德之享。嚴祠未陞。壯夫擊節。義士沾巾。猗歟舊國。赫矣雲孫。嗣勳慕服。長戟高門。壽宮有煥。靈貌如存。我紆蘭佩。來挹犧尊。懷賢慷慨。用獻斯文。

大唐故匡時啓運功臣清淮軍節度壽州觀察處置等使特進檢校太傅持節都督壽州諸軍事
壽州刺史御史大夫上柱國彭城侯贈太尉劉公神道碑

聞夫郊圻內理。牧萬民者。是曰諸侯。夷狄外攘。守四方者。其惟猛士。然則安危異任。文武殊塗。故天下方爭。韓彭英吳。橫雕戈而震耀。羣生待理。龔黃寇賈。擁阜蓋以從容。及夫昭格寰區。紛綸簡冊。其歸一也。代有人焉。若乃總是全謨。覃于奕葉。流光受祉。潛濟累將之家。崇德計功。下視慙卿之族。古難具美。我則兼之。公諱崇俊。字德修。其先彭城人。高祖升。調補山陽淮陰尉。遂家焉。卽爲縣人也。岳峻洪基。海疏遙派。陽城相土。千齡侯伯之封。沛澤中興。兩代帝王之膺。懷黃結紫。論鼎甲以盱衡。刻像圖形。誓山河而捧袂。國史家牒。披卷可知。頃者聖運中微。羣方暫擾。驪山之北。犬戎與戲水之師。踐土之庭。天子屈河陽之召。公路擁南陽之衆。僭號仲家。隗囂據隴右之圖。坐論西伯。勤王問罪。吳太祖始定揚州。賜賑專征。昭皇帝遂加殊禮。于是揚旌北討。遷寇迹于淮濱。闢土西封。謀守臣于諸將。命我顯祖。作牧鍾離。乃固保障之嚴。載施犬馬之備。軍無糝政。將期十萬之行。師有見糧。卽聚九年之蓄。方圖大舉。已仗前爰。永年不登。未幾而歿。長山羣盜。舊畏來公。西域故營。願從班勇。復命烈考。嗣膺使符。不還渭水之兵。誓卒龍門之託。故蓼城之戰。斬獲過當。汝陰之圍。策勳居最。先零委質。闢充國以無由。獫狁驚魂。射郅都而不中。疇庸錫羨。建清淮軍以壯中權。加禮愼終。贈太尉公以光幽笈。旣而鼓鑿悽愴。部曲徘徊。家有遺恩。人思世德。帝曰崇俊。惟爾恭儉孝友。誠明惠和。任則中軍帥。位則文昌長。誕舉攸職。予惟汝嘉。濠梁之郊。控扼遐裔。惟乃祖金克懋厥始。乃考仁規。克愼厥中。肆予命爾。克成厥終。往哉汝諸。無廢朕命。公銜恤奉詔。墨經卽戎。鋪陳政

經討閱軍實。思有以光大前緒。播揚國風。初二先公之理也。屬洛邑再遷。浚郊作梗。僞新竊據。仍延十五之期。黃武開元。始創三分之業。犬牙之地。螿尾常搖。鋒鏑縱橫。車徒奔走。摧牙獸困。尙遙匡復之謨。賴尾魚勞。未暇綏懷之術。逮公之理也。寇皆遠遁。民佇息肩。千里風從。四方聳聽。以爲格物必在於立制也。故藝貢賦以息貪暴之端。暢刑章以拯姦宄之極。賞不虛授。罰其必行。以爲富邦必在於務本也。故使民以時。相地之利。持未熟之稻。游惰自遷。班再易之田。兼并絕倖。以爲邊寧不可以忘武備也。故遠斥候。浚溝隍。竹與木而靡遺。橐與苦而畢給。亭障屹峙。軍聲隱然。以爲強兵必在於實王畿也。故招懷邊氓。講習戎事。游兵冀馬。俱有無犯之容。晉勇齊雄。並集選和之下。歲揀精銳。歸之京師。其餘庶政常經。門見戶睹。斯可畧而言也。高皇帝禮均元老。寵冠列藩。受禪之初。則進上公之秩。肆類之際。則委廉使之權。言必見從。無再卻之奏。君常高枕。忘北顧之憂。皇上欽奉重熙。聿遵無改。毗倚尤重。親敬有加。初先太尉公之薨也。西北小驚。戒嚴從便。因詔執事。移清淮軍于壽春。及是復立定遠軍。卽命公爲節度使。仍以公少子匡符。尙永嘉公主。留侯操印。初躋上將之壇。帝子吹簫。卽降王姬之館。禮優伯舅。望重懿親。於時公洩濠梁十有七年矣。米鹽皆序。丞史當才。閉閣罕爭。舉烽無警。朝庭以公能光前烈。雅得邊情。清淮之師。遺風仍在。俾盛一家之美。載嚴萬里之城。改壽州刺史。充清淮軍節度使。鄧侯條去。雞鳴傷父老之心。長者聿來。虎渡息鄉閭之患。能事畢舉。考功再朞。方將建大旆以風驅。指函關而電掃。雲中雞犬。八公之迹。徒存。夢裏膏肓。二豎之妖。遂作。春秋四十。保大四年。夏六月。十有六日。薨于壽春公署。皇上翦鬚靡及。穿壁方遙。投綠沈之瓜。悲哀竟日。賜黃銀之帶。慷慨沾襟。廢朝三日。中使護葬。詔兵部侍郎李貽業持節冊贈太尉。賜

諡曰威。卽以其年秋九月十五日備鹵簿鼓吹葬於濠州鍾離縣大化里之原。禮也。前夫人李氏。後夫人隴西郡君李氏。皆太師趙忠懿王女也。賴鄉仙李。卽開柱史之源。參野飛龍。遂紀宗卿之籍。勳庸六鎮。時高謝氏之門。師範兩朝。室有班姬之訓。荃蘼蘭蕙。映戚里以芬芳。藻荇蘋蘩。播婦儀而昭哲。門內之理。夫。人有焉。子八人。二子幼。長子節。早亡。次範。滁州刺史。次簡。次策。次霸。時未仕。次符。秘書郎。或得公之政事。或得公之兵鈴。學禮學詩。惟忠惟孝。皆推酥酪之味。咸有芝蘭之芳。所謂積善餘慶。世濟其美者也。惟公山河龍鳳。凝粹彩於神姿。緯候風雲。集淵謀于靈府。議公家之事。不以身爲行將軍之令。每由剛克。卒祖禰之成業。可謂聿修膺牧伯之寵章。訖無虛授。所以始終匪玷。福祿攸歸。同族之閒。朱輪結軌。季父仁瞻。作鎮夏口。弟崇。怙崇。億更典晉陵。其餘將軍列侯。中郎校尉。銀黃照爛。光浮通德之門。珎珮陸離。響雜高陽之里。苟非自天攸相。與國無疆。其孰能與於此乎。向使享大年。敷遠畧。鴻飛鵬舉。功未可量也。天命不然。能無永悼。昔者荊州從事。猶牽墮淚之悲。大宰舊寮。亦有懷鉛之請。況乎世功不顯。揭日月以高驥。帝念惟隆。會雲龍而下濟。欲垂萬葉。可不務乎。微臣職典。絲綸詞非清潤。持赤管以承詔。拂貞珉而投刀。庶使蚩蚩萌隸。觀迹而長懷。眇眇來雲。披文而盡信。其銘曰。

惟彼陶唐。有此冀方。自天祐之。後嗣其昌。侯遷魯縣。帝隱芒碭。猗邠大族。嵩華配長。瀨瀨彭城。興我遐祚。顯顯山陽。著我高祖。高祖伊何。仁而不遇。慶鍾令孫。聿來用武。皇運中否。諸侯起爭。浚郊怙亂。淮壖不庭。吳王奮發。受鉞專征。命我顯祖。守濠之城。濠城巖峻。濠兵驍勇。顯祖帥之。羣兇振恐。將軍下世。邊烽亦聳。乃命象賢。荷時之寵。荷寵伊何。載大其功。蠡蠡梁寇。言言穎壚。是誠是俘。兵無頓鋒。爰有奇略。集于威公。

威公嗣侯。不墜其訓。戎事之隙。民功是振。爲之中典。著之令問。泗上風移。京師河潤。帝曰伯舅。予嘉乃勳。扞境則武。安邦則文。乃降王姬。于爾慶門。乃改乘轅。于彼西軍。西軍何在。鎮彼衡霍。威公來思。式遏寇虐。胡馬已遠。將星俄落。百身寧贖。九原誰作。明明天子。惻愴聞聲。歲云秋止。返旆遲遲。二藩士女。泣涕漣洏。賢侯逝矣。吾誰與歸。黯黯塗山。湯湯淮浹。駟馬悲鳴。滕公所閉。甘棠勿翦。召伯攸憇。是用刊碑。永告來裔。

唐故德勝軍節度使檢校太保同中書門下平章事扶風馬匡公神道碑銘

夫道被萬物。處其中者。是曰賢人。功濟橫流。讓其先者。方稱君子。施之則開物成務。與廣業而同歸。卷之則保族宜家。垂令名於必大。是以長沙吳芮。繁祉邁於三雄。南陽賈復。賁寵隆於四七。歷代已降。靡不由之。迄于我朝。則扶風公其人矣。公諱仁裕。字德寬。其先扶風人。子孫或從官於徐方。今爲彭城人也。粵若萬邦作乂。益有佐禹之功。因封受氏。奢有卻秦之績。公侯必復。關西靡孟起之威。文武未墜。南郡被季長之德。存乎譜牒。無俟闡揚。曾祖某。祖某。皆以鹵介之氣。當屯蒙之運。不履王侯之事。歸全父母之邦。考某少負雄名。爲武寧軍裨將。才高位下。厥用弗昭。累贈尙書右僕射。傳曰。有明德而不顯。當代後必有興者。故其餘慶。集於我公。惟公克稟粹靈。夙彰奇應。方娠而神貺協夢。旣生而異氣充庭。宗族相驚。里閭交慶。識者謂之曰。不意英物。復鍾此兒。天將啓之。馬氏爲不朽矣。長而爽邁。輔以博聞。善無常師。器以虛受。及皇圖中否。赤縣淪災。戰國縱橫。爭求策士。孔門堂奧。半作家臣。公負先見之明。審擇君之義。舉旗沛澤。卽授中涓。定難京城。仍參主簿。而上方從歷試。允懋臣功。經綸草昧。諮訪遺闕。公親侍左右。日奉謨猷。能知四國之爲。且掌賓客之禮。勞無伐善。夙夜不離于公。美則歸君。議論莫闕其際。出入二紀。懋肩一心。車服

以庸寵祿來假。乃升朝序。乃掌禁師。以左領軍將兼總丞相之兵衛。申令惟一。任衆惟睦。推以恩信。先之勤勞。周慮既嚴。軍事以簡。考績稱最。帝用嘉之。遷檢校司徒。遙兼宿州刺史。夫千騎之長。可以圖功。百城之權。可以觀政。中外迭處。抑惟舊章。卽授楚州刺史。本州團練使。旬服之際。邦賦是繁。長淮之衝。戎寄爲急。公奉揚王略。遵舉詔條。人不易方。計日而治。徵爲右衛大將軍。復領舊兵。以衛相府。董齊之略。有踰于初。明年改右金吾大將軍。以扶風縣三百戶爲封邑。執金之職。歷代雄重。綿祀虛位。公首居之。內訓卻非之士。外察苛留之禁。熊羆宣力。輦轂無塵。及上允膺內禪。光啓建業。寺府軍衛。半存舊京。委公留臺右師。俾率東夏。卽遷檢校太保。改右天威副統軍。進爵爲伯。陝服從入。公有力焉。及參告類之儀。益光求舊之舉。寵開幕府。遙領徐方。進封郡侯。定食千戶。左輔之地。王業所基。藩屏京師。惟公攸賴。乃移使節。往鎮京口。公慈惠著于郡國。威德洽於士心。由是齊人向風。期年報政。加同中書門下平章事。廬州節度觀察等使。自南北分隔。戎華交馳。合淝之郊。常制衝要。故有台階之命。以增外闔之威。公於是謹斥候。審號令。習組練之士。則聲如鸞馳。嚴堡障之備。則勢若山立。虜不敢犯。邊是以寧。而察俗之方。如南徐之理。方當矢謨帷展。薄伐關河。渡江之誓。旣陳。潞渭之舟。已具。嗚呼。良圖未展。景命不融。春秋六十有三。昇元六年閏三月五日。薨于廬州公署。上省奏震悼。廢朝三日。卽用玄甲之數。式擬鐵山之功。給于官司。臨以中使。奉常以視履。考祥之義。循貞心大度之美。詳協公論。易名曰匡。卽以其年四月七日。備鹵簿儀衛。葬於廬州合淝縣鄉里。禮也。公娶同郡萊氏。封彭城郡君。麗穠李之華。親采蘩之職。理內協鵠巢之詠。從貴有魚軒之華。某年月日。先公而逝。嗣子右弓箭庫使光庭。東頭供奉官光祚。閣門承旨光紹。皆稟義方。無忝遺烈。

家承膏粱之後。而恭順克修。職在綺紈之間。而雅素自若。君子謂扶風公。其有後乎。夫碑頌之設。有自來矣。琬琰之細。既垂於茗華。盤盂之微。又參于警戒。若乃道合天眷。忠存王家。累輔翼之功。而鐘鼎之報罔闕。享將相之賞。而帶礪之誓弗渝。時無閒言。沒有餘慶。故其宗廟之紀。金石之銘。昭示來雲。不可誣也。小臣不學。奉旨刊文。庶使計功稱德。代遠而愈信。披文相質。事久而彌芬。峴首之懷靡盡。昆吾之烈長存。嗚呼哀哉。其銘曰。

益作朕虞。實曰元凱。崇基締業。明德攸在。維趙于蕃。封移族改。祚實刊山。源長巨海。因枝別代。覩渭來遷。導德絳帳。勤王跼蹙。流光襲祉。映後昭前。懷黃結紫。著簡成編。誕發材英。肇惟明懿。鼎角膺奇。龜文履異。博容汎愛。入孝出弟。運有屯蒙。器無凝滯。爰初發迹。雲從潛泉。濯纓職幟。拊翼中涓。良驥處服。忘歸在絃。樞機言行。無競惟賢。繾綣從君。匪伊履屐。勤毖前爰。周旋陞戟。居國必聞。在身無擇。帝爰允諧。胙乃丕續。惟彼淮泗。疆以獯夷。惟此京浙。續以邦畿。封淮表浙。惟惠惟威。椒蘭在俗。轅轅興思。羣舒待理。獫狁孔棘。帝謂侯氏。纘服新息。式固爾猷。惠此廬國。乃陟台階。俾藩于北。龍旂四牡。鉤膺鏤錫。命服有煒。光聲載揚。獷狄弭耳。蚩虺嚮方。上儀像物。下謚飛蝗。梁木或顛。通川有逝。長城旣嚴。哲人永瘁。像著雲臺。風存遐裔。輟春盡思。瞻山隕淚。信結殊俗。悲深上旻。丹碑旣刻。列鼎書勳。祁連不泯。庸器長存。不顯百代。惟子有臣。

徐騎省集卷第十二

茅山紫陽觀碑銘

池州重建紫極宮碑銘

唐故道門威儀玄博大師貞素先生王君之碑

袁州宜春縣重造紫微觀碑文

舒州重建文宣王廟碑序

茅山紫陽觀碑銘

臣聞太初之氣。其生也無始。衆妙之門。其本也無名。積而成形。散而爲器。乾坤運之。而兩儀位。王侯受之。而天下貞。是故斷鼉鍊石之功。絕地通天之業。衣裳軒冕之后。干戈揖讓之君。雖復遭罹異途。步驟殊致。莫不契協於神明之域。飲和于道德之原。廣無爲之爲。執無象之象。萬物特生。而不有。百姓日用。而不知其迹也。則格天光。表化人而成俗。其本也。則收視返聽。全真而養身。至其玉檢登封。蘿圖啓後。游神象外。脫屣區中。鑄金鼎而乘白雲。登寒門而立玄極。闕宮清廟。式嚴觀聽之場。玉洞金壇。別啓下都之所。由是靈符總集。真籙岐分。三元八會之文。潛通髣髴。七映九華之室。密擬形容。足以徼福。應於舍生。致孝思于時事。聖人繼作。靈今上相望。故茅山紫陽觀者。今上敬爲烈祖孝高帝元敬皇后之所重修也。爾乃星紀儲精。下爲峻極。河圖著錄。懸示禎期。自道氣融明。真科流衍。治化宏開于赤縣。符圖廣被於名山。而華陽洞天。實羣仙之都。會金陵地肺。又三茅之福鄉。左憑柳汧。煙霞韜映。右帶陽谷。川原隱鱗。伏龍蹕迤。鎮以雷平之嶺。鬱岡迴合。浸以護軍之潭。郭真人叩舷之池。不遷留岸。許長史煉丹之井。自冽寒泉。白霧紫烟。

照映其上。鸞輪鶴馭。往來其間。高真七人。四處茲地。其後貞白先生。以玄德應世。肇開朱陽之館。以玉書演秘。爰立昭真之臺。堂靖疏基。玄洲之蹤。可擬。生徒廣業。白龜之迹。斯存。金紐鳳羅。代相傳授。龍車虎駕。世有飛升。及玄靖先生。以冲氣含和。體庚桑之歲計。玄宗皇帝。以尊師重道。屈軒后之順風。由是天眷遐臨。皇心密契。惟新舊館。再易華題。丹鼎洞經。潔修無倦。芝泥龍簡。投奉相望。戶邑之民。豈止奉明之縣。樵蘇之禁。寧唯柳下之墳。故得雲物告祥。芝英表瑞。小周王之瑤水。徒詠空歌。異漢帝之猗蘭。唯陳甲帳。自茲厥後。代有修崇。上士名人。時時解蛻。雲輶羽蓋。往往降靈。皆著之金石。播于謠頌。嗟乎。四時代謝。天道盈虛。雖九氣長存。歷劫以資其融結。而三階有象。隨時因表。其晦明則斯觀也。將世運以汗隆。與皇圖而升降。赤明未啓。猶多閭戶之悲。白水方興。始漸高門之慶。孝皇帝猶龍孕德。指樹垂陰。應樞電之殊祥。有天中之奇表。甘盤就學。和光於百六之初。庖正分官。利見於九三之際。賓門納揆。有大造於當時。彤矢旅弓。光至公於四海。由是法堯受命。祀夏中興。補西北之不周。應東南之王氣。御明堂而揖羣后。輯瑞玉而覲諸侯。既治定而功成。更憂深而思遠。乘奔馭朽。不以黃屋爲尊。旰食宵衣。唯以蒼生是念。知無爲之無敗。體上德之不德。凝神姑射。端拱穆清。政舉其中。事至而應。愛民重法。敦本訓農。偃革銷兵。守好戰必危之誠。卑宮菲食。懼以人從。欲之譏。故得百寶効靈。三辰薦祉。遠無不屆。邇無不安。少康光武之功。獨高帝錄。貞觀開元之業。更啓孫謀。今上承積德之基。法自然之道。變化無方之謂聖。神武不殺之謂仁。學洞精微。守謙光而冲用。明昭隱伏。體大度以包荒。動則庇民。不矜功而尚智。靜惟修政。恆務嗇而勸分。聞善若驚。每賞秋毫之細。容光必照。寧遺行葦之微。化洽風隨。時和俗厚。常以天下者烈祖之天下。憲章者昇元

之憲章垂裕無窮。永懷罔極。衣冠原廟。未足盡思。聲樂娛神。良非至敬。緬慕在天之駕。因嚴訪道之宮。尋
屬長樂上仙。濯龍輿感。載詠生民之頌。思弘十亂之功。乃眷靈岩。誕敷明詔。發虞衡之吏。集般爾之工。執
藝駿奔。飭材厲至。果園之柰。供其翦斲。北邙之土。給其圻墁。乃新秘殿。秘殿孔碩。黯其濯灑。屹其穹窿。璇
題互照。以晶瑩珠網。交疎而窈窕。震般雷於滴瀝。拖宛虹於楹軒。忽陰闔而陽開。乍霞駁而雲蔚。儼若虛
皇之御。穆然太上之容。疑馭氣以迴躋。眇凌雲而遐觀。乃立高門。高門有闕。擬金闕之觚稜。洞朱扉而煥
照。龍章鳳篆。以之題署。霓旌絳節。茲焉出入。乃建兩序。紛邈迤而重深。乃起層樓。邈茗亭而顯敞。北彌郭
阡之路。南巨姜巴之衢。赫光景以燭坤。麗丹青而藻野。速如神運。恍若化工。每至日薄星迴。歲聿云暮。桐
華萍合。春已載陽。赤城旋軫之初。白鶴會朝之際。都人士女。舉袂成帷。襲靈風而共洽。天和仰雲今上御名。而
方知帝力。豈止百年猶畏。獨識軒轅之臺。三壽作朋。永闕姜嫄之廟。大哉至矣。無得稱焉。夫妙本太無。名
垂不朽。挺窮神知化之盛。然後顯通幽洞靈之微。立尊道貴德之教。然後致還溘返朴之理。漸於人爲富
壽。被于樂爲聲。詩告於太史爲典冊。著於豐碑爲銘篆。耿光不顯。其在茲乎。爰命下臣。敬書令德。其詞曰。
邈矣至道。悠哉妙門。黽黽無物。綿綿若存。是生清濁。爰闢乾坤。乃生之民。乃作之君。德盛惟皇。功高曰帝。
訪道峒山。求珠赤水。下或知有。時稱至理。三正循環。鴻圖資始。於惟基命。赫矣皇唐。運啓再造。天降百祥。
玄德升聞。既壽永昌。時乘白雲。至於帝鄉。穆穆嗣君。雄雄下武。禮極配天。教明尊祖。明發盡思。優然若覩。
敬佇仙遊。式嚴靈宇。靈宇何在。句金之陵。丹霞夕映。白霧朝凝。重屋四注。崇臺九層。雲生窈窕。日麗觚稜。
三秀交陰。五便分徑。丹沙流液。玄洲立靖。柳谷緇煙。雷池寫鏡。彷彿九華。依稀七映。至誠則感。有應斯來。

含真上客。蕭閒逸才。鸞輪倏忽。晨蓋徘徊。浮黎認土。方丈凝臺。昔在聖人。建言敷教。救物以慈。奉先以孝。敬佩真契。恭聞大道。顯妙用於言象。鼓淳風於億兆。薦純嘏于無窮。仰皇猷之克紹。

池州重建紫極宮碑銘

域中之大曰道。百行之先曰孝。故孝心充乎內。必道氣應乎外。於是有聿修之德。追遠之懷。揚名顯親之善。集靈徼福之舉。用於邦國。則臣節著。施于家庭。則子道光。以之爲政。則民從。又以之薦信。則神降福。然則壇館之作。焉得已乎。池州紫極宮者。本東晉之普明觀也。浸之以秋浦。鎮之以齊山。北望陵竇。真人飛升之所。南瞻九子。費徵君棲隱之鄉。玄風徘徊。精氣交感。代有奇士。居爲殊庭。旣奉玄元之御。因崇紫極之號。治亂迭運。隆替不常。戊午歲。太守陳公始臨此郡。歷堦垣而歎息。步遺址而顧瞻。役不徒興。義將有屬。公媯水洪派。太巨舊族。重世避地。徙居建安。祖德門風。冠映圖牒。王師拓境。閩方卽敍。撫納歸附。旌訪賢能。惟我嚴君。首奮奇節。芟夷遺穢。弘濟艱難。偏師所指。無往弗克。故十年之間。由裨將。歷郡守。登上公。建齊壇。功名之盛。近古無匹。及王室多故。邊城不寧。復遣公督舟師。率諸將。萬里赴援。三年轉戰。算無遺策。兵不頓鋒。威行軍中。勳在王府。舍爵再命。聿來是邦。於是解甲釋兵。頒條布政。事從中興。民用綏和。會文賦詩。彬彬然有儒者之風矣。俄而王妣國太夫人。凶問至。公孺慕出次。烝烝永懷。以爲柔儀慈訓。實大吾族。鞠育仁愛。兼倍諸孫。嘗藥弗親。執紼且違。欲報之恩。王事靡盬。思所以薦祉於冥漠。求神於希夷。非龜山之宮。必易遷之館。然則琳房金闕。瑤壇檜井。迎列真之御。資闡風之游。仙經不誣。勝事可作。于是瞻星接日。飭用庀徒。散廡下之金。出荆門之絹。人百其力。工薦其能。易其傾頽。化以壯麗。成於心匠。不愆。

素期自某年月鳩工。至某年月訖事。凡出錢若干萬。築室若干間。正殿當陽。三尊負辰。享列宿之位于東序。設三官之堂于西廂。嚴饋奠之室於良維。所以盡時思之禮。敞閑宴之亭於乾位。所以極坐忘之懷。矢棘雉飛。霞駁雲蔚。璇題行月。煥城邑之晶光。飛臺白日。壯江山之氣色。如是則鸞歛之駕。不得不臨。胎蠻之福。不得不集。想見武夷之會。足申令伯之心。至矣哉。善慶孫謀。無得稱已。嘗試論之曰。神仙者。君子之所歸也。故真誥云。至孝至貞之人。皆先受靈職。次爲列仙。歲登降其幽明。如人間之考績矣。若乃盡忠於君。純孝於親。敷惠於民。歸誠於仙。而不得與夫餌芝朮。醮星斗者。同躋真階。吾不信也。最哉夫子。其惟有終。鉉扈駕南巡。致禮名岳。假道過此。仰瞻久之。博我以文。輒不遜讓。其銘曰。

我經池陽。池陽旣康。化以至道。民知嚮方。乃新閑館。以奉虛皇。君子薦祉。則惟其臧。我登新宮。新宮旣崇。深嚴耽耽。丹彩彤彤。九華散影。十絕盤空。若在宣岳。如游閩風。至道不煩。玄關甚邇。孝享誠敬。奉時祖妣。善慶純嘏。施於孫子。三茅二許。夫何遠已。流芳金石。永永千祀。

唐故道門威儀玄博大師貞素先生王君之碑

原夫至道之先。邈哉稀矣。書契已降。可得而云。黃帝堯舜。澄其源。故垂衣恭己。在宥天下。伯陽仲尼。導其用。故建言立德。憲章無窮。赤松羨門。神而明之。故輕舉上賓。留侯商皓。變而通之。故解景滅迹。順是以下。莫不由之。故有搢紳端委。利萬物于廟堂之上。葛巾蕙帶。全陰功於塵埃之外。隱顯殊致。趣舍同歸。其人。有終。其魄不死。闕風玄圃。羣帝之密都。赤城華陽。仙聖之治所。光靈胎蠻。若在左右。仁人君子。往往至焉。見之於貞素先生王君矣。君諱棲霞。字玄隱。華宗繼世。積德所鍾。生於齊。得泱泱之風。長于魯。習恂恂之

教七歲神童及第十五博綜經史闕黨童子靡敢並行東方諸侯爲之前席而仙材靈氣稟于自然塵纓世網不可拘係每名山獨往神契感通奇怪恍惚衆莫能測天祐丁卯歲避亂南渡至于壽春感四海之分崩想八公之遺跡于是解巾名路委質玄門問政先生聶君師道見而奇之授以法籙是日彩雲皓鶴翔舞久之旣而窮方士之遐遊得東鄉之勝境道無不在善豈常師又從威儀鄧君啓遐受大洞眞法玄科祕旨動以諮詢福地仙源因而棲託誅茅穿徑枕石漱流身旣隱而名愈彰道已寂而節彌苦桑田自改桂樹長留烈祖孝高皇帝方在賓門實來作鎮紫氣表眞人之應青雲符好道之占君鶴書被微褐衣來見談天人之際講道德之源靡勞牧馬之迷自契順風之問因從敦請求止建康有玄眞觀者陳宣帝爲臧矜先生之所作也殿堂岑寂水木清華遊焉息焉以遂其好竹宮望拜玉牒秘詞叩寂求真必君是賴嘉祥靈應世莫得聞聖歷中興恩禮殊重加金印紫綬號玄博大師烈祖嘗從容謂君曰吾不貪四海之富唯以蒼生爲念君對曰夫古之聖人修其身而後及天下天下待一人安而後安今天子勤勞萬機忘寢與食身且不能自治豈能治蒼生哉帝善其言以百金爲之壽其識度亮直又如此焉今上嗣清淨之基尊玄默之化諮諏賓敬有踰于前而君茅嶺夙心老而彌篤比年抗表請歸舊山優詔惜之又加貞素先生之號旣而玉棺有命紫素告期葛洪見留不成大藥少君捨去先夢繡衣保大壬子歲夏四月甲寅隱化於玄眞觀春秋六十有二恩旨痛惜賻錢二十萬道俗嗟慕會葬數百人初君之處茅山也卽良常洞之前相雷平山之下披榛翦穢面壑臨流除地爲壇表朝眞之位因已設隧卜安神之室至是歸葬符夙願焉六月發自京師泝淮而上時畿內久旱川塗可揭是日大雨洪注騰波卻流驀長隄踰重堰飄

然利涉。人不知勞。昔周王有鑿水之朝。宣尼有四川之應。校靈比德。其殆庶乎。君傳法度人。數逾累百。有若玄真觀主朱懷。名先入室。道極嚴師。首座孫仲之。章表大德。劉德光。恭受經法。預聞玄祕。永懷在三。之義。願垂不朽之風。威儀王可德。首座陳希聲。並仰高山。共刊貞石。鉉也不佞。夙承教義。雖復仙凡異迹。靜躁殊途。而誠心所感。素交斯在。徘徊祠宇。邈若山河。敬書峴首之悲。以俟遼城之歎。其詞曰。

於鑠子晉。上賓於天。亦有令孫。窮神體玄。昔我來思。世稱其賢。今我往矣。人謂之仙。至道希夷。孰知其然。華陽洞府。句曲風煙。林芳橘葉。地卽芝田。披文相質。億萬斯年。

袁州宜春縣重造紫微觀碑文

若夫聖人有作。沒而不朽。畏其神而向其臺。思其治而戀其樹。故尊道貴德。玄化所以無窮。高山景行。後賢所以不乏。妙門光啓。上士勤行。書契已還。煥乎丹青者可數。邦域之內。表厥宅里者相望。時運與并。人境交得。教之大者。其可忽乎。袁州宜春縣紫微觀者。蓋有晉鄧表真人上升之地也。左鍾山之奇峯。右洪陽之仙洞。巉巖千仞。蔽虧日月。窈窕百里。畜洩風雷。迴岡層巒。崇其基坳。激湍澄谿。宣其氣象。真靈之所游集。邑居之所走望。皇統中。否下國尋戈。齊臺盡傾。魯宅多壞。鹿巾霞帔。藐矣流離。藻扁黼帳。翦焉墜廢。而周德未厭。漢中仍存。舊物旣甄。墜典咸復。惟茲靈境。將俟其人。道士孫去華。殖本康樂之川。從師新吳之邑。清心煉氣。絕粒忘形。三十餘年。其道彌固。保大中。自所居華林山館。南遊此鄉。望佳氣之鬱葱。躡堦垣之靡迤。慨然歎息。誓志終完。於是面壑依巖。披榛築室。勤身而感物。應迹以化人。鄉閭風隨。脆信日至。節以致用。時而命工。二十餘年。厥功克就。紺殿特立。重廊迴合。闢朱戶以瞰野。峙瑤壇而在庭。至于像設。

之尊嚴。仗衛之精麗。廚廩之充物。居室之清閑。洪纖必周。奢儉中度。美矣顯績。昭哉素誠。夫褒善稱伐。春秋之旨。雖在遐遠。人其捨諸。監察御史李君思義。奉使宜春。稅駕斯館。覩厥成今上。嘉其秉心。碑而揭之。以文求我。言意難盡。強爲之銘。銘曰。

袁君之賢。此州乃名。鄧氏之仙。此觀乃形。春華麗絕。真氣融明。允矣奧壤。居然福庭。運逢交喪。地有遺靈。美哉孫師。興廢扶傾。重開金籥。還飛火鈴。煙霞聚散。飈歛逢迎。精誠所感。大道方行。用刊樂石。永告雲扃。

舒州新建文宣王廟碑序

鉉嘗讀文中子所著書。竊觀其建言設教。憲章周孔。有道無位。故德澤不被於生明。然而門人弟子。如房、魏、李、杜輩。皆遭遇真主。佐佑大化。元功盛烈。亦云至矣。猶以爲禮樂不興。未能行文中子之道。嗟乎。使顏、閔之徒。遇貞觀之世。舉聖人之業。成天下之務。豈不益大乎。時運不並亨。聖賢不世出。可爲長歎息已矣。夫太羹玄酒。足以通神明。而不能競適口之味。大成雲門。足以和風俗。而不能高娛耳之聲。五常六藝。足以興國家。而不能勝捷給之數。釋菜合樂。足以祈永貞。而不能掩福田之說。李斯、荀卿弟子也。而爲焚書之酷。德彝、文皇上宰也。而沮王道之議。況其餘哉。故用兵以來。郊庠鄉塾。委而不修者有年矣。皇唐中興之一紀。天子乃崇學校。養庶老。舉六德。教胄子。旁達郡國。靡然向風。舒州古諸侯之封也。其地廣。其任重。太傅周公。舊勳碩望。來頒詔條。武以貞師。仁以行政。勳必資於前訓。舉必順于人心。前吏部郎鍾君。頃登銓管之司。實參侍從之列。論思興治。必以名教爲先。洎從左官。來爲佐職。神交主諾。人無間然。始一年而早曠作。二年而百穀登。三年而上下和。旣富而教。爰修廢典。乃嚴社稷。則播殖之功報。乃祀箕畢。則風雨

之候時。乃卽鬢堂。謁先聖。寢廟卑而將圯。衰冕陋而不度。政之大者。烏得已焉。于是庀功庸。示儀制。堂與戶牖。巍乎大壯。山龍藻火。煥乎有章。重門以深之。周垣以繚之。俎豆升乎筵。干戚由乎序。侁侁衆賢。是配是侑。肅肅燕毛。以衍以樂。閭伍之屬。耆幼之倫。惠澤漸乎肌膚。風教移乎情性。惜其所治者。百城耳。推是而往。何所不至哉。鉉也不才。放逐至此。蒙地主之惠。接故人之懽。博我以文。宜無所讓。屬役旣具。冠蓋將畢。會鍾君召還京師。祖行之夕。視草以送。且曰。敬教勸學。非大君子不能行。計功稱伐。非大手筆不能任。吾友紫微郎韓君。卽其人也。託之銘頌。以永清風。

徐騎省集卷第十三記一

宣州涇縣文宣王廟記

復三茅禁山記

宣州開元觀重造中三門記

紫極宮新建司命真君殿記

楞嚴院新作經堂記

攝山棲霞寺新路記

常州義興縣重建長橋記

宣州涇縣文宣王廟記

昔夫子祖述堯舜。憲章文武。扶東周於已絕。拯蒼生於既墜。其迹屈而道愈大。其人亡而教愈遠。則生民已來。未之有也。其在祀典。法施於人。則祀之。矧褒聖之祀。其可忽乎。然則中人不足以語上。下士聞道而大笑。故斯教也。衰於戰國。廢於嬴政。漢魏以降。續而復絕。夫仲尼日月重昏千祀。非聖人孰能廓之。故斯教也。興於武德。盛於貞觀。極於開元。理自然也。兵興以來。大化陲替。先王禮器。委頓於勝廣之門。闕里諸生。悽惶於絳灌之下。矧厥祠宇。其存幾何。天之愛人。不當遂絕。皇統再造。六藝始修。太歲丙午。重熙在運。宣城雄鎮。帝之叔父在焉。故幕府之選殊重。尚書郎吳君光輔。奉詔佐廉部。兼理於涇。既蒞事。乃被儒服。謁先師。闢荆棘。歷堦垣。以造於茅茨之間。仰瞻俯觀。喟然而歎。於是奉開元之成制。采頻宮之舊章。經之營之。是卜是築。惟新祕殿。儼飾睟容。入室升堂。森然如在。籩豆有位。賓主由序。表著咸列。門衛肅然。於是青衿零服之子。有從師觀藝之場。鯁齒鯁背之徒。識養老慈幼之節。欣欣然其化之大者歟。明年秋。君奏

計如京師。因得其實。嗚呼。聖人在上。羣才畢舉。使三代之風。得達於邑里。不其偉哉。余承君之歡。美君之志。刊石紀事。寘於祠庭。後之君子。無忘企及。其餘理畝籍。察庶獄。關汗萊。遏陂塘。則有考功之吏在。故不書於時。太歲丁未冬十月九日。尚書主客員外郎。知制誥徐鉉記。

復三茅禁山記

華陽洞天。金陵福地。羣仙之所都會。景福之所興作。故其壇館之盛。薦享之殷。修奉之嚴。樵牧之禁。冠於天下。其所由來舊矣。聖厯中。徵官失其守。望拜之地。多所荒蕪。若乃眞靈翔集。玄貺胥饗。興復之迹。必假異人。天祐丁丑歲。貞素先生王君棲霞。始來此山。恭佩上法。徘徊地肺。偃息朱陽。永懷舊規。期在必復。先生潛德內映。符彩外融。名士通人。道契冥會。凡縞紵之贈。脆信之資。悉奉山門。以成夙志。於是由良常洞。至雷平山。十里而近。於入萌隸者。盡今上御名。贖之。芻蕘不得輒至。墟墓不得雜處。藝樹蔽野。植松爲門。川梁必通。榛穢必翦。建方壇於雷平之上。造高亭於良常之前。朝修有致誠之地。游居有稅駕之所。姜巴古陌。秦望舊封。肅然清光。復如開元天寶之歲矣。先是紫陽之右。有靈寶院焉。眞臺故基。鞠爲茂草。先生殫罄資用。御今上。殿堂有開必先。無遠弗届。都督武陵康王奉錢百萬。梁王造殿一區。向道之徒。咸助厥事。會未周歲。惟新舊宮。皆先生之力也。昔大隗致襄城之駕。庚桑化畏壘之人。是知道心惟微。其應如響。時則有若道士。經若虛。協規同志。是攝是贊。幹事以恪。感物以誠。績用不愆。斯實攸賴。先生以保大壬子歲。夏四月。悉書夫屋之數。疆畔所經。請命於京師。申禁於郡縣。以授茅山都監鄧君棲一。能事旣畢。數日而化。期命玄應。昧者不知。夫仙階感召。諒非一揆。若乃神清氣靈。背籙標映。受之於天也。心虛器沖。玄德充蔚。

基之於性也。昭真垂教。啓煥靈迹。行之於勤也。故策名紫素。飛步黃庭。流功儲慶。必參相合。然則先生之道。其殆庶乎。雖歛駕不留。冥升日遠。而高風可述。遺範在人。進而紀之。翰墨之職也。鄧君企慕前躅。見託直書。己未歲秋八月記。

宣州開元觀重建中三門記

夫清淨玄默。道之基也。宮館壇墀。道之階也。生知者。因基以成。御今上勤行者。升階而覩奧。故君子德業玄挺。仁慈積中。必廣馴致之方。乃形兼愛之迹。爲科誠以檢其情性。爲象設以致其誠明。情性平則和氣來。誠明通則靈符集。由是登正真之境。入希夷之域。曠矣無際。薰然太和。斯實興化致理之方。還淳返朴之本。豈與夫延方士。尚祕祝。求長生。以自奉者。同年而語哉。宣州開元觀。遠擬清虛。獨標形勝。敬峰崇峻。鎮其後。句谿澄澈。經其陽。鍾一方滄粹之精。結三素氤氲之氣。當泰陵之尊道。揭聖厓於華題。藹爾殊庭。居爲福地。及連纏百六。數偶三災。雖棟宇不渝。而制度多闕。靈蹤必復。有待而興。主上嗣位之七年。皇室再造之一紀。今儲后徇臧札之操。讓德承華。體間平之賢。總戎藩服。首台司而握師律。鎮京口而領宣城。其爲政也。質于先正。諮於耆老。義以果斷。仁以發生。民力不偷。闕政咸舉。而斯觀路門久廢。遺址將蕪。非所以敬教尊祖。會昌建福者也。乃命執事。卽從經度。民多暇日。府有羨財。勤而不勞。成而勿亟。巨棟山立。層簷翼舒。六扉洞開。方軌並入。重廊助其迴合。祕殿表其深嚴。十絕之幡。拂文楣而絢彩。九龍之驂。軋金鋪而振響。瞻之者有凌雲之氣。經之者疑駕歛之游。信足以勵上士之進修。福蒼生於仁壽。旣而功宣納麓。望集撫軍。大壯之制。斯成。重離之位。亦正。貞符允塞。盛德宜書。道士孫洞虛。素業瀟深。至誠敦慤。發揚真

迹啓迪嘉猷。永爲不朽之功。願紀他山之石。宮臣執筆。以謹歲時。戊午秋九月庚申記。

紫極宮新建司命眞君殿記

夫金闕琳房。不可階而升也。惟至誠能通之。靈符景福。不可企而望也。惟至行能致之。故君子行道於時。宣力於國。敷惠於民。貽範於家。此人之極致。自天所祐也。又況考集靈之地。崇列眞之宇。薦納約之信。勵勤行之誠。然則希夷眇邈。超言象之表矣。有若故司空相國馮翊懿公。承世功之緒。襲重侯之業。地親於副馬。美繼於緇衣。便蕃臺閣。夷險中立。不倚金石貫其心。唯力是視。風霜盡其節。故四綜會府。再踐中樞。三殿方鎮。一平邦土。慎終如始。沒有遺忠。激楚之樂雖窮。通德之門不改。嗣子太僕少卿俊等。祇奉慈訓。弗敢失墜。以爲公之純誠沖氣。本道家者流。而仁政令典。近浹於三茅之境。高齋甲第。夙鄰乎玄元之宮。故棲神植福。必先於是。爾其治城峻址。西州舊署。卞忠貞之遺隴。郭文舉之故臺。九原可作。勝氣如在。乃相形勢。補廢闕。建司命眞君之殿。於宮之良維。披眞蘊以立程。集國工而考藝。瞻星揆日。不勞而成。崇高壯麗。重深藻繪。煥如也。凝旒端簡。負辰仍几。穆如也。珠幡絳節。紛披乎左右。空歌洞章。蕭寥乎晨暮。眞聖以之而臨御。純嘏以之而蕃錫。賢人啓後。孝子奉先。無以加於此矣。鉉始以事分通。舊從子弟之游。終以禁掖具員。陪僚屬之末。及公之啓手足也。復忝國士之許。辱寄託之任。知己之厚。何日而忘。短篇敘事。蓋感遇之萬一也。

楞嚴院新作經堂記

君子才足以治劇。惠足以安民。見危致命。以死勤事。有一於此。然後可以薦信於無方之神。儲慶於必大。

之門噫楞嚴院經堂之作也。其庶幾乎平陽柴君諱進思字昌美故太尉中書令尋陽靖王之孫也。少而
爽俊長而忠恪。尤善騎射。頗曉兵書。靖王愛之。出則典親兵。居則專家政。幹蠱之美。宗族稱之。王薨始爲
公臣。累遷旅帥。鴻圖再造。金革寢威。上以其才能可任。故以爲內宴副使。乘輅建節。將命四方。盤根錯節。
所至皆治。改鄂岳觀察巡官。知永興縣事。縣有山澤之征。權管之利。歲終考績。倍於前人。遷泰州軍事判
官。兼營田鹽監。平蠹政。決庶獄。勞農督課。潔已律人。民不告疲。公有餘利。除勸農使。復監池吉二郡。護武
昌軍。千里晏安。上流靜謐。會梁人入寇。我武未揚。東畿陷沒。羣情震駭。命君爲行營。援軍使。率舟師數
千。鼓行而東。平難濟口。復海陵郡。於是淮泗之地。聲勢始通。乘勝長驅。因逼隋苑。前茅接戰。羣帥後期。振
臂奮身。有死無二。雖破竹之勢。敗於垂成。而東道清夷。本由君之一舉也。江都剋復。歸葬京師。天子憫焉。
贈左千牛衛將軍。賻贈加等禮也。嗣子殿前承旨廷遇等。棘心在疚。茶蓼兼倍。以爲苴麻。苦由飾哀之期。
有終。蒸嘗封樹。追遠之禮。有數。復欲圖不朽之績。微無邊之福。則金仙之教。世之所崇。宗旨在於經文。威
容存乎像設。於是擇奇勝之地。補闕遺之事。今上經堂六間。塑地藏菩薩像一軀。几席什器之類。華而備
精。而固。耽然其質。煥乎其章。深嚴足以遠世。喧虛明足以味玄旨。其全節之風也。如彼。其集靈之所也。如
此。然則冥冥之祐。縣縣之慶。豈誣也哉。余頃歲左官海陵。君盡傾蓋之分。感忠臣之事。主嘉孝子之奉親。
刻石紀事。以聳善也。援筆悽愴。無心於文。保大丁巳歲春三月日。東海徐鉉記。

攝山棲霞寺新路記

棲霞寺山水勝絕。景象瓌奇。明徵君故宅在焉。江令公舊碑詳矣。高宗大帝。刊聖藻於貞石。紆宸翰於瑤

題煥乎天光。被此幽谷。先是茲山之距都也。五十里而遙。方軌並驅。崇朝可至。及中原今上亂。多壘在郊。野無牧馬之童。岐有亡羊之僕。義祖武皇帝潛龍茲邑。訪道來游。始命有司。是作新路。金椎既隱。玉馱言還。桐山之駕不追。回中之道亦廢。於戲。聖人遺迹。必將不泯。微禹之歎。夫何逮哉。保大辛亥歲。時安歲豐。政簡民暇。粵有寺僧道嚴。名高白足。動思利人。百姓莊思。家擅素封。積而能散。嗟亭候之不復。憫行旅之多艱。乃相與翦荆榛。疏坎窞。闢通衢之夷直。棄邪徑之迂迴。建高亭於道周。跨重橋於川上。鑿甘井以救渴。立名表以指迷。草樹風煙。依然四望。峰巒臺榭。肅肅前瞻。由是江乘之塗。復識王畿之制矣。余職事多暇。屢游此山。喜直道之攸遵。嘉二叟之不懈。爲文刻石。用紀成功。俾後之好事者。以時開通。隨壞完葺。此碣有泐。斯文未湮。不亦美乎。其年八月一日。兵部員外郎知制誥徐鉉記。

常州義興縣重建長橋記

聖人作川梁以濟不通。舟車所及。纜連棋布。若乃形勝傑大。名聞天下者。亦無幾何。陽羨長橋其一也。夫英賢之所躔次。邑居之所瞻望。山川之精粹。宅焉里城之神靈。憑焉廢而興之。圯而葺之。豈惟備政。足以徼福。是橋也。徵諸圖牒。則後漢邑令袁君創造。國朝永泰中。令丘君新之。其他無聞焉。中興之初。邑有義夫曰吳濛。吳瀆。率以私帑。備加營今上。人賴其利。踰三十載。丙辰歲。國步中梗。百越寇邊。邑人敗之。燒營而遁。飛燄旁及。宏梁半摧。甲寅歲。著作佐郎劉君來爲邑長。視其制度。知非民力之所能濟。乃狀其事。白於有司。上聞嘉之。詔賜錢八十萬。君信而好古。寬而得衆。尉盧倩。鼎甲餘慶。俊造策名。政是以和。事無不舉。乃相與敷王澤。因民心。備物致用。程功揆日。器利工善。材良事時。戊辰歲冬。而葺。明年暮春而畢。長五

十步。廣七步。對縣樓而直出。跨荆谿而橫絕。丹牖其飾。宛偃蹇而虹舒。崇高其勢。邈茗亭而山立。朱輪方軌。駟馬連騎。營營市井。憧憧往來。有衽席之安。無揭厲之患。昔者乘車濟涉。聖人謂之無教。橋梁弗修。賢相知其不能。以今方古。勝負分矣。夫書云考績。傳載稱伐。庸庸善善。其可廢乎。刻之貞珉。以示來者。庚午歲春二月十五日記。

徐騎省集卷第十四 記二

重修徐孺亭記

喬公亭記

毗陵郡公南原亭記

劍池頌

九疊松贊

硯銘

野老行歌圖贊

四皓畫贊

許真人井銘

高侍郎畫象贊

文獻太子哀册文

齊王贈太弟哀册文

重修徐孺亭記

至矣哉。天之愛民甚矣。雖數有治亂。而常生聖賢。故得其位。則功加于時。舛其運。則教垂于後。雖銷聲滅迹。全身遠害。不德而德。普逃名而名揚。擁篲築宮。禮重于列國。式閭表墓。道光於無窮。舉善而教。政之大者也。恭惟我祖。炳靈南國。舊宅界乎仙館。高臺峙乎澄陂。孺亭之稱。海內瞻仰。名公良牧。代加崇飾。千載之下。猶旦暮焉。頃屬邦君非才。敗我王度。翳焉層御^{今上}。鞠爲茂草。噫。百世之祀。誰能廢之。庚申歲。始建王都。辛酉歲。遂迂清蹕。肆覲羣后。疇咨先賢。餘基未傾。偉人將至。旣而鼎湖在御。桐圭錫壤。丞相司空鄧王。以茂親之重。膺分陝之權。思老成之典刑。仰高山之景行。罔言而信。不肅而嚴。乃命經營。將從縮^{今上}。成方起。百堵未周。甲子歲。入秉國鈞。以武昌連帥。侍中濟南公。代司宮籥。公致用以武。從政以文。祇奉蕭

規率由周禮。再廣成制。詳考舊基。夷坎窞而就平。裨崖岸而增固。乃崇堂奧。乃加藻績。右嚴罇坵之序。左設庖膳之區。前臨康莊。旁眺城闕。平湖千畝。凝碧於其下。西山萬疊。倒影於其中。依然懸榻之場。想見致芻之狀。與夫洪崖之館。絢綵於煙霞。滕王之閣。騫飛于雉堞。南州之物象備矣。前哲之光靈萃焉。嗟乎。君子與一役。建一事。于時必可頌。于後必可觀。茲亭之作也。都人朋悅。過賓矚目。紀于方國之史。播于樂職之詩。鉉也。幸承燕翼之謀。獲參翰墨之任。俾垂不朽。敢憚蕪音。

喬公亭記

同安城北有雙谿禪院焉。皖水經其南。求塘出其左。前瞻城邑。則萬井纒連。却眺平陸。則三峰積翠。朱橋偃蹇。倒影於清流。巨木輪囷。交陰於別島。其地豐潤。故植之者茂。遂其氣清粹。故宅之者英秀。聞諸耆耆。喬公之舊居也。雖年世屢遷。而風流不泯。故有方外之士。爰今上經行之室。回廊重宇。眈若深嚴。水瀨最勝。猶鞠茂草。甲寅歲。前吏部郎中鍾君某字某。左官茲郡。來游此谿。顧瞻徘徊。有懷創造。審曲面勢。經之營之。院主僧自新。聿應善言。允符夙契。即日而栽。逾月而畢。不奢不陋。既幽既閑。馮軒俯盼。盡濠梁之樂。開牖長矚。忘漢陰之機。川原之景象咸歸。卉木之光華一變。每冠蓋萃止。壺觴畢陳。吟嘯發其和。琴碁助其適。郡人瞻望。飄若神仙。署曰喬公之亭。志古也。噫。士君子達則兼濟天下。窮則獨善其身。未若進退以道。小大必理。行有餘力。與人同樂之爲懿也。是郡也。有汝南周公以爲守。有潁川鍾君以爲佐。故人多暇。豫歲比順成。旁郡行再雩之禮。而我盛選勝之會。鄰境輿閭戶之歎。而我賦考室之詩。播之毗頌。其無愧乎。余向自禁掖。再從放逐。故人胥會。山水窮游。良辰美景。賞心樂事。有一於此。宜其識之。立石刊文。以示

來者于時歲次乙卯保大十三年三月日東海徐鉉記

毗陵郡公南原亭館記

人生而靜性之適也若乃廟堂之貴軒冕之盛君子所以勞心濟物屈己存教功成事遂復歸于靜用能周旋於道常久而不已者也有唐再造俗厚政和人多暇豫物亦茂遂名園勝概隱幃相望至于東田之館西州之墅萋湖張侯之宅東山謝公之游青谿賦詩之曲白楊飲酒之路風流人物高視昔賢京城坤隅爰有別館百畝之地芳華一新舊相毗陵公習靜之所也其地却據峻嶺俯瞰長江北彌臨滄之觀南撫新林之戍足以窮幽極覽忘形放懷于是建高望之亭肆游目之觀睨飛鳥於雲外認歸帆於天末四山隱見而屏列重城邈迤而霞舒紛徒步而右回關精廬于中嶺倚層崖而築室就積石以爲階土事不文木工不斲虛牖夕映密戶冬煖素屏塵尾樞几黎牀談玄之侶此焉游息設射堂于其左淇方塘于其下虛櫺顯敞清風爽氣襲其間椅岸縈迴紅蕖翠藻其浹至于芳草嘉禾修竹茂林紛敷翳蔚不可殫記凡廡庫之室廚廩之區賓燕所資不戒而具每良辰美景欣然命駕羣從子弟結駟相追角巾藜杖優游笑詠觀之者不知其爲公相也古人有言朝廷之士入而不能出況於輕鐘鼎之貴徇山林之心將相之權不能累其真肺腑之親不能系其遁道風素範豈不美歟又以鉉無事事之情有善善之志見微拙筆用勒貞珉是時歲次辛酉冬十月日記

劍池頌并序

歲次辛酉月躔仲冬王人徐鉉揚旌銅柱之鄉稅駕劍池之廟慨嘆靈迹徘徊故墟或曰龍泉太阿安得

爲寶出也不爲當世之用。佩之不免亡身之災。天下固有虛名而無實效者歟。愚以爲不然。夫聖人之於天下亦物耳。所稟受者異。故能與造物者並而爲天下王。是以聖人之作也。天不愛其道。地不愛其寶。同聲相應。同氣相求。人謀鬼謀。皆爲聖人用。無功無迹。豈尋常所能識乎。然則集陰陽之英。萃山澤之精。窮爐冶之妙。極鋒鏘之利。宜其冥合玄造。弼成聖功者也。昔黃帝法月滿而鑄鏡。用能照燭怪魅。辟除不祥。大禹收貢金以鑄鼎。使民知神姦。以遠不若。漢高祖佩斬蛇之劍。以撥亂除害。奄有天下。是以三者皆人力所爲也。咸能輔佐興運。與時隱見。其可誣乎。在昔三分叔世。咸有昏德。天命將改。寰宇將同。斯劍知之。故靈發于下。氣浮于上。應帝王之符命。矚識者之觀瞻。亦猶伊尹負鼎於莘墟。仲尼動色于魯相。千載一會。聖賢所以汲汲也。向使晉武能誕若天意。克明峻德。判忠邪之路。緹驕侈之心。則賢能盡其才。神靈效其用。溘耀之烈可續。七百之期不爽。而王猷旣鬱。亂本旣成。百姓失望。羣龍沮色。於是斯劍也。委質張雷之鑑。一泄其憤。遠迹劉石之醜。復歸于潛。其出也。所以示神之不亡。其去也。所以示唯德是輔。則其爲用也遠矣。昔者周過其數。秦不及期。是知天命之精微。可以人事而延促。前哲論之備矣。若夫精真之誠修于內。感召之致應乎外。自然而然。有道存焉。不可以智求。不可以言達。王者得之。則三五之功。其餘事耳。然則天下至寶。本非人臣所服。變化無方。神物之事也。忘身殉國。忠臣之節也。兩造其極。求仁得仁。復何怨乎。廟在豐城。故縣俯瞰池岸。壯武侯雷府君之象祀焉。去今縣四十里。而龍泉太阿之廟。別在中路。棟宇綿久。皆將傾頽。邑人朱暉等。洽重熙之化。感百世之祀。獎率同志。唯壽宮千載光靈。煥然如在。縣令孟賓于。尉孫舉。皆以文行之懿。中賢良之選。接武連事。惠此王畿。推誠於民。荐信於神。風雨不愆。耕鑿咸若。

先賢遺躅。其不泯也宜哉。是池廣不終畝。深才數尺。父老云。近歲旦暮。往往有雲霧蒙覆其中。恍惚之理。不可測已。今中興三葉。聖政惟新。豈非靈命孔昭。玄貺將集。天命不僭。弘之在人。使臣司言。敢告有位。乃爲頌曰。

周室旣衰。仁獸來臻。晉祚不融。龍劍効珍。神化無方。天命無親。德之不建。與運俱淪。歸潛厚載。以俟真人。惟劍之神。惟賢之識。湛湛靈沼。綿綿廟食。瑞氣常在。玄符靡測。垂茲頌聲。永永無極。

九疊松贊并序

同安郡南二十里。古城南隅。有松焉。拳曲擁腫。勢若九疊。交柯聳幹。無不蟠屈者。其地高迴。旁無壅闕。莫知其何由如是。或曰。下有頑石。根不得舒。氣脈憤興。故爲此狀。好事者以爲盛觀焉。余始聞其名。今至其下。睹之而貽曰。嗟夫。草木麗地。稟天之和。條暢秀茂。固常也。若乃原隰之宜。失陰陽之候。遠柔脆之姿。則離披枯瘁。貞勁之質。則鬱抑盤錯。生理乖矣。獨有瓌奇之貌。嗚呼。失其所乎。昔在太古。君臣強名。賢愚同域。洪流洞洞。是謂大和。降及後代。聖人有作。顯仁義。建功名。扶衰拯弊。不得已也。於是。有愛惡。則象生焉。其甚者。飾行以矯時。執方以違俗。考槃閭巷。聲重王公。上德喪矣。獨有高世之譽。嗚呼。荀孟屈賈之徒。豈斯松之類耶。感物徘徊。因爲之贊。吁。嗟彼松。孰爲而生。天枉其性。屈折其形。人實我貴。我非所營。噫。嘻。溘風曷歸。大道安行。吾欲與汝。各全其真。作此好歌。以告騷人。

硯銘

他山之石。是斲是治。荆藍表瑩。雲露含滋。執簡而至。磨鉢在茲。言出乎身。文以行之。噫。嘻。君子。慎爾樞機。

野老行歌圖贊

昔在陶唐。光宅萬國。下或知有。帝將何力。鼓腹擊壤。嬉游無極。自然而然。忘適之適。中古道薄。親仁懷德。末世政亂。姦宄寇賊。溘風不還。可以嘆息。丹青志古。存諸往則。嗟爾有位。鑑茲王式。

四皓畫贊

君子道行。必資其位。邈哉四賢。隱居救世。皤皤之貌。丹青假志。爾無素餐。視此知媿。

許真人井銘

長史含道。棲神九天。人非邑改。丹井存焉。射茲谷鮒。冽彼寒泉。分甘玉液。流潤芝田。我來自西。尋真紫陽。若愛召樹。如升魯堂。敬刊翠琰。求識銀牀。噫嗟後學。揖此餘光。

高侍郎畫象贊

穆穆清真。不緇不磷。文高學富。道直誠純。昭質已邈。斯猷愈新。丹青畫象。以永光塵。棠陰峴首。瞻仰霑巾。

文獻太子哀册文

維顯德六年。太歲己未。九月癸卯朔四日丙午。文獻太子。薨于東宮延春殿。以某年十有二月壬申朔十三日甲申。遷座于文園禮也。象輅差階。龍樓向曙。肅仗衛以將引。儼罇壘而不御。主上感深守器。念極賓天。痛玉符之靡召。悲銀榜之空懸。詔下臣於信史。載盛烈于瑤編。其詞曰。

於昭我唐。誕受帝祉。舊邦維新。令聞不已。亦有積慶。載生賢嗣。平王之孫。吾君之子。越在綺繄。芳若蘭蓀。綠車表慶。寶玉疏恩。東平錫壤。南昌啓藩。耆老諮訪。正墳討論。文以行禮。時然後言。敬愛表於天性。信厚

由於自然。運屬重熙。地惟明兩。古尙達節。吾先德讓。剖符分陝。居東作相。封燕禮緝。副戎業廣。績著保釐。道高寅亮。敬亭南屏。浙水東馳。是惟關輔。以衛京師。乃移節鉞。建此藩維。擇其令典。導以由儀。仁薰俗厚。化洽風隨。國步中艱。文身怙亂。鎮以高臥。制之長算。取彼鯨鯢。戮爲京觀。吳門載同。輿詞協從。天之眷命。我豈矜功。乃正皇統。斯維至公。爰撫軍而監國。亦納揆而登庸。業彌盛而學彌廣。望益高而禮益恭。不言而信。有感則通。多壘以之。而罷警。四門以之。而除兇。反瀆和于國儉。致符瑞於年豐。天亦難諶。胡寧不惠。枉矢流蒼震之野。火耀奄前星之次。捨內豎之問安。進浮正而把袂。九重增慟。萬邦銜涕。冥茫少海之波。寂歷滂雷之肆。嗚呼哀哉。感神飈之遠至。嘆芳歲之云徂。遠大學之齒胄。啓佳城而下居。建采章于綢練。儼備物于塗芻。經武帳之崑崙。據青龍之鬱紆。嗚呼哀哉。苦霧閉塗。窮陰殺節。重雲之旭。日如晦。大壑之層冰似雪。指京口而不臨。背都門而永訣。萬目愁而旆旌慄。羣心感而笳簫咽。嗚呼哀哉。瞻瑤山之落木。聽玄圃之迴風。臺思子以何極。宮長男而遂空。集荆門之故吏。會商嶺之悲翁。淚淋浪而洒袂。氣怨結而盈胸。嗚呼哀哉。歷邃古以遐觀。考令猷於三善。孰仁孝之昭著。復功名之不顯。惟史筆與毗頌。配天長而日遠。寧騁麗于東田。豈駁能于文選。嗚呼哀哉。

齊王贈太弟哀册文代喬侍郎

維年月日。天策上將軍。太師尙書令。臨川牧齊王。薨于臨川府之正寢。主上追先皇付託之意。表叔父遜讓之風。乃下明詔。册贈太弟。卽以其年十一月日。葬于江州某縣某鄉廬山之原。從理命也。綃幕夕陳。虞歌曉引。改兔園之賓館。設龍樓之陛楯。閔靈儀以愈遠。窮哀端而靡盡。愴永恨于宸襟。俾誕揚于令聞。其

詞曰。

皇天眷祐。錫唐良輔。時惟宗英。裔自文祖。孝弟敦慤。機神穎悟。昔在中興。爰當就傅。申畫宛水。錫茲茅土。德望日躋。邦家是毗。鉤陳宿衛。宮籥攸司。於惟淮甸。實始皇基。道之以禮。董之以威。俗賦甘棠之頌。人歌樂職之詩。運屬繼明。業隆二聖。首輯瑞玉。來參大政。乃爲左相。其班上台。乃封夏口。其賦千乘。赫矣元后。蒸哉古風。不私其子。天下爲公。並命叔仲。奮茲顯庸。或踐我舊藩。或陟爾青宮。辭不獲命。處之益恭。晉鄭之勳。推而更融。臧札之操。久而彌崇。若秦伯之讓。異周公之東。京江汝水。旄節從容。皇統旣正。靈符允答。國步清謐。羣生欣洽。復大道于三古。永文昭于萬葉。越我嗣君。尊尊親親。極以呂望之高位。崇以貞觀之舊稱。賜書不詔。贊禮不名。曰予小子。實繫叔父。維藩維翰。宗社之故。永錫難老。日新王度。謂天蓋高。命亦靡常。台階殞宿。河月沉光。慟東堂之哀臨。輟南國之春相。與聖賢而共歎。獨天地之何長。嗚呼哀哉。知生若寄。臨凶奢於蜃炭。舉士庶而均哀。頌聲猷于無間。嗚呼哀哉。歸虎節於王府。靡鸞旌于雉門。閉西園之風月。慘緜嶺之烟雲。象輅廻兮遵途遠。歸帷整兮逝水奔。賓友散兮霰雪積。巾箱故兮經籍殘。嗚呼哀哉。身歿壤存。道悠運促。贈今日之典冊。闕當時之寶玉。全大義以經國。激清風而被俗。昭遺烈于千齡。寄玄堂於陵谷。嗚呼哀哉。

徐騎省集卷第十五 墓銘一

唐故左諫議大夫翰林學士江君墓誌銘

唐故秦州刺史賈公墓誌銘

唐故秦州刺史陶公墓誌銘

唐河南方公墓誌銘

唐故筠州刺史周君墓誌銘

唐故朝議大夫太原王君墓誌銘

唐故奉化軍節度判官趙君墓誌銘

唐故左諫議大夫翰林學士江君墓誌銘

公諱文蔚字君章其先濟陽考城人也昔高陽恢若水之靈光有萬國伯益獲箕山之護克成夏功故其子孫延祚丕顯茅土錫胤圭組流光在漢者爲孝子在宋者爲忠宰在梁者爲烈將在陳者爲詞臣長城旣封淮水亦絕辭周粟而遠驚避羸亂而深藏徙籍建安世爲大姓至於我王考毗考秦皆以隱德清操垂爲門風惟公嗣奕葉之賢負生知之異幼挺奇表夙韜殊量殫儒墨之祕奧窮文史之菁英閭里歸仁宗黨稱孝于時天下未一遐方不寧公鄙斥鷃之爲從黃鵠之舉類延州之觀樂同太史之探書升名俊造從事河洛衰俗難佐天壤不支我烈祖孝高皇帝王業始於江東仁風被于四裔公杖策高蹈款關來儀府朝肅以生風臺閣藹其增氣署州觀察巡官試祕書郎遷水部員外郎賜緋魚袋王國初建改比部員外郎知制誥于時天人協應獄訟攸歸舜禹相與言游夏不能措潤色之任也我則無慙旣受禪遷主客郎中知制誥如故俄而眞拜仍賜金紫今上嗣位大禮聿脩徙公爲給事判太常卿事時同軌胥會

有司失職。公與司門郎中蕭君儼。博士韓君熙載。協力建議。周行翕然。由是祖功宗德之位定。大行昭名之義允。功著高廟。與天無窮。明年拜御史中丞。矯枉持平。無所顧憚。坐廷劾宰相。其言深切。貶江州司士參軍。初國朝自王義之後。曠數百年。憲著之閒。舉無廢職。然未有危言激論。如此之彰灼者也。故權右振竦。朝野喧騰。傳寫彈文。爲之紙貴。人心旣爾。天鑑亦迴。前所劾者。或免或黜。公就加江州營田副使。頃之徵爲衛尉卿。俄拜右諫議大夫。充翰林學士。權知貢舉。出納密命。樞機靡失。登進造士。衡鑑無私。聳禁署之清風。著春官之故事。薦賢之賞行。及于台司。曳杖之期。奄先于朝露。春秋五十有二。保大十年八月二日。卒于京師官舍。皇上痛惜。爲之廢朝。送死卹孤。一從公賜。有司考行。易名曰簡。卽以其年九月十三日。葬于某縣某里之原。禮也。長子翥。祕書省正字。次子騫。皆早卒。今以從子翹爲嗣。嗚呼哀哉。公心平氣和。貌古神正。雅好玄理。有方外之期。尤善詞賦。得國風之禮。去華簡禮。不以位望驕人。憐才誘善。不以威名傲物。操履堅正。靡得動搖。襟懷坦夷。初無蒂介。謫居江楚。恬然自足。孜孜色養。蒸蒸孝心。嘗爲詩云。屈平若遇高堂在。應不懷沙獨葬魚。此其心也。江州節度使賈公崇。以武立功。以剛肅物。事公如師傅。親公如兄弟。時皆服公之重名。而賢賈之樂善也。旣歸京寓。居公廡。無以家爲。二子繼亡。一慟而已。齊死生于夢覺。遺寵辱於錙銖。古之達者。何以過此。嗚呼。凡我僚舊。均哀共戚。入貽婁之門闕。覽伯喈之經籍。睇落日以流慟。愬秋風而沾臆。企景行於高山。勒哀詞于樂石。其詞曰。

高陽之裔。伯益之孫。展矣君子。載大其門。爰翔爰集。樂我樹檀。影纓幕府。振藻西垣。禮儀卒獲。風憲攸端。道行在時。業隆自我。英英若人。見義必果。直指烈烈。宮鄰瑣瑣。死生以之。何適不可。允矣天鑒。明哉主恩。

乃還宣室。乃入修門。從容禁署。密勿王言。得才爲盛。知人則難。求尸宗伯。載善其官。人必有終。古無不死。嗟嗟若人。風流永矣。徐庶有母。鄧攸無子。闕里諸生。荊州故吏。謂之何哉。啜其泣矣。秋風落木。逝水成川。昨朝飛蓋。今日荒阡。一邱殘照。萬古愁煙。素車自返。寶劍高懸。高才兮直道。共盡兮何言。

大唐故中散大夫檢校司徒使持節秦州諸軍事兼秦州刺史御史大夫洛陽縣開國子賈宣公

墓誌銘

公諱潭。字孟澤。洛陽人也。周先同姓。卽列國之諸侯。漢得名臣。乃洛陽之才子。攀鱗河北。豈須方面之功。借筭譙都。自有良平之策。源長派遠。德厚流光。史不絕書。後將必大。當先天之內禪也。我七代祖黃門侍郎平陽公曾。實演丕命。及至德之中興也。我六代祖黃門侍郎晉國公至。實贊大猷。曠古已還。一家而已。五代祖孫衡州刺史高祖。司門員外曾祖昶。太子司議郎祖琛。河南密令。皆有韜世之量。濟衆之仁。大位不躋。餘慶斯洽。考翊以經術擢太常第。以才用爲諸侯卿。捍寇輸粟。有勞王室。于是佩金紫。升朝廷。上疏論邪寧節度王行瑜。恃功恣橫。坐貶愛州掾。及行瑜就戮。優詔徵還。復出常州刺史。鹽鐵江淮留後。屬宗社中絕。官司解弛。計吏未上。哲人其萎。公有世德之資。負夙成之器。風神爽邁。智術通明。景福二年。以學究一經。射策高第。釋褐京兆府參軍事。遷祕書郎。侍從南遷。進修不懈。天祐丁卯歲。居先君憂。服喪過哀。宗黨稱孝。楚泗郡守宣城廉使。虛左交辟。三府馳名。俄丁內艱。感憂如禮。藝祖武帝。創基分陝。側席求才。素與公周旋。卽加禮命。奏記書檄。一以委之。內贊謨猷。外爲詞令。出應盟會。入陪罇俎。霸功光赫。公有力焉。十有餘年。任用無閒。旣而楚雲告變。穆醴不陳。已酬國士之知。亦得退人之禮。改宣池觀察判官。烈

祖高皇帝受命中興。不忘舊德。徵拜祕書少監。充儀禮副使。遷中書舍人。崇英翰林學士。周慎密命。潤色王言。公望無渝。朝獎彌厚。保大嗣統。拜兵部侍郎。知制誥。學士如故。充永陵儀禮副使。同軌胥會。大禮無違。遷兵部尚書。修國史。考定郊廟之樂。褒貶歸正。擊拊允諧。會六夷南侵。天眷北顧。命公持節。使于契丹。宣大國之威神。得諸戎之要領。及輶軒還軫。而控弦出塞矣。報命稱旨。時論具瞻。于是避寵台衡。就安關輔。除秦州刺史。視事數月。丕變土風。遘疾還京。保大六年九月二十有一日。卒於江寧永安里官舍。享年六十有八。皇上軫悼。再不視朝。飾終之禮。務從加等。太常考行。賜諡曰宣。以某年月日。葬于某所。與夫人楊氏合祔焉。禮也。長子朝散大夫。行大理司直彬。次子秦州司倉參軍穆。少子修等。咸負當世之才。皆爲保家之主。種德垂範。未易可量。長女用文。適水部員外郎楊元鼎。不幸早世。次曰用柔。適膳部員外郎。知制誥張緯。次曰用光。適進士姜某。少曰季芳。尚幼。惟公事業富壽。昭映一時。族望婚姻。熏灼當代。自非天監與善。孰能若斯。雖大用未光。而能事畢矣。鉉以世親之舊。執隨行之敬。服義承教。惟公在焉。刊勒論撰。蓋感遇之萬一也。其銘曰。

於惟茂族。實有世德。七葉繼軌。嘉猷允塞。賈矣君子。其儀不忒。修詞立誠。以匡王國。言以文身。兵由威克。東畿之政。爲邦之則。天地長在。春秋代遷。今朝喪善。何日生賢。蒿里誰地。佳城許年。永安舊里。門館依然。寢丘傳邑。京兆開阡。勒銘泉石。以配青編。

唐故秦州刺史陶公墓誌銘

公諱敬宣。字文褒。其先尋陽人。因官徙籍。今爲合肥人也。西京作相。開國封侯。于是貽孫南國。主盟長沙。

公茲焉不朽。籬邊黃菊。解縣印以言歸。嶺上白雲。挂朝衣而莫返。光靈攸屬。固無得稱之。丹青所存。可略而言也。高祖復右監門衛將軍。曾祖琳。建州錄事參軍。祖晟。青州博昌縣令。皆天縱其能。世濟其美。韎韐君子。屈迹于驍游。縉紳先生。折腰於州縣。積善餘慶。明德後興。考雅武昌軍節度使。贈太師楚惠公。雲雷今上御名。屯龍虎冥會。橫瑠戈而蕩寇。功冠一時。裂鶉尾以疏封。禮優萬戶。公卽太師第四子也。幼而岐嶷。長而俊茂。非禮勿動。時然後言。天祐中。門廕起家。太子校書。遷至府長史。賜緋魚袋。丁先公憂。時年十四。孝心昭感。喪禮無違。釋服除都官郎中。賜紫金魚袋。改大理少卿。青縑寓直。時推伏閣之勤。丹筆持平。人絕署門之歎。俄遷江都少尹。趙張治劇。由來表則之。司淮海分疆。自昔輕揚之地。公處之貞固。行以廉平。愛民則忠。事長以順。一折欣賴。三載有成。遷大理卿。仍兼尹事。烈祖孝高皇帝。允釐百揆。實總六師。爰求鄭國之良。以武楚人之廣。奏請君判左右軍事。丁酉歲。堯咨文禪。禹迹中興。徵舊德于角犀。考官成于喉舌。拜工部尚書。今上嗣位。加金紫光祿大夫。檢校太保。會閩人作梗。王旅欲南。聲實所資。豫章爲急。故輟公副總判軍府。及羽檄四出。芻輓相尋。民以悅而忘勞。事有備而無患。嶺表既定。洪人亦康。復移宛陵。仍兼棣州刺史。海陵郡甸服之地。邦賦最優。歲比不登。民用胥怨。除秦州刺史。公以清淨爲理。仁恕積中。視吏民其如傷。守法令而畫一。餘糧棲畝。無庚癸之呼。白駒過隙。感辰巳之歲。春秋五十有二。保大八年夏四月十有八日。卒于位。上省奏。傷悼。輟朝兩日。有司考行。賜諡曰順。卽以其年月日。權窆于東都。明年月日。葬于江都府縣里。與前夫人合祔焉。禮也。惟公冲和體質。仁孝爲基。立身有常。與物無忤。尤善聲韻。聞音而知樂。頗好篇詠。下筆而成章。身後不留餘財。所任必有遺愛。求之作者。斯亦難能。嗣子秦州司倉參軍。

崇鼎、崇諒、崇倫等，皆勤修令名，夙奉成訓，君恩靡替，家法如初。鉉昔在朝行，實惟舊好，今從左宦，仰繫東道，痛死生之已矣，感意氣以何報。延陵挂劍，願保于不欺；峴首刊碑，終慙於妙絕。銘曰：淮淝之靈，衡霍之精，必有賢傑，爲時而生。乃伯乃仲，乃侯乃卿，望冠六事，風馳百城。人生有涯，大命夙傾，不見君子，猶存政聲。遠日旣吉，靈輜旣行，寂寞公館，蕭條古垌。哀哀郡人，泣涕沾纓，嗚呼彼蒼，不知福善之胡明。

唐故金紫光祿大夫檢校司徒行少府監河南方公墓誌銘

公諱訥，字希仁，其先河南人也。後世從官徙籍新安，支派繁衍，遂爲郡之著姓。迨公數世，皆以儒雅退讓，播爲門風。曾祖顯，登州文登縣令；祖亮，左武衛兵曹參軍、考穀、榮王府司馬；母聶氏，追封河南縣太君。問政先生師道之長女也。公承積善之慶，負夙成之智，砥節礪行，好學能文。時然後言，非禮勿動，鄉曲之黨，翕然稱之。太師陶公來守新安，撫納人士，署爲郡吏，委以典籤，恪恭詳敏，甚稱所職。歷事累政，其志如初。烈祖肇基王業，元宗實綜軍政，管記之任，勤擇其人。聞公之名，召致幕府。王國初建，署寧國軍節度館驛巡官，掌都統表奏。皇室再造，慶賞遂行，擢拜虞部員外郎，掌元帥表奏。數歲，以皇孫就傅，命公侍讀，講道贊德，勵裨益之誠，端己直躬，盡表微之節。俄遷水部郎中。明年，皇孫封南昌王，東都留守，以公爲留守判官，遷主客郎中，參贊政務。事無違者，改司農少卿，依前充職。明年，王移任宣潤，二州大都督，復以公爲浙西營田副使，通判軍府。六載，匪懈庶職，交修懋官之賞，詔命疊委，累遷至金紫光祿大夫，檢校司徒，封河南縣男。俄拜泰州刺史，充本州屯田監院使，正身而令，悉心爲理，公無遺利。民自從風，屬強敵深侵，東京

失守而州兵盡出人心大搖于是士庶老幼盡室南渡公自歸闕下坐是除名數年除歙州團練判官上
曰戰爭之際吾豈以武勇責書生哉軍法不得不爾即召拜太子右諭德今上嗣位遷少府監丙寅歲正
月十六日卒於京師美仁坊官舍享年七十七上爲之廢朝一日賜諡曰定以其年某月日葬于某所禮
也前夫人謝氏早亡繼室施氏封沛縣君長子前宣州寧國縣主簿次子志饒州文學公以名教爲樂以
矩矱自任行必中立居無惰容縉紳之間推爲純行公之外祖得道之士故公頗以朝禮修養爲務鷄鳴
而起孜孜不倦年俯悼耄體常康強及屬纊之晨無伏枕之疾斯亦力行之報也鉉也不佞早辱交契昔
先君從事黜歛公適出本部及公策名郎署鉉亦忝官聯既熟其素履願垂于不朽附于史氏以永令猷
其銘曰

聖人四教文行忠信惟公似之光有令聞秉筆贊畫登朝典郡寵至若驚道喪無悶年俯中壽官參列卿
歸全委順終吉永貞宰樹長在高臺自傾用刊圓石闕此佳城

唐故客省使壽昌殿承宣金紫光祿大夫檢校太保使持節筠州諸軍事筠州刺史本州團練使

汝南縣開國男周君墓誌銘

君諱廷今上御名字正材洛陽人也岐山至德綿瓜颺者萬邦洛宅舊都守枌榆者百世簪組相繼譜牒存焉
曾祖侃太常博士祖潛深州樂壽縣令避亂南徙因家廣陵考延禧明經擢第有吳之霸受辟爲淮南巡
官至戶部郎中與殷文公游貞公同掌文翰無祿早世故大位不躋君即戶部第四子也幼而岐嶷長而
篤厚躬行孝悌餘力學文以蔭釋褐補弘文館校書試吏爲池州司戶參軍改宣州寧國縣尉烈祖在藩

乃睠舊族。開君修謹。復有吏能。因表爲黃州長史。寵以朱紱。置之府朝。及受禪。遷通事舍人。鴻業肇興。王澤遐布。贊導之任。實寄司聰。護戎修聘。觀風按獄。受命而出。動罔不臧。歷事兩朝。任遇彌厚。賞賜旣數。階勳屢遷。而通事之任如故。蓋惜其能也。保大七年。轉將作少監。判四方館事。浩穰之地。尹正爲難。復以本官判江寧府事。其閒監諸侯之典者十通。四方之命者三。攝州府之政者六。按枉撓之獄者四。或敷惠於新附之俗。或投身於危亂之地。本于忠而後動。忘其生而後存。元宗嘉之。以爲客省使。今上嗣位。深惟舊勞。特加金紫光祿大夫。台州刺史。常御壽昌殿視事。中外之人。咸得引見。又以君爲壽昌殿承宣。出爲忠義軍監軍。泉南等州宣諭使。還遷筠州刺史。本州團練。仍使充客省使。君以備嘗艱危。復逼遲暮。懇辭繁劇。恩旨不從。丙寅歲十月二十二日。終于京師某里之官舍。春秋六十有六。詔廢朝一日。賜諡曰某。明年正月。葬于某所。禮也。夫人天水縣君姜氏。輔佐之勤。率由婦禮。訓誨諸子。備有義方。子大理評事崇儉。太常寺奉禮郎崇素。及崇順。崇信等。皆儒謹。能不墜其先。鉉家世通舊。嘗接姻婭。淡成之分。終始不渝。何以眞懷。是用刊德。其銘曰。

猗嗟周君。世濟其名。展如之人。克嗣厥聲。受任幹蠱。臨難忘身。居中處約。全和保眞。與物皆化。萬古同塵。松楸勿伐。蘭菊惟新。刊石表墓。于嗟善人。

唐故朝議大夫行尙書禮部郎中柱國賜紫金魚袋太原王君墓誌銘

君諱某。字某。其先太原人也。昔者諸侯共職。起末運于毘王。儲后上賓。示靈期于警史。緱山維岳。肇翦賁之崇基。汾水遂荒。導沈渾之遠派。其後金行云季。貴種言還。行者制禮樂于上。中處者保邱園于淮左。世

濟之德。鄉人所宗。故今爲廬江人也。曾祖廬江令。祖洪州長史。皆有廉讓之風。純粹之行。得祿于仕。不累于高。考吳尚書左司郎中。贈太府卿。負適用之才。獲愛人之譽。應星辰而列位。道邁朝倫。視河海以命官。禮優贈典。君則府卿之第三子也。門風漸教。天質孕和。翼翼服勤。眞保家之主。悻悻若訥。多長者之言。墨妙筆精。固稟于性。奕思琴德。咸是所長。幼有令聞。獲鍾慈愛。及加冠之歲。以門子敍資。漢室孝廉。方從令史。晉時英俊。更屈下僚。晨昏之養。有歸州縣之勞。靡憚。乾貞二年。自黃州司馬。遷洪州都督府別駕。治中懋績。屏星煥其增華。公府見知。佩刀由其受賜。俄拜尚書度支員外。再遷虞部郎中。皆判吏部兵部事。夫當官匪懈。伏閣之勤也。照姦得情。坐曹之能也。前史所踴。君皆則焉。頃之以親累解官。君雅好玄言。夙尚閑適。由是角巾私第。閉關卻掃。交游罕得見其面。窮達不以介其懷。用晦而明。居貞以利。高皇帝受禪之始。牽復疏恩。拜工部郎中。轉禮部郎中。寓直中書省。預聞機密。彤庭弘敞。禁垣清切。絲綸之出。堯言于是推行。樞機之微。省樹由其勿洩。方將振鱗溟渤。驥首雲霓。而生也有涯。仁而不壽。昇元六年夏六月二十有二日。卒于建康翔鸞里之官舍。享年五十有一。嗚呼哀哉。惟君孝於事親。悌于承長。和以接上。廉以在公。胥史臣僕。靡不被仁恕之惠。家人妻子。未嘗見喜慍之容。學古觀書。如恐弗及。卹舊敬老。周知其疲。三德聿修。五福斯闕。卽世之日。遺愛存焉。卜遠不從。旅殯京邑。後四歲春二月五日。嗣子延紹。延貞等。始備大葬之禮。窆于江都縣某鄉里。從先卿府君大塋。與夫人李氏合祔焉。禮也。鉉以世親之舊。承子妻之知。怨明德之不常。痛祖行之斯在。退食自公。薄送于畿。刊樂石以爰紀。庶令名之不虧。嗚呼哀哉。其銘曰。汾川溶溶。淮源颯颯。興我宗兮。世濟其美。家餘其慶。生我公兮。靖恭正直。言行名迹。存南宮兮。與義相扶。

知命不憂。永考終兮。邗城之右。蜀岡之陽。馬鬣封兮。道不虛行。有令之子。遵遺風兮。

唐故奉化軍節度判官通判吉州軍州事朝議大夫檢校尚書主客郎中驍騎尉賜紫金魚袋趙

君墓誌銘

君諱宣輔。字仲申。其先天水人也。累世從官。不常厥居。曾祖全真。工部員外郎。滕州刺史。祖倚。太子校書。考台。歙州海寧令。君卽海寧府君第三子也。生於廣陵。長于江左。幼而俊敏。博綜羣書。尤善刑法之學。烈祖輔政。方申明紀律。君以是中選。釋褐補江都府文學。直刑部。明年改信州司法參軍。察獄詳刑。號爲詳練。久之。召赴闕。以本官權參元帥府法曹事。踰年。改大理評事。元宗嗣服之初。庶獄權要。舉不附己者。因中傷之。君坐黜爲饒州司士參軍。明年王師伐閩。護軍查公表君才可煩。使以本官判軍司事。時頓兵深入。自冬涉秋。經束馬懸車之塗。督飛芻輓粟之役。事集師克。君有力焉。師還。加朝散大夫。行常州義興令。推誠率下。民用協和。丁憂去職。復爲江州錄事參軍。時連帥議浚湓浦。以屯舟師。詔從之。君以無益戎備。而勞民力。乃指陳利害。抗疏極論。上甚嘉之。卽命止役。由是遷大理司直。通判蘄州軍州事。明年遷檢校水部員外郎。充建州觀察推官。通判軍府事。會越人闕邊。使聞誘建民。將以爲亂。君廉得其實。盡按誅之。優詔褒美。賜衣一襲。遷檢校屯田員外郎。三年。徵拜守水部員外郎。判度支。時師旅薦興。軍食不給。命君爲沿江催運使。輶傳所至。轉輸如流。朝議以姑熟居畿甸之間。實供億之始。徙君爲當塗令。踰月。復徵爲主客員外郎。判大理寺。賜紫金魚袋。始君以理官得罪。至是。上知其無私。故復任焉。守官循理。挺然中立。轉工部員外郎。仍判寺事。今上嗣位。上疏論時政。以爲刺史縣令。親民之先。而考績掄材。未盡其理。上深

然之。遷朝議大夫戶部員外充宣歙常潤等道安撫使。以刺舉無避。爲權臣所排。宸鑒昭明。故得無咎。使還以本官判兵部事。廬陵羣盜充斥。州兵不能制。上憂之。亟命君爲奉化軍節度判官。判吉州事。轉主客郎中。擒姦摘伏。克舉其職。其年秋九月七日。遇暴疾。翌日終于郡之官舍。享年六十有一。明年春二月。歸葬江寧府某所。禮也。夫人查氏。吉王府長史昌之女也。工部尙書文徽之妹。婉孌之德。閨房之秀。內助著美。士林所推。子七人。長曰鈞。袁州新喻尉。次曰錯。樞密院承旨。次曰鍾。舉進士。次曰銓。前國子監三禮。次曰鏗。鉞。鑲。皆國子監生。女一人。適祕書省正字周希定。君有孝悌之性。聞于宗族。敦然諾之信。稱于友朋。守己有常事。君不諂。位未達而知足。祿雖優而彌貧。其當官持事也。必盡己所長。不爲利回。不爲威惕。故屢失大臣意。然好直之士。亦以此多之。鉉久塵近職。熟君操行。直筆贊善。以告後人。故銘其墓曰。英英趙君。松茂蘭薰。應用以法。飾身以文。道直詞正。心平氣純。如何不淑。今也爲塵。金陵仙鄉。古多名人。歸骨于是。與善爲隣。泉臺不曉。壟樹空春。勒銘挂劍。慷慨沾巾。

徐騎省集卷第十六

唐故中書侍郎光政殿學士承旨昌黎韓公墓誌銘

唐故守尚書刑部侍郎喬公墓誌銘

唐故建州觀察處置等使陳公墓誌銘

唐故檢校司徒苗公墓誌銘

前虔州零都縣令包府君墓誌銘

唐故常州團練判官檢校尚書左僕射劉君墓誌銘

唐故印府君墓誌銘

唐故御史中丞包君墓誌銘

唐故中書侍郎光政殿學士承旨昌黎韓公墓誌銘

公諱熙載，字叔言，其先南陽人。傳稱武王之穆，詩美韓侯受命，晉以六卿升降，漢以三傑重輕。至東晉末，征西從事延之，以忠義之節，踐艱屯之運，避亂遠徙，遂家昌黎。餘慶流光，最爲繁衍。曾祖鈞，太僕卿，祖殷，侍御史，考光嗣，祕書少監，淄青觀察，支使，故又爲齊人。公秉夙成之智，負不羈之才，文高學深，角立傑出。年始弱冠，遊於洛陽，聲名藹然，一舉擢第，同光之亂，藩郡崩離，公以國難方興，家艱仍御，今上瞻烏擇木，杖策渡江，烈祖孝高皇帝，納麓在辰，側席時彥，得公甚喜，賓禮有加。于時有吳肇基，庶事草創，公以俊邁之氣，高視名流，旣絳灌之徒，弗容亦季，孟之間不處，以校書郎釋褐，出爲滌和常三州從事，公亦怡然不以屑意。詠風月，遊山水而已。中興受命，上嗣撫軍，以公有七子之才，膺四友之拜，徵爲祕書郎，掌東宮文翰。元宗深器之，及踐位，以爲虞部員外郎，史館修撰，賜緋，又以大禮繁疊，加太常博士，時有司議孝高廟宜

稱宗司門郎中蕭君儼上疏論之公與給事中江君文蔚協同其議凡書疏論難皆成于公手由是廟號尊諡定于一言君子以爲眞博士也頃之以本官權知制誥初公但以文章際會未嘗與政及其當維新之運感知己之恩未及聽政章疏相屬或駁正失禮或指摘時病由是大爲權要所嫉竟罷其職丞相宋公朝之元老勢逼地高公又廷奏黨與詞旨深切天子優容之而用事者滋怒旋貶和州司士參軍數年移宣州節度推官徵還復爲虞部員外郎遷郎中史館修撰賜紫俄拜中書舍人從時望也公雖才識優贍而質性疎散凡在位者道復不同於是深居移病罕與朝謁時兵興之後國用不充公援古酌今請以錢爲幣時獻封者甚衆元宗獨以公議爲長即拜戶部侍郎充鑄錢使今上踐位改吏部侍郎兼修國史初鑄錢之作也自宰執而下相與沮之故百司不供久未就上爲之曉譬事理親加督責而公猶不勝其忿嘗因對見聲色俱厲因徙爲祕書監不逾年復拜吏部侍郎新錢旣行大濟經費詔賜錢二百萬拜兵部尙書充勤政殿學士承旨公少而放曠不拘小節及年位俱高彌自縱逸擁妓女奏清商士無賢愚皆得接待職務旣簡稱疾不朝家人之節頗成寬易雖名重于世人亦訝其太過上不得已左遷太子右庶子分司南都于是謝遣伎樂單車首路留之未幾復爲兵部尙書學士如故是時歲比旱歉主上憂勤公復論刑政之源明防救之術又上格言五篇手詔嘉納即拜中書侍郎充光政殿學士承旨初上選近侍數臣直宿禁中常御光政殿召對夜分乃罷故命公此職以寵異之霖雨之望方深鐘漏之期遽逼春秋六十有九庚午歲秋七月二十七日沒於京鳳臺里之官舍上省奏震悼爲之涕流有司奏當輟朝三日手批天不憇遺碎我瑚璉辭章乍覽痛切孤心嗟乎抗直之言而今而後迨不得其過半聞聽者乎可別

輟朝一日。贈右僕射平章事。仍官給葬事。士庶聞之。知與不知。莫不爲之悲歎。有司考行。易名曰文靖。卽以其年九月某日。葬于某所。禮也。夫人隴西郡君李氏。生簪纓之族。有桃李之芳。內則有光。夜川先逝。繼室北海縣君蔣氏。長子疇。爲奉禮郎。早卒。次子伉。爲校書郎。聰慧夙成。無忝世德。次曰佩。曰份。曰儼。曰佺。曰儔。曰俛。女四人。或作公族。或爲尼出家。嗚呼哀哉。公之爲人也。美秀而文。中立不倚。率性而動。不虞悔吝。聞善若驚。不屑毀譽。提獎後進。爲之聲名。片言可稱。躬自諷誦。再典歲舉。取實去華。故其門人多至清列。屢從譴逐。殆乎委頓。俯視權倖。終不降心。見理尤速。言事無避。凡章疏焚藁之外。尙盈編軸焉。審音妙舞。能書善畫。風流儒雅。遠近式瞻。向使檢以法度。加以慎重。則古之賢相。無以過也。俸祿旣厚。賞賜常優。忘懷取適。不事生計。身歿之日。四壁蕭然。衣衾榘櫛。皆從恩賜。詔集賢院編其遺文。藏之祕閣。凡所開卷。可知也。鉉與公鄉里。遼復年輩。相懸一言。道合傾蓋。如舊。綢繆臺閣。契闊江湖。區區之心。困而獲雪。一生一死。何痛如之。援毫反袂。識彼陵谷。其銘曰。

猗嗟韓公。有蔚其文。俊才絕俗。逸氣凌雲。高名直道。玉振蘭薰。猗嗟韓公。天賦忠規。君臣之際。言行俱危。其身可辱。其節寧虧。猗嗟韓公。屈亦能伸。松寒益茂。玉焚始真。乃感明王。乃爲大臣。送往事居。不緇不磷。嗚呼韓公。胡爲而然。闕此相印。歸于夜泉。茂陵遺簡。京兆新阡。斯文不朽。此別終天。哀哉郢匠。已矣牙絃。勒銘圓石。永識桑田。

唐故朝請大夫守尚書刑部侍郎柱國賜紫金魚袋喬公墓誌銘并序

士有放懷夷曠。介然中立。外物無累於心。沒齒不違于道。吾友喬公。嘗從事於斯矣。公諱匡舜。字亞元。廣

陵高郵人也。曾祖譚祖泰，皆不仕。考鴻漸，本縣尉，家世清操，州閭稱之。故其子孫必有興者。公少好學，善屬文，弱冠游京都，詞藻典麗，容止都雅。烈祖輔政，見而器之，補祕書省正字。丞相宋楚公初獲進用，位望日崇，聞公之名，辟置門下，每爲文賦詩詠，輒加稱賞。由是名譽日洽，而卿士大夫皆前席待之。累遷大理評事、司直、監察御史、屯田員外郎。從宋公出藩，爲江西浙西掌書記。府公告老，歸九華山，公乃升朝爲駕部員外郎，未幾守本官。知制誥就遷祠部郎中、中書舍人，典掌樞機。周慎靜默，凡十餘年。值邊境倏擾，師出無功，詔旨親征，中外憂懼。公上疏極諫，坐阻撓軍勢，黜居臨川。頃之，宋公獲譴，又以故吏爲累，由是累年沉廢。今上卽位，徵爲水部員外郎，改司農少卿，判太常寺，轉殿中監，修國史，拜給事中，權知貢舉。又兼獻納使，遷刑部侍郎。公自徵還，數年間，聯歷清望，蓋舊齒直道，上簡聖心。至是以老病不堪朝謁，聞上知其家貧，詔以貳卿之秩養疾。壬申歲九月二十有三日，卒於京師濱江里官舍，享年七十有五。遺命以周易孝經寘棺中，太常考行，易名曰貞，卽以其年冬十月二十有三日，葬于江寧縣某所。禮也。夫人太原縣君郭氏，代公玄孫晉陵令喻之女也。餘慶所備，門風甚高。婦德母儀，聞于宗族。一子僧儒，祕書省正字。早卒。孫諤，亦爲正字。公之爲人，寬簡真率，常以詩酒自適，不以勢利縈心，毀譽讒慝之詞，聞之晏如也。從事楚公府殆二十年，凡爲府公見知者，皆詭譎傾側，公獨淡然無營，守正不諂。故但以文藝知賞，未嘗任用。烈祖下詔公卿舉可以親民者，楚公所薦非其人。烈祖甚不悅，謂給事中常公夢錫曰：「吾望其薦匡舜也。」常公及中書侍郎韓公熙載嫉楚公如讎，而與公善，嘗相謂曰：「宋公誤識亞元，正可怪也。」公之歷任奉法循理，似不能言者，及其臨危擊節，抗詞忤旨，侃侃然有古人之風。黜官奪祿，甘貧守約，凡五年，不形于言。

色恂恂然道家之流也。故能享老壽保康寧。歸全委順。斯可貴矣。公臨終數日。舍弟往候之。怡然言曰。吾往矣。君兄弟可各爲一詩哭我。翌日復告門生曰。吾已得徐君兄弟許我詩。餘無事矣。其忘懷死生也如此。嗚呼。絮酒之禮。已隔平生。挂劍之信。永畀穹壤。故以二章爲誌。闕於九原。所撰集七十餘卷。編紀之任。屬于門人。此不備書也。其詩云。

舉世重文雅。夫君更質真。曾嗟混雞鶴。終自異淄磷。詞賦離騷客。封章諫諍臣。襟懷道家侶。標格古時人。逸老誠云福。遺形未免貧。求文空得草。埋玉遂爲塵。靜想忘年契。冥思接武晨。連宵洽杯酒。分日掌絲綸。蠹簡書陳事。遺孤託世親。前賢同此嘆。非我獨沾巾。

錯詩云

諸公長者鄭當時。事事無心性坦夷。但是登臨皆有作。未嘗相見不伸眉。生前適意無過酒。身後遺言只要詩。三日笑談成理命。一篇投弔尙應知。

唐故左右靜江軍都軍使忠義軍節度建州觀察處置等使留後光祿大夫檢校太尉右威衛大將軍臨穎縣開國子食邑五百戶陳公墓誌銘

公諱德成。字仲德。其先穎川人也。帝嬀餘烈。侯滿崇封。盛德之祀。綿邈于百世。光遠之慶。蕃衍于萬國。故我洪胄。代雄建安。王室中微。閩方角立。網羅英異。弘濟艱難。我曾祖茂新。祖滔。皆以雄才勇略。奮揚忠力。將領之任。生表其策勳。督護之名。沒垂于飾壤。父誨。檢校太尉。兼侍中建州刺史。忠義軍節度使。諡忠烈。殊勳大節。有信史豐碑存焉。公卽忠烈公之長子也。鍾粹和之氣。秉沖淡之心。通習孫吳。固其家法。酷好

墳典乃自天資。就傅之年。已著名譽。先公剖符劍浦。威信洽聞。諍子之助。實有其力。弱冠爲本郡裨將。先公以身守邊郡。心存本朝。累表遣公入宿衛。卽擢拜右千牛衛將軍。充殿直指揮使。恭命畏法。修身擇交。先公每言邊事。常密疏于紙。遣公上啓。默識強記。敷奏閑習。元宗甚嘉之。累遷右靜江指揮使。值淮上兵起。王師不振。公屢上書自奮。詔隸西北面行營。以舟師趣濟難。破其屯戍。遂入海陵。與諸軍會。勵兵固守。強敵日益。公連戰破之。虜獲千計。圍兵旣遁。乃涉長淮。指下蔡。別率戰艦。分擊浮橋。三中流矢。神色自若。自秋徂冬。且戰且前。凡五進軍壘。皆以衆寡不敵之勢。當輕悍卒至之師。臨難忘身。每戰必捷。而元戎逗撓。逆臣攜叛。羣帥失道。公全軍而還。遷右宣威軍廂虞候。制曰。獨此一軍之衆。堪爲百戰之師。其見稱如此。數月爲和州刺史。又爲左天威將軍廂虞候。明年改池州刺史。是時疆場甫定。閔井未完。公奉法循理。正身率下。庭無滯訟。吏不生姦。鐵軸牙橋。無忘水犀之備。輕裘緩帶。常爲峴首之游。賦詩紀頌。粲然可述。元宗南狩。從至石牌。上每登臨置酒。必命公陪侍。訪山川之形勢。問風俗之美惡。應對詳敏。咸有條貫。捧觴上壽。進退由儀。求解印扈蹕。優旨不許。今上嗣服。屢表乞還。徵爲右天德軍都虞候。舊制常以舟師爲下軍。至是詔旨。以南國之用。尙于舟楫。今而後知非是。乃簡練精銳。置龍翔軍。以隸親衛。命公爲龍翔都虞候。舟師之重。自茲始也。會先君來朝。臥疾邸第。公親侍醫藥。躬執煩辱。容貌瘠損。衣不解帶。客至問疾者。不知其已貴也。及丁憂制。哀毀過禮。扶護靈柩。歸于建安。詔起爲歙州刺史。本州團練使。視事三載。其理如初。秩滿復爲右龍翔諸軍都虞候。遷都指揮使。每仲秋講武。訓兵。仲冬而畢。進退號令。由公指顧。威容嚴整。觀者肅然。頃之。又爲虔州巡檢使。知州事。五嶺之際。地廣民悍。內據豁洞。外接蠻夷。告訐斂斂。習

以爲俗。于是申以刑政。示以嚴明。廣視聽。審情僞。吏以微文出入者。皆面詰其狀。莫不惕息退弊。爲之革。人以之和。於是浚溝隍。嚴壁壘。出私帑以助費。因農隙而傭功。凡書勞考績。此其昭昭者也。尋拜池州觀察使。以其秩居虔州上。以建安之地。人思舊德。且欲以畫錦之盛。顯公之能。乃除忠義軍節度使。建州觀察處置等使。留後。公以違奉歲久。無以私爲。抗表來朝。固辭不拜。改右威衛大將軍。充左右靜江都軍使。又轉光祿大夫。檢校太尉。奉以建州之祿。歲計千萬。甲第廐馬。賜與優渥。俄而被疾。自識終期。申告理命。備有規度。中使問疾。但曰。世受主恩。未有以報。唯此爲恨耳。又親問門吏。草遺奏。旣成。自益兩句曰。苟游岱之有知。必結草以爲報。上省表震悼。手詔答之。公猶捧詔向闕。稽首流涕。壬申歲秋七月十有二日。卒於建業濱江里之官舍。春秋四十。上痛惜之。至再不視朝。贈安南大都護。遣中使監護。葬事皆從官給。有司考行。易名曰烈。卽以其年九月日。葬于某所。從理命也。夫人信都郡君刁氏。故昭武軍節度使能之女。容德之美。閨房之秀。宜家睦族。光此門風。子倩。孝友聰慧。修詞好學。以蔭起家。授著作佐郎。必大之慶。其在于是。嗚呼哀哉。公生於戎馬之際。長承鐘鼎之業。修文習武。全孝資忠。風格端莊。襟懷夷直。嫉惡獎善。如恐不及。穆親念舊。無有所遺。先人之費。公私畢給。出入數載。家爲之貧。在公之餘。手不釋卷。篇詠詞筆。皆傳於時。近代儒學。將唯公而已。凡四典藩郡。皆有借留去思之美。民到于今稱之。由是恩顧特隆。委遇無間。修塗方騁。大年不登。知與不知。皆爲悲歎。鉉與公非故。特以道義相期。雖復出處不齊。班序致隔。金蘭之分。終始不渝。寢門流慟。痛生死之永已。圓石表墓。患陵谷之靡常。亦公之遺言。以此見託。豈非慷慨之氣。思振發于知己哉。故爲銘曰。

龍泉之靈。武夷之英。生我儒將。垂茲令名。臨戎有勇。察俗有聲。爲臣之節。與世作程。位逼建牙。秩參掌武。才實膺時。忠惟得主。鬱此雄圖。溢然中露。謂天蓋高。不可以愬。悲哉俊氣。永已荒丘。鳳臺遺館。梅嶺窮秋。樹惟挂劍。地卽眠牛。餘芳不泯。淮水長流。

唐故檢校司徒行右千牛衛將軍苗公墓誌銘

公諱延祿。字世功。其先上黨人。昔者楚多淫刑。賁始逃難。晉賴謀主。苗受其封。高門之慶。雄視欒郤。綿綿瓜瓞。翼翼孫謀。存諸簡編。可以揚摧。延洪於我七代。祖中書舍人延嗣。光大於我六代。祖太師晉卿。源流繁衍。蔚爲甲族。中朝喪亂。後裔播遷。匿迹淮楚之間。今爲盱眙人也。先公諱隣。生於兵戈之間。長習旗鼓之用。遭遇英主。建功立事。出爲泗州防禦使。入爲靜江軍統軍。世卿之祀。衰而復振。公卽靜江之長子也。弱不好弄。壯而有立。負雄勇之量。不以驕人。秉剛直之資。未嘗忤物。持重善戰。默識寡言。時輩推之。以爲君子。初先公奉王略。領偏師。南破山越。西定江楚。東絕滄海。北捍徐戎。弓不解卷。兵不匣。公年甫弱冠。實參其間。擧旗斬將。所向披靡。宣力用於君父。舒壯氣於風雲。然而職以序遷。蓋歸美於先公也。烈祖孝高皇帝。中興大業。疇咨舊人。命公領泗上精兵。入爲宣威軍裨將。六卿之選。以翼京師。八屯之權。實資宿衛。歷紀授任。一心靡渝。今上祇嗣鴻圖。益宣朝寄。總千牛之士。以爲心膂。假五教之秩。以崇班列。會侍中燕王。以帝子之重。兼鎮兩藩。詳求命卿。以事大國。俾公提步卒屯宣城。凡甲兵壁壘之事。皆聽於公。夙夜惟勤。燥濕生疾。春秋六十一。保大九年十月七日。卒于宣州公署。上省奏傷悼。爲之罷朝。送終之禮。有以

之氣有征討之功。勇冠三軍，力制奔虎。夫人麗桃李之質，襲蘭蕙之芳。婦禮聿修，遺訓無墜。君子以孝慈率教，夫人以嚴正克家。閨門之理，實有內助。以保大八年五月一日，先公而逝。今始祔焉。子全厚，全瞻，全節，全義，全海，皆有父風。苗氏爲不朽也。鉉本自世親，早爲姻族。歎侯封於李廣，發哀詞于杜篤。刻翠琰于荒阡，擬高陵于深谷。其銘曰：

才之俊兮，將之雄。位之侯兮，壽未中。天難諶兮，人云亡。川旣逝兮，歲將窮。素車兮丹旄，白草兮青松。悲雄心與壯氣，漸荆棘兮蒙龍。

前虔州零都縣令包府君墓誌銘

鉉序
銘

昔者鄭都涕產，知懷仁之有誠。孔門慟淵，見福善之無驗。遺恨千古，可勝言乎。君諱詠，字義修，其先延陵人。漢大鴻臚咸之後也。曾祖章，祖岌，皆眷戀本土。卒于縣寮，考泊，遇故侍中寶之亂，乃去仕唐。吉州長史入吳，終和州。歷陽令，政有遺愛，故家焉。今爲歷陽人也。君幼而岐嶷，長而學問，孝敬自律，名利弗嬰。安貧怡然，綽有餘裕。順義末，丁先府君憂，泣血絕漿，杖而後起。朝廷獎勸善政，砥礪清風，卽起君爲歷陽主簿。秩未滿，移知含山縣令。先是兵興之後，循吏用稀。君簡法紆刑，約廉敦信，縣無逋事。吏不能欺，蒞官七考，清嘯而已。選授知虔州零都令，西楚之地，南際殊隣。本之以蠻蜒之風，因之以斂斂之衆。長鯨之戮，雖久，碩鼠之刺，猶繁。君下車考政，經察人病，矯異俗，均地征，常爲諸邑之最。吏民上書，借替期求真命者，無虛歲矣。而懋賞弗臻，成功輒去。解印之日，單車卽塗。君素多疾，至是增劇。以己亥歲秋九月十九日，終於歷陽。馴翟里之私第，享年四十有一。以其年冬十一月六日，葬於本縣本鄉許思里。祔先君長史之塋，禮也。

君前娶潁川陳氏。後娶樂安花氏。皆良家之子。淑德不爽。二子曰德容、德鈞。二女皆佩觿、角之歲。君天資貞潔，立性和雅，尊敬師友，敦睦親姻。移之於官，故所至皆理。而位不參于朝籍，年不登於下壽，能無遺恨乎？鉉兄弟少孤，長于舅氏，親承撫卹，勉以進修。門御今上不傾，君之力也。嗚呼！渭陽之贈已矣，寧追逝川之嘆，哀哉！何極。故拂貞珉，紀述遺德。庶深谷以徙遷，見清芬之未泯。其詞曰：

懿哉華族，鴻臚有聞。家餘厥慶，世濟其文。祉祚鍾積，實生我君。惟君之生，姿性天成。清談變馬，寶思凌雲。道光表式，才中銓衡。爰職縣符，政閑務舉。旋綏二邑，鳧飛鸞舞。天亦難謐，俄悲物故。驚波易遶，陽露難收。荒郊落日，宿莽窮秋。銘茲幽壤，永樹芳猷。

唐故常州團練判官檢校尚書左僕射劉君墓誌銘

夫資忠全孝，含貞履潔。君子所以沒身而守之，聖人所以屈己而申之。其道可傳，其風可仰。嗚呼！劉君其殆庶乎？君諱郃，字巨源，其先彭城人。徙居廣陵，重世矣。曾祖永，澧州司戶參軍，祖審不仕。考瓌，檢校戶部尚書，贈右僕射。君生而岐嶷，有異常童。五歲而孤，卽稟至性。年在幼學，卓然老成。初先君事吳，實幹近職，而太夫人王氏與貞穆皇后復有姻舊。故宣帝命君使事丹陽公府，公龍飛以君爲殿前承旨，便蕃左右。靖恭夙夜，動必稱職。人無閒言。二十年間，累遷檢校禮部尚書，充崇賢殿使，及軍府代謝衆，或將迎君，侃然正色，有死無二。游說之詞不能入，權利之勢不能動。于是闔豎希旨以飛語中之，坐除名。流池陽郡。明年有唐受禪，烈祖嘉君盡忠，亟召之還。除常州長史，悉還其官階田宅。未幾又改和州長史，聽歸廣陵舊居。初元宗方在膠庠，吳帝使君召拜郎中，賜以章綬。自爾至於爲相，每朝謁必先見君而後入。及元宗卽

位召至京師。復命太夫人入禁中。如貞穆之時。謂曰。吾受吳朝恩禮。不敢忘也。今猶數夢讓皇帝。執臣子之禮。吾觀當時近臣。唯夫人兒爲長者。帝意親之。今復得在吾左右。良足慰也。君聞之。遂稱足疾。不任趨拜。上仍賜第以居之。歲時錫賚甚厚。時使親近諭旨。竟不能移。上乃加太夫人封邑。召君受命于朝。固辭以疾。上嘆息曰。此子至孝。今以其母故。召之不來。是必然也。此亦古人所難。吾何爲奪其節耶。久之。以君爲常州團練判官。不使之任。優其祿而已。今上嗣位。加檢校右僕射。君家承鐘鼎之富。少居綺紈之職。時逢革故。年俯壯室。而遂閉門卻掃。高謝人間。孜孜色養。怡怡自得。姻族以之肅穆。士友以之景仰。名節終始。清風邈然。丙寅歲夏六月某日。終於建安某坊之私第。春秋五十有九。初君葬太夫人於茅山良常洞之西。因自卜塋地。卽以其年月日葬焉。禮也。前夫人張氏早亡。今夫人吳氏。實有萊妻之賢。能從伯鸞之操。天資玉映。令聞薰蘭。子昭嗣女某等。善慶所鍾。家聲不隕。愛敬哀感。在禮無違。嗚呼。令人其必有後。鉉家世通舊。復連懿親。常以君抗節遺世。旣近代之孤標。而元宗推誠。簞善又列辟之難事。足以激揚薄俗。垂示將來。乃爲銘曰。

忠於事君。孝於養親。逢時有道。以義衛身。隱不絕俗。居能保真。我永終吉。誰爲古人。地肺之原。三茅之巖。左盼松岡。前瞻柳谷。欒棘新吹。松楸再卜。令聞昭顯。流光似續。刻此茗華。永芳蘭菊。

唐故印府君墓誌銘

君諱某。字某。其先京兆人也。因官徙牒。遂居建康。曾祖知章。無祿早世。祖某官。君幼而勤學。長而力行。孝悌著於家庭。信義行于州里。弱冠明經擢第。釋褐太子校書。千里之行。時輩推許。會上國喪亂。遂

南奔豫章。連帥鍾公見而悅之。辟爲從事。豫章府變。始歸建康。井邑更移。親舊泯沒。君慨然悲世難之未已。感宦路之多艱。于是抗志衡門。息機世表。樂山水。寡言語。極談不過經籍之事。足迹不游卿相之門。篤好六經。歲誦再徧。雖憂慘疾病。未嘗廢也。孜孜焉。修善如不及。恂恂焉。與人無間言。保大丙寅夏四月日。考終命。臨終訓勵諸子。備有嚴誡。如魏顓之命。無莊鳥之吟。春秋六十有九。夫人徐氏。通儒書。有婦德。先君而逝。卽以其年月日。合葬於某所。禮也。子崇禮。崇粲。舉進士。崇簡。明經及第。爲舒州司法參軍。秀茂之業。聞於場中。咸以爲印氏之門。其後必大。諸子以我宗之自出。故銘譏是求。銘曰。於惟穆氏。代有君子。恂恂若人。亦旣克似。退不巨壑。進不朝市。體道居貞。全高沒齒。俊造之學。施於後嗣。昭昭令名。與石無已。

唐故銀青光祿大夫檢校國子祭酒御史中丞包君墓誌銘

君諱諤。字直臣。丹陽延陵人也。粵我長源。發於夏后。分封受代。著於會稽。司農而後。代有賢哲。轉徙旁郡。遂家延陵。種德流光。世爲大姓。曾祖章。丹陽令。祖岷。潤州錄事參軍。考洎。和州歷陽令。業官之美。播于岷。頌公以廣明庚子歲。生於丹陽。長於戎馬之間。遂好金鼓之政。氣質慷慨。而孝于事親。材用敏幹。而慎于畏法。命不我與。事多無成。高皇帝兼總六師。以輔王室。署君牙門右職。將進用之。君以歷陽府君喜懼之年。辭歸就養。因隸歷陽軍中。自是服勤祇役。多在外郡。家貧。援寡。仕不求聞。三十餘年。有勞無過。養心知命。以保遐齡。交泰元年春二月日。卒於鄱陽舟中。春秋七十有九。夫人危氏。故賀州刺史諱德卿之女也。婦道以順。家政以嚴。內慎有光。六姻是則。子三人。曰會宗。曰穎。曰銳。皆敬述先志。勤修令名。號奉靈輜。俯

就成制。卽以其年月日。葬于江寧縣某里。禮也。某感深自出。名謝貴甥。載悲渭陽之詩。永痛西州之墅。敬書遺懿。以鏤貞珉。其銘曰。
猗歟府君。世載其聞。有道無命。與俗同羣。代耕得祿。全和保真。高壽八十。下從先人。乃整歸艗。秦淮之濱。乃卜玄宅。句金之陵。不可不識。封丘勒銘。悠悠餘慶。永永芳塵。

徐騎省集卷第十七

岐王墓誌銘

故平昌君孟氏墓誌銘

故昭容吉氏墓誌銘

唐故鍾氏太夫人太原縣太君王氏墓誌銘

唐故太原府君夫人彭城劉氏墓誌銘

唐故隴西李氏夫人墓誌銘

唐故文水縣君王氏夫人墓誌銘

岐王墓誌銘

天地之靈氣發爲賢人。邦家之積慶鍾于公族。其或富老成之智。促殤子之年。感羣情者。自出於天資。垂英聲者。非由於事業。是以蒼舒軫悼于魏祖。表行曰哀。夏王鍾愛于明皇。錫名爲一中。興在運代。有人傑見于岐王矣。王諱仲宣。今上之第二子也。文武儲慶。日月輸祥。實太姒之子。如魯桓之貴。天質秀發。神機內融。亦旣免懷。未遑就傅。問安長樂。視膳寢門。承歡愛於瑤齋。極友悌于朱邸。成人之量。宛由生知。三歲受封爲宣城郡公。假大司馬之秩。維城之望。日以光矣。不幸_{今上御名}疾。甲子歲冬十月二日。薨於閣內。年四歲。主上痛幼敏之異。極天慈之懷。詔輟朝七日。册贈司徒。追封岐王。旣而感上聖之忘情。遵先王之從儉。節哀簡禮。以厚古風。卽以其月十有八日。備鹵簿鼓吹。葬于江寧府某縣某里之原。有司謚曰懷獻。禮也。惟王以襁褓之年。蘊金玉之度。異迹昭灼。可得而言。至如禁中娛侍。常在左右。或異宮一日。則思戀通宵。翌旦未明。必親至御幄。須奉顏色。然後卽安。其孝也如此。上每罷朝稍晏。莊色未迴。王則儼然侍立。不妄

言笑。須天顏悅懌。則趨就膝下。怡怡稚戲。不失其儀。中宮以上之鍾愛。恐漸于驕。故撫字之方。威克于愛。每加教訓。過於嚴厲。而王凜然祇畏。初不壞容。退或見上。乃啼而自悔。其敬也如此。始二歲。上親授以孝經。雜言。雖未盡識其字。而每至發端。止句之處。皆默記不忘。至于寢疾。近數千言矣。時聽奏樂。必振袂擊節。咸中律度。工人試中變其曲。王輒止之。曰。非前曲也。雖周郎之顧。何以加焉。其慧也如此。受封之日。見于內殿。音詞宣朗。容止閑習。觀之者咸歎重焉。其敏也如此。凡玩好之物。意有欲者。瞬目賞譽。未嘗求索。識其意。持以與之。必再三推卻。不肯即取。受其教也如此。上曰。昔人謂王勤爲神仙童子。今此兒近是乎。及其薨也。悼念之甚。曰。吾見佗人賢子弟。猶惜之。豈惟父子之性乎。中宮哀慟。至於加疾。自非英姿感動。孰能臻此哉。議者以爲列宿淪精。高真降迹。表瑞王室。今復還矣。嗚呼。凡我臣庶。暨乎藩戚。瞻飛蓋之何期。慨神理之難測。寧盡美于稱讚。庶騰芳於簡冊。詞臣奉詔。謹勒貞石。其銘曰。

粵我仙源。流光慶延。公族之異。惟王生焉。禮詩仁孝。斯之謂賢。夙習非學。生知自天。旣與之智。胡奪之年。瞻庭蘭刈。顧掌珠捐。孟冬寒氣。京兆新阡。鼓吹蕭蕭。旌旄翩翩。踈逸躅於稚齒。閤藩房于夜泉。已焉哉。庶彭殤之一夢。豈沒世之無傳。

嗚呼。庭蘭伊何。方春而零。掌珠伊何。在玩而傾。珠沉媚澤。蘭隕芳馨。人猶沮恨。我若爲情。蕭蕭極野。寂寂重扃。與子長訣。揮涕吞聲。噫嘻哀哉。

又銘一首

至尊所作。上省庭蘭掌珠之句。謂得比興之實。遂廣其意。發爲斯文。親迂宸翰。批於紙尾。足以厚君親之

義行孝慈之風是用勒石永光泉戶謹記

故平昌郡君孟氏墓誌銘

太歲癸卯五月十有九日大行皇帝諸妃平昌郡君歿於大內之別院享年四十有三嗚呼哀哉昔天保未定大東啓其疆魯道有蕩三桓紀其政實始孟氏代爲強宗德厚流光之符祥發慶膺之效宜乎來裔生此淑人曾祖某祖造父及皆以含道居貞遯世無悶克家垂訓式永門風郡君麗窈窕之容秉肅雍之德游依漢水氣兆河閒乃膺八月之求入預良家之選璧門受職彤管服勤恭順之心奉坤儀而得禮明惠之智導宮教而無遺爰屬造邦遂崇封邑路寢之後柔芳載揚旣而千載上仙宮車晏駕號遺弓於萬國感餘香于九御沈哀共極美疹獨縈不延幽窆之期重惻上宮之念嗚呼哀哉卽以其年六月日葬于江寧縣安德鄉德信里之原禮也青烏旣吉覆斧斯營永光烈女之風盡紀他山之石詞臣奉詔謹勒銘曰

杳杳平野蕭蕭一丘原松積靄隴吹臨秋吁嗟淑女於此藏舟委貞質兮長夜奉靈駕兮仙游惟悼史兮未泯豈餘芳兮不休嗚呼哀哉

故昭容吉氏墓誌銘

天子建內官必先令德九嬪掌婦學以教六宮是故壺則成風漢濱流化者矣昭容吉氏麗瑤姬之質富班女之文治絲枲以服勤宮功有序徹粢盛而舉職祀禮無愆用能妙簡皇心光膺盛典頃錫粉田之賦因開左輔之封嗣服之初日不暇給視月卿而命秩近正朝恩閱逝水以成川俄悲異物春秋三十有三

保大三年秋七月二日。薨于別宮。皇帝悼之。廢朝一日。遣奠之禮。有加等焉。卽以其年月日。葬于上元縣龍城鄉之原。禮也。昭容諱某字東海。朐山人也。曾祖徵。朗州龍陽縣令。祖黨。壽陽縣令。父彥輝。海州懷仁縣令。咸膺鄉里之選。屈從州縣之勞。有利物之能。不享其位。垂積善之慶。克茂其宗。著籍金門。移家戚里。昭映悼史。不其美歟。詞臣奉旨。式揚懿德。庶使高深自改。長延丹砌之恩。金石無虧。仰慰璧臺之念。其詞曰。

吉甫作頌。穆如清風。儲慶炳靈。實生昭容。史曰明智。詩云肅雍。內職以理。柔芳有融。閱川宵奔。燃膏曉滅。西陸移景。涼風殺節。虞殯流聲。遣車成列。茗華不磨。蘭菊無絕。

唐故鍾氏太夫人太原縣太君王氏墓誌銘

夫人太原祁人也。因官徙籍。遂居豫章。自緱嶺肇基。晉陽錫壤。光靈繁祉。蔚爲大宗。圭組簪纓。與世升降。聖歷中否。我亦不彰。故祖考某。皆蘊道居貞。流謙毓德。夫人有金玉之質。桃李之姿。柔順睦姻。以奉慈訓。組紉織紵。聿勵家風。宗族里閭。莫不稱美。先司徒纘戎嗣服。實臨我邦。夫人誕昭四德之華。用光九女之選。門內之理。實皆聽之。家人尙嚴。婦道貴順。主饋以敬。均養以慈。契闊夷險。始終若一。邦君內則。皆取正焉。嗚呼。昊天不庸。路寢卽順。夫人棘心蓬首。率由舊章。素尙空玄。益所明習。常齋居晏。處諷誦真文。雖祁寒盛暑。未嘗廢也。又以恭儉孝悌。文學道義。訓勵子弟。皆成其名。保大□年。詔封太原縣太君。從子貴也。二子長曰懷建。由校書郎。歷東府掾。以羣從百口。家于豫章。於是辭祿公朝。歸綜司政。因除洪州都督府司馬。次曰蒨。以屬詞敦行。從事感藩。累登臺郎。爲集賢殿學士。會中令齊王。避親讓寵。授鉞臨川。朝廷

慎選英僚。以光幕府。除撫州觀察判官。檢校屯田郎中。既拜而夫人疾亟。交泰元年。春二月十八日。卒於京師嘉瑞坊之官舍。享年七十有五。卽以其年月日歸葬于洪州某縣某里之原。禮也。嗚呼。富壽哉。毅天所以祐善。金石銘譔。世所以垂範也。二者無愧。可謂賢哉。鉉早奉世親。晚連姻好。景行懿德。敢用直書。其銘曰。

緱山不傾。清淮不湮。故我王氏。實生令人。衛姬之智。孟母之仁。光昭祖禰。垂慶來雲。西山之陽。章江之濱。靈仙攸宅。松檟相因。遐壽歸全。以反吾真。

唐故太原府君夫人彭城劉氏墓誌銘

夫人麗窈窕之容。蘊幽閒之德。孝敬肇于天性。明惠本於生知。光乎六姻。是謂賢女。初我大父殷。考遇。皆立功興運。蔚爲將臣。婚姻之盛。冠彼當代。故夫人旣笄。歸于我府君。君諱承進。壽州節度使國公之第三子也。二族斯睦。百兩是將。婦禮之嚴。家道爰正。府君性疎直。喜賓客。理劇如簡。不以世務嬰心。行已取適。不以家財爲重。鐘鼎之族。化爲簞瓢。夫人雅性冥然自足。慈和待物。恭儉飾躬。子孫以之。而克家。僕御以之。而服教。及罹蓬首之痛。誓全柏舟之節。柔芬方遠。景命不融。春秋四十有九。戊午夏六月某日。終於京師濱江坊里第。子某等。俯就成制。號奉靈輶。卽以其年月日。葬于某鄉。祔府君之塋。禮也。鉉幸參諸塔。獲從外姻。載陳執紼之儀。仍奉懷鉉之託。敢書懿範。以鏤貞珉。其詞曰。

嗟淑女兮。仁慈肅雍。伊君子兮。亮簡疎通。合二姓兮。五侯之宗。垂內則兮。素士之風。悲秋霜與冬霰。摧女蘿與青松。念光塵之倏忽。獨天長兮無窮。

唐故隴西李氏夫人墓誌銘

夫人諱某字某其先太原人故左司郎中贈太府卿諱潛之孫今太弟洗馬裔之第三女也伯仲世父皆踐歷臺閣抑揚聲實相糾以孝相高以讓芝蘭桃李閨庭燦然夫人襲圭組之英發爲秀色鍾姻睦之氣凝爲淑性柔而有則愛而不驕紉組之工翰墨之妙稟自天性能必過人及長歸於李君君名俛故楚州刺史諱承嗣之孫今禮部尙書度之少子也舅甥之故齊魯之匹好合之美潘楊之風夫人移天睦族率由典禮不恃舊以廢職不矜能而怠敬門內之理清芬穆然嗚呼嚴霜春零薜華朝墜享年二十有五某年月日卒於京師某里之寓居二族悲慟六姻悽愴仁而不壽古則有之以其年某月日葬于江寧縣某鄉里之原禮也東海徐鉉以世親之舊實維私之敬執紼永悼刊石爲銘銘曰

天之命兮不可知生此賢女兮鍾淑姿嬪于盛族兮昭令儀與之才兮不與之壽永凋落兮芳時儼黼嬰道靈輜小江村兮長江湄千秋萬代兮草離離空餘初月如蛾眉

唐故文水縣君王氏夫人墓誌銘

夫人諱畹字國香其先太原人今爲廬江人也祖潛左司郎中贈太府卿考坦禮部郎中皆以貞幹純懿見稱于時夫人麗窈窕之容秉明慧之性幼失所恃事繼親以孝聞在家不違于姆師移天不失于婦順初先姑之治也嚴而有惠通而得禮夫人觀形稟教莫不率循故三十餘年門風家法凜然如舊性尙靜退不樂世喧始愚之在要職也夫人憂形于色及其居貶所反欣然忘貧此其所以爲異也雖門族素盛而世塗多故祿賜所入賙給無遺豐約同之親疎如一至於澣濯之儉組紉之勤蘩藻盡敬儒玄勵操環

珮中節。始終不渝。少善秦聲。長亦捨棄。每晨輿誦五千言而已。享年五十。戊辰歲八月一日。終于京師。舜澤里之官舍。其年十月二十三日。歸窆于西山洪崖鄉鸞岡里。從先姑大瑩。禮也。有子曰夷直。女曰神華。林華。嗚呼。愚常以體道委命爲懷。而情之所鍾。不知其慟。銜涕秉筆。庶不泯其聲塵焉。銘曰。緱嶺之靈。生此淑人。洪崖之濱。寄此新墳。生與道俱。沒與仙隣。悠悠精爽。豈或爲塵。嗚呼。吾信積善之必爾。故攄恨於斯文。

徐騎省集卷第十八

御製春雪詩序

後序

御製雜說序

北苑侍宴詩序

文獻太子詩集序

翰林學士江簡公集序

蕭庶子詩序

成氏詩集序

御製春雪詩序

臣聞堯尚文思。書有詠言之目。漢崇儒學。史稱好道之名。所以澤及四海。化成天下。其後迂闊王道。蕩淫淳風。正始之音闕而莫續。魏帝浮雲之句。不接輿詞。王融曲水之篇。無聞聖作。將興古義。允屬昌期。我皇帝陛下。常武功成。右文業廣。明踰日月。不以聖智自居。思揆雲天。不以才能格物。其或南薰有懌。東作無憂。民思秋稼之娛。物茂冬蒸之禮。恩覃在鎬。調振橫汾。天籟發音。疇非聳聽。乾文垂象。寧隔仰瞻。信可以暢列聖之謨猷。變生人之耳目者也。於是歲躔作噩。序首青陽。玄鳥司啓之明晨。白獸稱觴之節日。有唐中興之一紀。皇上御歷之七年。地平天成。時和歲稔。衢樽之味。普洽玄風。擊壤之聲。散爲和氣。同雲密野。朔雪飛空。急勢隨風。影亂東郊之仗。凝華接曙。光浮元會之筵。星躔旣移。雲疊乃啓。太弟以龍樓之盛。入奉垂旒。齊王以鳳沼之崇。來參帑几。霞軒結轍。革履齊趨。唯陳韶濩之音。無取魚龍之戲。喜油油之旣洽。顧奕奕之方呈。筆落天波。言成帝典。七言四韻。宣示羣臣。乃命太弟太傅建勳。翰林學士給事中朱翬。常

夢錫翰林學士中書舍人殷崇義游簡言吏部尙書毗陵郡公景運工部尙書上饒郡公景遜左常侍勤政殿學士張義方諫議大夫勤政殿學士潘處常魏岑駕部員外郎知制誥喬舜主客員外郎知制誥徐鉉膳部員外郎知制誥張緯光祿卿臨汝郡公景遼鴻臚卿文安郡公景遊太府少卿陳留郡公景道左衛將軍樂安郡公弘茂駕部郎中李瞻等或廣元首之歌或和陽春之曲如葵心之向日馭似螿戶之由雷門二十一篇咸從奏御皆所以美豐年之兆申萬物之情非徒載笑載言一吟一咏而已昔者白雲之唱七萃驅馳黃竹之詩萬人凍餒王猷且塞後嗣何觀孰若偃仰大庭優游六藝初筵有秩而六宮不移夜漏未央而百官已事被之樂府授以史官煥乎文章無得而稱也有詔爲序以紀歲月御批云宿來健有餘力何妨一爲之序以紀歲月呵呵天慈過聽猥屬微臣徐樂上書徒慙暮入其日內宴臣安國作序幸冠首篇狂簡僅成兢憂罔措謹上其日內宴臣安國作序幸冠首篇狂簡僅

後序

昔者漢宮故事著成王負扆之圖魯殿弘規紀黃帝垂衣之象用能昭文昭物雖十世而可知如玉如金更百玉而不易況乎天統建寅之首皇猷累洽之晨上瑞方呈宸游載穆拱北極而衆星咸在祝南山而萬壽無疆明皇花萼之樓風流不泯德祖中和之節雅頌常垂實奕世之耿光爲中朝之盛觀固當騰之竹帛飾以丹青襲六藝以同明與天文而共麗皇太弟重離普照博望凝思敦古道以致君法前經而作事命千秋而指畫召立本以趨馳粲然後素之功焯爾彰施之象照如就日肅不違顏萬國式瞻若奉衣裳之會羣臣仰止似聞輿馬之音盛德形容於斯大備者也初外朝旣罷內宴方陳赴召者上自副君逮

於戚里。銅壺已晏。聖藻爰飛。或逶巡而載歌。或蹈詠而不作。既而有詔出示羣官。臣建勳、義方、鉉等。聞命在前。援簡先就。因承中旨。入奉斯筵。而兩省衆篇。翌日成集。故奉和者二十一首。而侍宴者十有四人。前序闕遺。被令重述。謹上。

御製雜說序

臣聞軒后之神也。畏愛止乎三百。唐堯之聖也。倦勤及乎耄期。文王之明夷也。爰象周於六虛。宣父之感麟也。褒貶流于百代。乃知功利之及物者。與形器而有限。道德之垂憲者。將造物而常新。是故體仁者必懇懇於立言。務遠者必勤勤於弘道。然則封泰山。告成功。七十二家。正禮樂。刪詩書。一人而已。大矣哉。立教之難也。有唐基命。長發祥符。舊物重甄。斯文不墜。皇上高明博厚。潛哲文思。既承累聖之資。仍就甘盤之學。鴻才綺縟。理絕名言。默識泉深。事符影響。自祇膺眷命。欽若重熙。廣大孝以厚時風。勵惟精而勤庶政。宥萬民而罪已。體百姓以爲心。俗富刑清。時安歲稔。其或萬機暇豫。禁籞宴居。接對侍臣。宵分乃罷。討論墳典。昧旦而興。口無擇言。手不釋卷。嘗從容謂近臣曰。卿輩從公之暇。莫若爲學。爲文。爲學。爲文。莫若討論六籍。游先王之道義。不成。不失爲古儒也。今之爲學。所宗者小說。所尚者刀筆。故發言奮藻。則在古人之下風。以是故也。其高識遠量。又如此焉。昔魏武帝有言。老而勤學。而所著止於兵書。吳大帝亦云。學問自益。而無聞述作。風化之旨。彼其慙歟。屬者國步中艱。兵鋒始戢。惜民力而屈己。畏天命而側身。靜慮凝神。和光戢耀。而或深惟邃古。遐考萬殊。懼時運之難并。鑑謨猷之可久。於是屬思天人之際。游心今古之間。觸緒研幾。因文見意。縱橫毫翰。炳煥縑緗。以爲百王之季。六樂道喪。移風易俗之用。蕩而無止。愒心

壘耳之聲。流而不反。故演樂記焉。堯舜既往。魏晉已還。授受非公。爭奪萌起。故論享國延促焉。三正不修。法弊無救。甘心於季世之僞。絕意于還淳之理。故論古今清薄焉。戰國之後。右武戲儒。以狙詐爲智能。以經藝爲迂闊。此風不革。世難未已。故論儒術焉。父子恭愛之情。君臣去就之分。則喪申生。明荀彧。俾死生大義。皎然明白。推是而往。無弗臻善。天地之深心。聖賢之密意。禮樂之極致。教化之本源。六籍之微辭。羣疑之互見。莫不近如指掌。煥若發蒙。萬物之動。不能逃其形。百王之變。不能異其趣。洋洋乎。大人之謨訓也。夫天工不能獨運。元后不能獨理。故有道無時。孟子所以咨嗟。有君無臣。鄭公所爲歎恨。庶乎斯民有幸。大道將行。舉而措之域中。則三五之功。何遠乎爾。臣又聞將順致美。鋪陳耿光。布堯言於萬邦。稱漢德于殊俗。蓋詞臣職也。若乃嚮明而理。負辰而朝。慶賞威刑。豫游言動。則有太史氏存焉。又若雅頌文賦。凡三十卷。鴻筆麗藻。玉振金相。則有中書舍人。集賢殿學士。徐鍇所撰御集序詳矣。今立言之作。未卽宣行。理冠皇墳。謙稱雜說。臣鉉以密侍禁掖。首獲觀瞻。有詔冠篇。勒成三卷。而三卷之中。文義旣廣。又分上下焉。凡一百篇。要道備矣。將五千而並久。與二曜以同明。昭示孫謨。永光册府。謹上。

北苑侍宴詩序

臣聞通物情而順時令者。帝王之能事。感惠澤而發頌聲者。臣子之自然。況乎上國春歸。華林雨霽。宸游載穆。聖藻先飛。雷動風行。君唱臣和。故可告於太史。播在薰絃。帝典皇墳。莫不由斯者已。歲躔己巳。月屬仲春。主上御龍舟。游北苑。親王舊相。至於近臣。並儼華纓。同參曲宴。時也。風晴景淑。物茂人和。望蔣嶠之嶽峯。祝爲聖壽。汎潮溝之清淺。流作天波。絲篁與擊壤齊聲。醴斝共君恩與醉。乃命卽席。分題賦詩。睿思

雲飄天詞綺縟。文明所感。蹈詠皆同。既擊鉢以爭先。亦分題而較勝。長景未暮。百篇已成。自揚大雅之風。豈在逾人之職。奉詔作序。冠於首篇。授以集書藏之金匱。謹上。

文獻太子詩集序

鼓天下之動者在乎風。通天下之情者存乎言。形于風可以言者。其惟詩乎。粵若書契肇生。雅頌乃作。達朝廷邦國之際。其用不窮。更治亂興替之時。其流不竭。六義浸遠。百代可知。若夫王公大人。居尊履正。其行道也無迹。其成務也不宰。所以可則可象。有功有親。非夫詠言。何以觀德。周文陳王。業之什。召穆糾宗。族之篇。聖人輯之。皇猷備矣。子桓振建安之藻。昭明總衆作之英。體有古今。理無用舍。夫機神肇於天性。感發由於自然。被之管絃。故音韻不可不和。形於蹈厲。故章句不可不節。取譬小而指大。故禽魚草木無所遺。連類近而及物遠。故容貌俯仰無所隱。怨則可戒。贊美不誣。斯實仁者之愛人。智士之博物。王室光啓。人文化成。上去刪詩。綿二千祀。其用益廣。其制益精。絕其流冗。結以周密。王言帝典。炳蔚于縑緇。詞人才子。充溢于圖牒。若乃簡練調暢。則高視前古。神氣瀟灑。則存乎其人。亦何必以苦調爲高奇。以背俗爲雅正。者也。殿下挺生知之哲。有累聖之資。道冠三才。學兼百氏。虞庠齒胄。騰聲於就傅之年。侯社錫圭。底績於爲邦之際。隨城封壤。人歌召伯之棠。浙右控臨。時賴京師之潤。戎機鞅掌。曾不勞神。閑館娛游。未嘗釋卷。深遠莫闕。其際喜慍。不見於容。唯奮藻而摛華。則緣情而致意。至鍾山樓月。登臨牽望。闕之懷。北固江春。眺聽極朝宗之思。賞物華而頌王澤。覽禱事而勸農功。樂清夜而宴嘉賓。感邊塵而憫行役。沉吟命筆。顧盼成章。理必造於玄微。詞必關於風教。或寓言而取適。終持正於攸歸。著於簡編。凡若干首。

及玉符來覲。玄圃歸尊。臨飛閣之華池。卽滄雷之講肆。斯文間作。盛德日新。蓋曠代之宗英。實一時之師匠。以鉉幸塵贊論。嘗典絲綸。謂可言詩。因令視草。聽鈞天之奏。徒欲動心。酌滄海之波。唯知滿腹。敬抽短翰。式繼頌聲。謹序。

翰林學士江簡公集序

士君子藏器於身。應物如響。成天下之務者。存乎事業。通萬物之情者。在乎文辭。然則日月不知。人亡政息。瞻之則眇然。在義軒之上。蹈之則肅然。若旦暮之間。自非遺文餘教。則作者之道。或幾乎息矣。嗟夫。天地長久。英靈超忽。鄴中才子。與樂事以俱淪。江左名臣。及玄譚而共盡。清流可挹。勝氣猶生。閱蠹簡以淒涼。撫絕韋而慷慨。斯文未喪。何代無人。濟陽江公。鍾川岳之粹靈。體角犀之奇相。芳蘭十步。本自天資。建木千尋。非求外獎。弱齡聞道。夙歲馳名。竹箭稱美於東南。來充王府。天馬擅奇於西北。入奉乘黃。於時聖歷中興。賢才間出。從容冠蓋之際。頡頏臺閣之間。文高學深。識優理勝。虛襟接物。簡易多通。正色當官。直方無擾。定祖宗之大號。功補神明。端風憲之直繩。氣懾姦宄。身可屈而名不辱。用卽行而舍卽藏。故叢棘三年。雅懷自若。承明再入。時望彌高。人無閒然。道亦光矣。嗚呼。運逢上聖。年在中身。人之云亡。空嗟殄瘁。死而可作。誰與同歸。詩所謂胡不萬年。傳有云古之遺愛者也。昔襄陽孟浩然。年五十有二。疾發背而亡。公豈其後身歟。何符合之若此。惟公以進士擢第。以詞賦馳名。事藩邸。參管記之司。登朝籍。專掌綸之任。奏議表啓。時然後言。詩筆歌頌。和者彌寡。絕文場而遠鶩。橫學海以孤飛。綜南北之清規。盡古今之變體。優游兩制。不亦宜乎。然而初無簡編。文乃亡逸。嗣子翹。門生王克貞等。或搜諸經笥。或傳於人口。或焚藁

之外。或削材之餘。彙聚羣分。得十卷。授之執友。以命冠篇。鉉族近情親。官聯迹密。每西垣景晏。北第風清。忘形樽俎之間。得意筌蹄之表。西江東海。俱爲賦鵬之鄉。北門右掖。並對受釐之問。嗟乎。相如既往。空存封禪之書。季子云來。但有心期之劍。寢門流慟。已隔生平。都門長送。遽成今昔。追託言於夙契。申永悼於斯文。援毫悲吒。存諸梗概云耳。

蕭庶子詩序

人之所以靈者情也。情之所以通者言也。或情之深。思之遠。鬱積乎中。不可以言盡者。則發爲詩。詩之貴於時久矣。雖復觀風之政闕。適人之職廢。文質異體。正變殊塗。然而精誠中感。靡由於外。獎英華挺發。必自於天成。以此觀其人。察其俗。思過半矣。此夫澤宮選士。入國知教。其最親切者也。是以君子尙之。蘭陵蕭君。江左之英。詩苑之精。其爲人也。樂易其處世也。靜默忘形。衡泌之下。苦節戎馬之間。其道日新。其名益震。諸侯虛左。五府交辟。今晉王殿下。樹藩作相。樂善愛才。幕府初開。君實首冠。由典校書。至儀曹郎。出入兩宮。官無虛授。優游多士。交必正人。每良辰美景。登高送遠。適莫不存於心。府勢利不及於笑談。含毫授簡。唱予和汝。其性淡。故略淫靡之態。其思深。故多清苦之詞。大雅之士。何以過此。鉉與君爲友。幾將二紀。其閒聚散窮達。罕或寧居。淡成之懷。終始若一。靜言投分。想見古人。丁巳歲。撫王高讓承華。出分陝服。君以宮省舊德。復踐初筵。撰行之夕。俾予視草。鉉也不佞。無足揚君之美。徒欲申別恨。敘交情。故作斯文。冠於篇首云爾。

成氏詩集序

詩之旨遠矣。詩之用大矣。先王所以通政教。察風俗。故有采詩之官。陳詩之職。物情上達。王澤下流。及斯道之不行也。猶足以吟咏情性。黼藻其身。非苟而已矣。若夫嘉言麗句。音韻天成。非徒積學所能。蓋有神助者也。羅君章。謝康樂。江文通。王希範。皆有影響發於夢寐。今上谷成君亦有之。不然者。何其朝捨鷹犬。夕味風雅。雖世儒積年之勤。曾不能及其門者邪。逮余之知。已盈數百篇矣。觀其詩如所聞。接其人如其詩。既賞其能。又貴其異。故爲冠篇之作。以示好事者云。戊戌歲正月日序。

徐騎省集卷第十九

送謝仲宣員外使北蕃序

送贊善大夫陳翊致仕還鄉詩序

送張泌郭賁二先輩序

送武進龔明府之官序

送劉生序

游衛氏林亭序

送謝仲宣員外使北蕃序

自昔新都盜國。撓我中州。建武開元。越在江左。日月之照。不及河洛之地者。四十年矣。主上方恢遠略。弘文下武。聖作物覩。有開必先。故使僞邦失政。胡馬大入。山泉反覆。羌渾沸騰。五州遺毗。二京故老。引領南望。庶幾撫子。天子聞之。憫然。故命大司馬賈公。使以觀變。儀曹郎謝君副焉。儀曹別子。應曰。美哉。是行蒼生之福。在斯舉矣。始予及子同省。子弟又與子同府。交道深矣。今子將之絕域。無以爲贈。請贈以言。夫格天地。充四方。莫先乎禮。我太宗文皇帝。革暴隋。一寓內。屈己濟物。虛心納諫。故四夷君長。歷代不賓。稽顙闕下。可謂德矣。聲名文物。垂三百年。絕而復續。可謂禮矣。苟使踰百千代之有國家者。猶當企聳下風。奉行不墜。況中興之嗣君乎。周秦宮闕。是本朝二宅。貞觀德禮。是本朝家法。若棄之而不念。委之而不修。非天子之意也。主上躬行於內。而使二君順之於外。今強胡入貢。中原無主。聖人不能違時。時至不可失也。子其勉之哉。思聖意。顧人心。犬羊百萬。以攻戰爲事。不可以威武服也。酋豪聚首。以姦詐爲常。不可以智力勝也。子其將之以德。慎之以禮。衣冠餘緒。必觀光於使臣。一覩漢官威儀。必感泣頓服。宅心南向。苟或

不爾。是絕蒼生之望也。可不慎歟。鉉自束髮從宦。則聞長者之論。盛言爲戰國者。必以權道。子視商周以降。誰非戰國。寧有以權道躋太平乎。而言以人棄。故事與願違。今子王府元僚。居可言之地。遠使上介。當可行之時。勉之哉。故人之願。蒼生之望。在此而已。行矣。文昌春風二月。征途萬里。捨游宴之適。就鞍馬之勞。征虜亭下。南朝送別之場。臨滄觀側。茂弘思洛之所。敝離懷古。寧無情乎。矧軺車所經。觸緒牽思。渡長淮。則想清流映月之景。過睢園。則思愁雲零雪之興。望鞏洛。則傷麥秀之詩。指唐晉。則感大風之歌。綏懷之暇。彈琴詠詩。以祛鬱陶之慮。還軫在邇。不復多陳。聊序鄙志爾。

送贊善大夫陳翊致仕還鄉詩序

夫進退之機。大易稱首。止足之誠。玄文所宗。君子動必乘時。故言行而事立。靜惟體道。故身貴而名全。然則知之非艱。行之不易。去聖既遠。引年益稀。是以古之明君。爰有成式。重辭祿之士。優懸車之禮。賁飾寵秩。靡限常均。所以崇德尚賢。激貪勵俗者也。皇風所及。我有其人。太子洗馬陳翊。江浙炳靈。鄉閭獲譽。棲遲下位。而升聞自高。便蕃寵任。而祇畏日積。時方多難。寄切司聰。將命無私。臨事能斷。盤錯必解。風雨不渝。及少海告符。搖山表慶。天下之本。既正。四郊之壘。亦罷。於是詠遂初之賦。決高謝之懷。京口之西。先有別墅。前臨廣陌。卻枕長江。田逾二頃。桑都八百。戴仲若軒懸之地。不遠風煙。蒲真人鹿迹之鄉。依然川域。誅茅築室。素欲終焉。其所闕者。飛泉而已。嘗因暇日。策杖尋幽。爰有道人。指示岩溜。百步之內。一道懸流。其清可鑑。其味如醴。縈崖漱石。滌慮蠲痾。信山川助其好尚。亦心府資其瑩濯。旣而挂冠請命。伏閣陳詞。優詔嘉之。竟允其請。錫金紫之服。升贊善之資。輕舟東浮。盡室而去。副君執手流涕。似宜都之別。弘景羣

公供帳祖餞若都門之送二疏。知與不知。莫不稱歎。殿下調高雅頌。文動星辰。賦詩一章。以寵行邁。掩鄴中之舊制。流樂府之新聲。足以厚君臣之情。敦風化之本。縑緇麗色。巨壑增華。自周行之人。與觀光之士。靡然投贈。粲爾成章。遠比河梁之篇。近擬白雲之集。夫其貞退之節。樂善之風。實教義之所臻。亦詠歌之盛觀也。鉉名參望苑。迹本騷人。敢言能賦之才。濫奉言詩之賜。敬序麗則。冠於首篇。

送張祕郭賁二先輩序

君子所以章灼當時。焜耀來裔者。必曰進士擢第。畿尉釋褐。斯道也。中朝合法。雖百王不移者也。自聖歷中興。百度漸貞。能興此美者。今始見張郭二生矣。則知九仞之勢。千里之行。凝雲逐日。未可量也。鉉也不佞。生於先賢之後。進在二子之前。此美不兼。可以歎息。然有事同而時異。請試論之。噫。詞場陞廢。五十年矣。故老之言。議殆絕。後生之視聽。懵然。今百辟有司。達於郡國。吏徒見趨走公府中一尉耳。焉知其餘哉。而二君子調高才逸。年少氣盛。將以俊造之業。自重責人。以既廢之禮。又將以堯舜之道爲用。議政於俗吏之間。如是將與時大乖矣。嗚呼。彼衆我寡。或者難以勝乎。君子之道。無施不可。舒之彌四海。卷之在掌握。日磾見奇于牧馬。元揚知名于水磴。彼二人卽公輔大器也。豈以恥辱爲累哉。愚願二君子反己正身。開懷戢耀。無望人以不知。無強人以不能。如斯而已矣。今天子重文好古。諸生懷才待用。所以蒼生未蒙福者。上下之勢殊。中有閒爾。大易之義。物不終否。否極必泰。泰之時。在上者其道下降。在下者其道上行。君臣相合。然後事業遠矣。吾以爲斯道之復不遠。吾子其勉之。句曲仙鄉。廣陵勝地。多難將弭。春物將華。琴棊詩酒。足以爲適。贈言之旨。盡於斯焉。

送武進龔明府之官序

古人有言。士君子志意既立。名譽不聞。蓋朋友之過也。嗚呼。予於龔生有之矣。始予居獻納之地。生已爲赤縣尉。嘗竊議。謂生宜參諫垣。憲府之任。而未果拔茅之志。遽爲賦鵬之行。生不旋踵。亦左授天長川武之地。朝廷置建武軍于其所。使爲將者治之。習兵與儒。其志不通也。處長與佐。其勢不均也。軍市之征。日困於民。王澤之流。不被于俗。及生之至。官聯始舉。刪煩革弊。不變舊風。踰年告歸。舉邑之民。相率遮道。不聽去。乃潛匿佛廟室中。蒼羞輩索而獲焉。扶之上車。擁之而還。竟不得已。中夜而遁。異哉。遺愛之風若此。考功之吏弗聞。丙辰歲。予避兵于池陽。遇生侍親郡中。勉之東下。是時甘泉有烽火之急。天子下哀痛之詔。予謂生必自致青雲之上。以解天下之倒懸。而出入三年。始爲武進宰。噫。非朋友之過乎。嘗試論之曰。才不才在我。用不用在時。道之所存。其人乃貴。功名寵祿。何足算哉。苟澤及於民。教被於物。則百里之廣。千室之富。斯可矣。與夫楊孟之徒。坎坎坷巷。垂空言於後世者。不猶愈乎。行矣龔生。苟有良田。何髮晚歲。贈言之要。其過此乎。

送劉生序

彭城劉生爲南畿令。天官侍郎昌黎公作序以送。盛稱故歷陽宰楊員外光儒之爲政。以勗之。鉉與楊君有姻。深知其內行。君清簡仁愛。心無適莫。自妻子僕妾。及家族吏民。接之無親疎之隔。求之於形骸之外。蓋眞純之氣充。而感召之應遠。民之好競者。皆相與言曰。衆若歸訟。必撓吾員外矣。嗚呼。其古人乎。今劉生才俊於楊。學優於楊。視其政績等。然生猶有耿介不平之氣。觀吏部之勗子。與予之贈言。蓋爲是也。子

